



Матвейн дуулгаһан Ёайн Мэдээсэл

Иисус Христосой уг гарбал

1 ¹Абраһамай үри һадаһан болохо Давидай үри һадаһан Иисус Христосой уг гарбалынь иимэ:

²Абраһам болбол Исаагай эсэгэ, Исаак – Яковай эсэгэ, Яков – Иудын ба тэрэнэй аха дүүнэрэй эсэгэ байгаа. ³Иуда болбол Тамар гэдэг эхэнэрһээ Перец Зерах хоёр хүбүүтэй байгаа. Перец – Ёэцрон хүбүүтэй, Ёэцрон – Арам гэдэг хүбүүтэй, ⁴Арам – Аминадаб хүбүүтэй, Аминадаб – Нахшон хүбүүтэй, Нахшон – Салмон хүбүүтэй байгаа. ⁵Салмон болбол Рахаб гэдэг эхэнэрһээ Боаз хүбүүтэй болоо. Боаз Руфь хоёрһоо Обед хүбүүн түрөө. Обедһээ Иесай хүбүүн түрөө. ⁶⁻¹¹Иесайн уг тэрэнэй хүбүүн Давид хаан залгамжалаа.

Давид хаанай захиралтаһаа эхилээд, Израилиин арад зоние хашалтаар Вавилон руу нүүлгэһэн саг хүрэтэр Иисусай элинсэг үбгэ эсэгэнэрынь иимэ: Давидай уг Соломон залгамжалаа. Соломоной эхэнь түрүүн Урия гэдэг хүнэй һамганиинь һэн. Соломонһоо Рехо-боам хүбүүн, Рехобоамһаа – Абия, Абияһаа – Аса, Асаһаа – Иошафат, Иошафадһаа – Иорам, Иорамһаа – Узия, Узияһаа – Иотам, Иотамһаа – Ахаз, Ахазһаа – Езекия, Езекияһаа – Манассий, Манассийһаа – Амон, Амонһоо – Иосий түрөө. Иосийһоо Иехони болон тэрэнэй аха дүүнэрынь түрэхэн юм.

¹²Вавилон руу хашалтаар нүүлгэгдэһэнһэйн хойшо Иехониһоо Залафиил гараа, Залафиилһаа Зоробабэл, ¹³Зоробабэлһээ – Абиуд, Абиудһаа – Елиаким, Елиакимһаа – Ацор, ¹⁴Ацорһоо – Садок, Садокһоо – Ахим, Ахимһаа – Елиуд, ¹⁵Елиудһаа – Елеазар, Елеазарһаа – Матфан, Матфанһаа – Яков, ¹⁶Яковһаа Мариятай һуһан Иосиф түрэхэн байгаа. Марияһаа Бурханай табисуурта гэжэ алдаршаһан Иисус хүбүүн түрөө. ¹⁷Иигээд, Абраһамһаа Давид хүрэтэр

арбан дүрбэн үе болоно. Мүн Давидһаа эхилээд, Вавилондо нүүлгэгдэн саг болотор арбан дүрбэн үе, Вавилондо нүүлгэгдэнхээ хойшо Бурханай табисууртын түрэтэр баһал арбан дүрбэн үе болоно.

Бурханай табисуурта Иисусай түрэн тухай

¹⁸ Бурханай табисуурта Иисус Христосой түрэн түүхэ иимэ: Мария эжынь хадагаа табиһан Иосиф нүхэртэйгөө гэрлэхынгээ урда Нангин хүлдэһөө хээлитэй болоһоноо мэдэрбэ. ¹⁹ Мариягай Иосиф нүхэрынь үнэн сэдхэлтэй хүн байжа, зоной урда басаганай нэрэ муугаар хэлүүлэн бузарлахагүйн тула түрэ хуримаа шэмээгүйхэн болуулха гэжэ шийдэбэ. ²⁰ Тиигэжэ бодоод, Иосифой дууран хэбтэхэдэнь, Бурханай Эльгээмэл зүүдэндэнь үзэгдөөд, иигэжэ хэлэбэ:

«Давидай үри һадаһан Иосиф, Мариягай түрэхэ хүбүүн Нангин хүлдэһөө бүрилдэн юм. Тиимэһээ ши тэрэниие һамган болгожо абахаяа бү ай. ²¹ Тэрэшни хүбүү түрэхэ, тэрэндэ Иисус* гэжэ нэрэ үгэхэш, юундэб гэбэл, тэрэ арад зоноо нүгэл хилэнсэгһээ абарха юм».

²² Тиигэжэл Дээдын Эзэнэй лүндэншөөрөө иигэжэ дамжуулжа айладханиинь бүтэбэ даа:

²³ «Басаган хээлитэй болоод, хүбүү түрэхэ, тэрэниие Эммануил гэжэ нэрлэхэ», энэ нэрэнь Бурхан мантай хамта байна гэнэн удхатай. ²⁴ Иосиф нойроо һэрээд, уданшьегүй Бурханай Эльгээмэлэй захирһан ёһоор Мариятайгаа гэрлэжэ һууба. ²⁵ Хүбүүнэйнгээ түрэтэр Иосиф һамгантайгаа хамта унтаагүй һэн. Хүбүүндээ тэрэ Иисус гэжэ нэрэ үгөө һэн.

Зүүн зүгэй сэсшүүл Иисуста мүргэбэ

2 ¹ Иисус болбол Иудейн Вифлеем хотодо Ирод хаанай зонхилжо байха үедэ түрэбэ. Тэрэ үедэ зүүн зүгһөө Иерусалим хотодо сэсшүүл ерээд, ² хүнүүдһээ иигэжэ асууба:

«Иудейн хаан болохоор заяагдажа түрэн үхибүүн хаанаб?»

Бидэ тэрээнэй одоной зүүн зүгтэ мандахые хараад,

тэрэндэ мүргэхээ ерээбди».

³ Энэниие дуулаад, Ирод хаан, тэрэнтэй хамта бүхы Иерусалимай зон һанаата болобо. ⁴ Тиигээд Ирод бүхы аһамад санаартаниие,

* Еврей хэлэн дээрэ энэ нэрэ «Дээдын Эзэн абарна» гэнэн удхатай юм.

Хуули заадаг багшанарыг суглуулаад: «Бурханай табисуурта Христос хаана түрэхэ ёһотой байгаа?» – гэж тэдэнһээ һураба. ⁵Тэдэн иимэ харюу үгэбэ: «Иудейн Вифлеемдэ түрэхэ ёһотой байгаа, лүндэншын иигэжэ бэшэһэн ёһоор:

⁶ „Иудейн орон дайдын Вифлеем хото,
ши Иудын мэдэлэй бусад шухала хотонуудһаа
юугээрээшье дутанагүйш, юундэб гэхэдэ,
мини Израилин арад зоние хүтэлхэ
ехэ ударидагша шамһаа мүндэлэн гараха юм“».

⁷Тиихэдэн Ирод зүн зүгһөө ерэнэн сэсэшүүлыг нюусаар дуудаад, одоной мандаһан саг тэдэнһээ мэдэжэ абаба. ⁸Тиигээд тэдэниие Вифлеем эльгээхэ зуураа:

«Ошоод, тэрэ хүбүүе найнаар бэдэрэгты. Тэрэниие олоод, намда дуулгаарайгы. Би баһа ошожо тэрэндэ мүргэхэ ханаатайб», – гэжэ хэлэбэ.

⁹⁻¹⁰Тэдэн хаанай хэлэнэн үгэ шагнаад, замдаа мордобо. Зүүн зүгтэ хараһан одоёо дахин харахадаа тэдэнэр угаа ехээр баярлаба. Тэрэ одон тэдэниие хүтэлэн, урдань ябажа, һүүлэй һүүлдэ хүбүүнэй байһан газарта асараад тогтошобо. ¹¹Сэсэшүүл гэртэ ороод, хүбүүнэй Мария эхэтэйгээ байхыень хараба, тиигээд газар хүрэтэр дохин тэрэндэ мүргэбэ. Асарһан бэлэгүүдээ дэлгэжэ, хүбүүндэ алта мүнгэ, сан санзай, найхан үнэртэй ургамалай тоһо үргэбэ.

¹²Зүүдэндэ тэдэ Иродтэ бусажа бү ошогты гэнэн һэргылэмжэ Бурханһаа абаһан хадаа ондоо харгыгаар өөрынгөө нюотаг орондо бусаба.

Египет руу зугадаһан тухай

¹³Тэдэ сэсэшүүлэй ябаһан хойно Бурханай Эльгээмэл Иосифой зүүдэндэ үзэгдөөд, иигэжэ хэлэбэ:

– Ирод энэ хүбүүе алахаяа ханаашалаад, бэдэржэ орохонь. Тиймэнэ ши бушуухан бодоод, хүбүүгээ эхэтэйн абажа, Египет руу тэрьедэ. Тиигээд минии шамда дуулгатар тэндэ байгаарай.

¹⁴Иосиф үхибүүгээ эхэтэйн абажа, тэрэл хүнндөө Египет ябаба. ¹⁵Тэдэнэр Иродэй үхэтэрын тэндэ байгаа. Тийгэжэл Дээдын Эзэнэй лүндэншөөрөө дамжуулан: «Би Египедһээ өөрынгөө Хүбүүе дуудааб», – гэжэ айладханиинь бүтэбэ даа.

Үхибүүдые алаха тухай Иродэй үгэһэн захиралта

¹⁶ Сэсэшүүлдэ мэхэлүүлһэнээ мэдэрхэдээ, Ирод аргагүй ехээр су-халдаба. Тиигээд Вифлеем хото болон тэрэниие оршон тойроһон нютагуудай хоёр наһанһаа доошо хүбүүдые алагты гэгһэн захиралта-тайгаар сэрэгшэдээ эльгээбэ. Үхибүүнэй наһа Ирод сэсэшүүлһээ мэдэжэ абанан сагаар багсаанан байна.

¹⁷ Тиигэжэл Иеремия лүндэншын айладханаан ёһоор Дээдын Эзэ-нэй найдуулһаниинь бүтэбэ даа:

¹⁸ *«Рама соо* айхабтар гашуудалтайгаар
уйлаха бархирха абьян дуулдана.*

*Рахель хюдуулһан үхибүүдээ шаналан уйлана,
һанааень заһахын аргагүйл».*

Египедһээ бусалга

¹⁹ Иродэй үхэһэн хойно Египедтэ байһан Иосифой зүүдэндэ Бур-ханай Эльгээмэл үзэгдөөд:

²⁰ «Ши бодоод, хүбүүгээ эхэтэйнь абажа, Израиль нютагаа бусажа ошо. Хүбүүнэй ами хороохоёо һанагшад мүнөө хосороо», – гэжэ хэлэбэ.

²¹ Иосиф үхибүүгээ эхэтэйнь абажа, Израиль нютагаа бусаба. ²² Иродэй орондо Архелай хүбүүниинь Иудейдэ хаан болоо гэжэ дуулаад, Иосиф тиешэ ошохоёо айгаа. Харин Иосиф зүүдэндээ дахин зүблэл абаад, Галилейн можо зүглэбэ. ²³ Тэндэ Иосиф гэр бүлэтэйгөө Назарет хотодо түбхинэн нютагжаба. Тиигэжэл «Тэрэ Назаредэй гэжэ нэрлүүлхэ» гээд лүндэншэдэй айладханааниинь тудaa.

Уһаар Арюудхагша Иоаннай номнол

3 ¹ Тэрэ сагта Уһаар Арюудхагша Иоанн Иудейн сүл губи ерээд, номнол хэбэ. ² «Бурханай хаан түрэ һаяар мандахань, тиимэһээ нүгэл үйлэдэхээ болёод, Бурханда хандагты», – гэжэ тэрэ хэлэбэ. ³ Иоанн тухай лүндэншэ Исаяя иигэжэ хэлээ:

* Вавилон руу хүсөөр нүүлгэхын урда тээ дайсадынь еврейнүүдые Рама хо-тодо суглуулаад барижа байгаа бэлэй. Тэндэнь айхабтар ехэ гашуудал бо-лоо һэн. Тон тиимэл гашуудал Вифлеем хотын оршон тойрон Ирод хаанай захиралтаар үхибүүдые алаха үе сагта болоо бэлэй.

*«Дээдын Эзэнэй ябаха замынь бэлдэгты,
алхаха харгыень дардам сэхэ болгогты гэжэ
хэн бэ даа сүл губида хашхарба».*

⁴ Иоанн тэмээнэй ноохон хубсаһа үмдэдэг, һур бэһэ бэһэлээд ябадаг бэлэй. Тэрэ таршаагаар, зэрлиг зүгын балаар хооллодог байгаа. ⁵ Тиихэдэ Иерусалимайхид, Иудей можын хамаг зон, Иордан гол тойрон һуугшад булта тэрээндэ ошобо. ⁶ Тэдэ зон нүгэл шэбэлнүүдээ мэдэрэн гэмшэбэ, тиин Иоанн тэдэниие Иордан голдо шунгуулан уһаар арюудхаба.

⁷ Уһанда арюудхуулхаяа олон фарисейнүүдэй, саддукейнэрэй* эрэжэ ябахые хараад, Иоанн тэдэндэ иигэжэ хэлэбэ: «Хорото могойн таһардахад! Бурханай буулгаха хэһээлтэһээ иигээд хулжыхыетнай таанарта хэн заагаа? ⁸ Таанар буянтай һайн юумэ бүтээжэ, Бурханда хандаһанаа харуулагты. ⁹ Үбгэ эсэгэмнай Абраһам юм гэжэ өөһэд тухайгаа бү бодогты, юундэб гэхэдэ, Бурхан энэ хэбтэһэн шулуугааршые Абраһамда үри хүүгэдые бүтээжэ шадаха юм гэжэ танда хэлэхэ байна. ¹⁰ Модо үндэһөөрнь таһа сабшаха алма хүхэ бэлэн байна: һайн үрэ жэмэс үгэдэггүй алишые модон таһа сабшагдаад, галда хаягдаха. ¹¹ Нүгэлөө гэмшэһыетнай баталан би таанадые уһаар арюудханаб, теэд минии хойноһоо Заларан ерэгшэ таанадые Нангин Һүлдэ гал хоёроор арюудхаха. Тэрэ намда ороходоо агуухэ юм. Би тэрэнэй гуталыеньшые абажа ябаха эрхэгүйб. ¹² Тэрэ таряагаа сэбэрлэхээр хүрзээе гартаа адхаад байна: таряагаа суглуулжа амбаартаа хадагалха, харин мэхийнэ голоомыень залиршагүй галда шатааха».

Иисусые уһаар арюудхаба

¹³ Тэрэ сагта Иисус Иоаннһаа уһан арюудхалда хүртэхээ Галилейһээ Иордан голдо ерэбэ. ¹⁴ Тиихэдэнь Иоанн Иисусай һанал хубилгаха зорилготойгоор:

«Би шамһаа уһан арюудхалда хүртэхэ ёһотойлби, тиигэн гэхээ ши намда ерэбэ гүш?» – гэбэ.

¹⁵ Теэд Иисус тэрээндэ:

«Мүнөө энээниие хэе, бидэ иигэжэл Бурханай эрхэ хүсэл бүтээхэбди», – гэбэ. Тиихэдэнь Иоанн зүбшөөбэ. ¹⁶ Уһаар арюудхууламсаараа Иисус уһанһаа гараба. Тиихэдэнь тэрээндэ огторгой

* Иисусай эсрэг тэмсэһэн еврей шажанай бүлэгүүд.

сэлигдэн нээгдэбэ, тэрэ гулабхаадал мэтэ Бурханай Хүлдэн дээрэнь буухые хараба. ¹⁷ «Энэ минии хайрата Хүбүүмни гээшэ, ханаа сэдхэлдэмни таатай юм», – гэхэн абьяан огторгойһоо дуулдаба.

Шолмос Иисусые туршана

4 ¹ Удаань Хүлдэ Иисусые альбан шолмосоор хорюулха туршуулхаяа сүл губи руу хүтэлжэ абаашаба. ² Иисус дүшэн үдэр, дүшэн хүни масаглаад, хүүлдэнь гэдэһэниинь аргагүй ехээр үлдэбэ. ³ Тиихэдэнь хоригшо шолмос тэрээндэ ерээд: «Хэрбээ ши Бурханай Хүбүүн юм хаа, эдэ шулуунуудта хилээмэн болохыень захира», – гэбэ.

⁴ Тиихэдэнь Иисус: «„Хүн гансал хилээмээр амидардаг бэшэ, харин Бурханай хэлэһэн үгын ашаар амиды ябадаг юм“, – гэжэ Нангин Бэшэгтэ хэлэгдэнэ», – гэжэ харюусаба.

⁵ Хүүлдэнь Иисусые шолмос нангин Иерусалим хото абаашажа, Бурхан Хүмын орой дээрэ байлгаба. ⁶ «Хэрбээ ши Бурханай Хүбүүн юм хаа, эндэһээ доошоо хүрэ. Тиигэбэлшни, „Бурхан өөрынгөө Эльгээмэлнүүдтэ шинии тушаа захиралта үгэхэ, шулуунда бүдэржэ унахагүйншни тулада тэдэ шамайе гар дээрээ үргөөд ябаха“, – гээд Нангин Бэшэг соо хэлэгдэнэ ха юм», – гэжэ Иисуста шолмос хэлэбэ.

⁷ Тиихэдэнь Иисус: «Бурханшни болохо Дээдын Эзэнээ бү турша гээд баһа тэндэ бэшээтэй юм», – гэжэ шолмосто харюусаба.

⁸ Иисусые шолмос дахин үндэр гэгшын хада дээрэ абажа гараад, дэлхэйн бүхы хаан оронуудые, тэдэнэй хүр жабхалангые харуулна. ⁹ «Хэрбээ хүлдэм унажа мүргөө һаашни, би эдэ бүгэдые шамда үгэхэб!» – гэжэ тэрээндэ шолмос хэлэбэ.

¹⁰ Тиихэдэнь Иисус шолмосто: «Ай, сатана!* Намһаа зайла! „Ши Эзэн Бурхандаал шүтэжэ, гансал тэрээндээ алба хэжэ бай!“ – гээд Нангин Бэшэг соо хэлэгдэнэ», – гэжэ харюусаба. ¹¹ Тиихэдэнь шолмос Иисусые орхижо ошобо, харин Бурханай Эльгээмэлнүүд тэрээндэ туһалхаяа ерэбэ. Иисус Галилей можодо ажалаа хэжэ эхилбэ. ¹² Иоаниие түрмэдэ хаагаа гэжэ дуулаад, Иисус Галилей мого ошобо. ¹³ Теэд Назарет хотодоо байхын орондо тэрэ Капернаум хотодо һуурижаба. Тэрэ хото Галилей далайн хажууда, Забулон ба Нафталим обогүүдай газарта оршожо байгаа. ¹⁴ Тиигэжэл лүндэншэ Исаягаар дамжуулан Бурханай айлдханиинь бүтэбэ даа:

* Энэ нэрэ «гэмнэгшэ» гэхэн удхатай юм.

- 15 *«Забулоной газар, Нафталимай газар,
нуурай шадархи харгын дэргэдэхи газарнууд,
Иордан голой саада бэе,
бусад үндэһэтэнүүдэй Галилейн газар дайда,
16 харанхы мунхагта нуугаашад
тон ехэ гэрэл туяа үзэхэ!
Үхэлэй ороной һүүдэртэ нуугаашадта
гэрэл туяа сасарха!»*

17 Тэрэ саһаа хойшо Иисус: «Нүгэл үйлэдэхээ болижо, Бурханда хандагты, Бурханай хаан түрын мандахань ойртоод байнал», – гээд номножо эхилбэ.

Иисус түрүүшын дүрбэн шабинараа шэлэжэ абаба

18 Нэгэтэ Галилей далайн хажуугаар ябажа ябахандаа, Иисус аха дүү хоёрые хараба. Тэдэ загаһашадай нэгэнь Пётр гэжэ ара нэрэтэй Симон, нүгөөдэнь тэрэнэй Андрей гэдэг ахань байгаа. Тэдэ хоёр загаһашад гүльмээ далайда хаяжа байба. 19 «Таанар хойноһоомни ябагты, загаһа барихын орондо хүнүүдые намда хандуулха албанда би таанадые хургахаб», – гэжэ Иисус тэдэндэ хэлэбэ. 20 Тиигэхэдэнь тэдэнэр дары гүльмээ орхёод, Иисусай хойноһоо ябаба.

21 Тэндэһээ саашалжа ябатараа Иисус Зэбэдэйн хүбүүдые, Яков Иоанн хоёрые хараба. Аха дүү хоёр Зэбэдэй эсэгэтээ хамта онгосодо нуугаад, гүльмээ заһажа байгаа. Иисус тэдэниие хамта ябалсахаарнь дуудаба. 22 Тэдэнь дары онгосоёо, эсэгээ орхёод, Иисустай ябаба.

Иисус хургана, номноно, үбшэ хабшанһаа эдэгээнэ

23 Иисус бүхы Галилей можоор ябажа, мүргэлэй гэрнүүдтэ ард зониие хургаба, Бурханай хаан түрэ тухай һайн мэдээсэл номнобо, элдэб янзын үбшэ хабшатай хүнүүдые эмнэн эдэгээбэ. 24 Иисус тухай алдар суу бүхы Сири ороноор хаа хаанагүй тараба. Тиимэһээ тэрээндэ ехээр үблэжэ зобожо байһан, досоогоо ада шүдхэртэй болоһон, унадаг үбшэнтэй, саа үбшэнтэй, мүн бусадшые элдэб янзын үбшэ хабшантай зониие олоор асаржа байба, тиин Иисус тэдэниие бултыень эдэгээбэ. 25 Галилей можоһоо, Арбан хото можоһоо, Иерусалимһаа, Иудей можоһоо, Иордан голой саада бэеһээ ерэнэн үй түмэн зон Иисусые дахажа ябаба.

Хада дээрэ айладхагдаһан номнол

5¹ Хажуудаа олон зоной сугларһые харахадаа, Иисус хада дээрэ гаража, тэндээ һууба. Тэрэниие тойроод шабинарынь сугларба.
² Иисус тэдэ зониие хургажа эхилбэ.

Үнэн бодото жаргал

- ³ *«Бурханай Һүлдөөр дуталдагшад, жаргалтайл,
Огторгойн хаан түрэ тэдэнэй ха юм.*
- ⁴ *Гуниглан уйлаашад жаргалтайл,
Бурхан тэдэнэй ханаае амаруулхал.*
- ⁵ *Даруу номгон зон жаргалтайл,
тэдэнэр дэлхэе уг залгамжалхал.*
- ⁶ *Үнэн зүбье угаа ехээр хүсэгшэд жаргалтайл,
тэдэнэр ханаһандаа хүрэхэ юм.*
- ⁷ *Бусад зониие хайрлаашад жаргалтайл,
тэдэниие өөһэдыень хайрлахал.*
- ⁸ *Арюун сэдьхэлтэн жаргалтайл,
тэдэнэр Бурханиие үзэхэл.*
- ⁹ *Амгалан байдал найруулагшад жаргалтайл,
Бурхан тэдэниие үхибүүдни гэжэ нэрлэхэл.*
- ¹⁰ *Бурханай эрхэ хүсэлөөр ажарууһанайнгаа түлөө хашуулагшад
жаргалтайл,
Огторгойн хаан түрэ тэдэнэй ха юм.*
- ¹¹ *Минии түлөө доромжолууһан, хашуулжа намнууһан, элдэбээр
хардууһан байбал, таанад жаргалтайт.*
- ¹² *Баярлажа, хүхижэ ябагты!
Тэнгэридэ таанадта агууехэ шагнал бэлдээтэй байна.
Эртэ урда ажамидарһан лүндэнишэдые баһал иигэжэ хашажа
үлдэжэ байһан юм».*

Дабһан ба гэрэл туяа тухай

¹³ Таанад газар дэлхэйн зоной дабһан хужарынь гээшэт. Хэрбээ дабһанай амтаяа гээгээ һаань, дахин тэрэниие яажа гашуун болгохоб? Тиигээ һаа дабһан юундээшье хэрэггүй болоод, миил хаягдажа, хүнэй хүлдэ гэшүүлхэ зэргэтэйл.

¹⁴ Таанад газар дэлхэйн зоной гэрэл туяа гээшэт. Хада дээрэ бодхоогдоһон хото хоргодожо шадахагүйл. ¹⁵ Зула аһаагаад, хэншые

тэрэнээ амһарта доро табидаггүй, харин гэртэ байһан зониие бултыень гэрэлтүүлжэ байхын тула зулын табюур дээрэ бадараадаг юм. ¹⁶ Энээндэл адляар танай гэрэл туяа улад зоной урда гэрэлтэжэ байхань болтогой, тиигэбэл дэмбэрэлтэ һайхан хэрэгүүдыетнай зон хараад, тэнгэридэхи Эсэгэдэтнай магтаал соло дуудахал.

Моисейн Хуули тухай

¹⁷ Моисейн Хуули гү, али лүндэншэдэй бэшээшые болюулхаяа намайе ерээ гэжэ бү бодогты. Би эдээниие болюулхаяа бэшэ, харин үнэн дээрэнь бүтээхээ ерээб. ¹⁸ Газар тэнгэри хоёрой байгаал сагта, Хуулиин багаханшые зүйл, бишыханшые үзэгынь үгы болохогүй гэжэ таанадта баталан хэлэнэб. Досоонь бэшээтэй бүхы юумэнүүд заабол бээлхэ зэргэтэй юм. ¹⁹ Тиин Хуулиин тон эгээлэй заабариие эбдэһэн, улад зониие тиимэ юумэндэ һургаһан хүн Огторгойн хаан орон дотор тон бирагүй хүн байха. Зүгөөр эдэ заабаринуудые сахидог, улад зониие тиимэ юумэндэ һургадаг хүн Огторгойн хаан орон дотор агуухэ хүн байха. ²⁰ Хэрбээ таанар Бурхантай баталһан Хэлсээе Хуули заадаг багшанарһаа, фарисейнүүдһээ үлүү һайнаар дүүргэдэггүй һаа, Огторгойн хаан орондо орохогүйт гэжэ баталан хэлэнэб.

Уур сүхал тухай

²¹ «Хүниие бү ала, алууршан зарга шүүбэридэ үгтэхэ», – гэжэ эртэ урда сагта хүнүүдэй хэлэдэгые таанар дуулаһан бэээт. ²² Хүндэ дэмы уурлаһан хүн зарга шүүбэридэ орохо зэргэтэй гэжэ би мүнөө таанадта хэлэнэб. Хүниие «рака»* гэһэн хүн Зүблэлэй гэшүүдэй заргада үгтэхэ ёһотой; хүниие «тэнэг» гэһэн хүн гал тамада унаха ёһотой гэжэ би таанадта хэлэнэб.

²³ Хэрбээ ши үргэлэй шэрээгэй хажууда үргэл хэхээ ябаһанаа, хүнэй шамда гомдолтой байһые һанаандаа оруулбал, ²⁴ үргэлэй шэрээгэй хажууда үргэлөө орхи. Тиигээд бушуухан ошожо, нүгөө хүнтээ эбтэй боло, тиигэһэн хойноол үргэл мүргэлөө үргөөрэй.

²⁵ Хэрбээ хэн нэгэн шинии урдаһаа зарга барижа, шамайе зарга шүүбэридэ абаашажа байбал, зарга шүүгшын мэдэлдэ ороогүйдөө, замдаа хэрэгээ түргэһэн шийдхэхые оролдо. Тиигээгүй һааш, шамайе зарга шүүбэридэ үгэхэ, зарга шүүгшэ шамайе түрмын харуулшанда

* Мунхаг хоһон.

тушааха, харин харуулшан шамайе түрмэдэ һуулгаха. ²⁶ Үри шэриез дууһан, һүүлшын хашарһан хүрэтэр түлөөгүй һаа, ши тэндэһээ гарахагүйш гэжэ шамда баталан хэлэнэб.

Эрэдээ гү, али эхэнэртээ урбаха тухай

²⁷ «Эрэдээ гү, али эхэнэртээ бү урба», – гэжэ эртэ урда сагта хүнүүдэй хэлэдэгые таанар дуулаһан бээт. ²⁸ Харин би мүнөө иигэжэ хэлэхэ байнаб: ондоо эхэнэр тээшэ хараад, тэрээнтэй ниилэхэ һанаатай байһан алишые хүн һанал бодолдоо тэрэ эхэнэртэй орёолдон, өөрынгөө һамганда урбаба гээшэ. ²⁹ Хэрбээ баруун нюдэншни шамайе нүгэлдэ оруулаа һаа, тэрэнээ һуга татаад хая. Бүрин эрхэтэнтэйгээ гал тамада хаягдахын орондо гансахан эрхэтэнгүй ябалшни шамда дээрэ байха. ³⁰ Хэрбээ баруун гаршни шамайе нүгэлдэ оруулаа һаа, тэрэнээ таһа отолоод хая. Бүрин бүтэн эрхэтэнтэйгээ гал тамада хаягдахын орондо гансахан лэ мүсыншни хосорбол, шамда дээрэ байха.

Ханиһаа халаха тухай

³¹ Һамганһаа халажа байһан эрэ бүхэн халаһан тухайгаа гэршэлгэ һамгандаа бэшэжэ үгэхэ ёһотой гэжэ баһа хэлэгдэһэн байдаг. ³² Харин би мүнөө таанадта иигэжэ хэлэхэб: өөртэнь урбаагүй эхэнэрһээ бусад шалтагаануудаар халаһан алишые эрэ һамгаяа урбалтада түлхинэ; мүн тиимэ эхэнэрээр һамга хэһэн хүн баһал урбагша болоно.

Тангариг тухай

³³ «Дээдын Эзэндэ үгэһэн тангаригаа бү эбдэ, тэрэнээ сахижа яба», – гэжэ эртэ урда сагһаа хүнүүдтэ хэлэдэгые таанар баһа дуулаа һэн бээт. ³⁴ Харин би мүнөө танда иигэжэ хэлэхэб: найдуулга үгэхэдөө огто бү тангаригла, огторгой тэнгэрээршые бү тангаригла, юундэб гэбэл, огторгой хадаа Бурханай һуудаг шэрээ гээшэ. ³⁵ Газар дэлхэйгээршые бү тангаригла, юундэб гэбэл, газар дэлхэй Бурханай хүлэйн түшэг гээшэ. Иерусалимааршые бү тангаригла, юундэб гэбэл, Иерусалим агууехэ Хаанай хото гээшэ. ³⁶ Өөрынгөө толгойгооршые бү тангаригла, юундэб гэхэдэ, гансаханшые үһээ сагаан болгожо гү, али хара болгожо шадахагүйш. ³⁷ Зүгөөр, найдуулга үгэхэдөө, «зай, зай», али «үгы, үгы» гэжэл хэлэ. Энээнһээ үлүү үгэ муу мэхэтэй шолмосхоо гарадаг.

Үнөөгөө абаха тухай

³⁸ «Нюдэнэй харюу нюдэн, шүдэнэй харюу шүдэн» гэжэ хэлэдэ-гыге таанар дуулаа ёһотойт. ³⁹ Харин би мүнөө танда иигэжэ хэлэхэб: хоротоноор бү үһөөрхэлдэ. Хэрбээ баруун хасарыешни хүнэй альгадабал, тэрэ хүндэ зүүн хасараа табижа үгэ. ⁴⁰ Хэрбээ хэн нэгэнэй шамтай заргалдаад, самсыешни буляаха ханаатай байбалнь, ши тэрээндэ дэгэлээ тайлажа үгэ. ⁴¹ Хэрбээ нютагыешни эзэлхэн сэ-рэгшэд шамайе нэгэ модоной зайда юумыень шэрэжэ абаашахыешни хүсөөр баалабалнь, ши тэдэнэй юумэ хоёр модоной зайда абаашажа үгөөрэй. ⁴² Шамһаа юумэ эрихэн хүндэ үгэ, шамһаа юумэ урьһаар абаха гээ һаань, буруу бү хараарай.

Дайсадтаа дуратай байха тухай

⁴³ «Нүхэртөө дуратай бай, дайсанаа үзэн яда» гэжэ хэлэдэгыге таанад дуулаа бэээт. ⁴⁴ Харин би мүнөө танда иигэжэ хэлэхэб: дайсадтаа дуратай байгты, таниие хашагшадай түлөө зальбаржа байгты. ⁴⁵ Тиигээ һаа, огторгойдо байгша Эсэгэдээл адли бээ абажа ябадаг болохот. Юундэб гэбэл, Эсэгэтнай өөрынгөө муушуулдашые, һайшуулдашые нара гэрэлтүүлнэ, мүн зүбтэндэшые, буруутандашые хура бороо оруулна. ⁴⁶ Хэрбээ өөртөө хайра дуратай зонииел хайрлажа байбалтнай, Бурхан яагаад таанадые шагнаха юм? Алба татаашадшые тиидэг бэшэ аал? ⁴⁷ Баһа хэрбээ гансал өөрынгөө нүхэдые мэндэшэлжэ ябабал, таанад үлэмжэ һайн ямар юумэ хэнэ гээшэбта? Мүн бусад арадуудшые баһал тиидэг бэшэ аал? ⁴⁸ Тиимэхээ эрхим түгэс Огторгойн Эсэгэдээл адли таанадшые эрхим һайн байгты.

Үгытэйшүүлдэ бадар үгэхэ тухай

6 ¹ Хүнүүдтэ харагдаха мэдэгдэхын лэ тула тэдэндэ туһа хүргэжэ бү байгты. Тиигээ һаа, Огторгойдохи Эсэгэхээ шагналда хүртэхэгүйт. ² Тиин үгытэйшүүлдэ бадар үгэхэдөө, тэрээн тухайгаа бүхы хото хүдөөгөөр бү донгодо. Хоёр нюуртан лэ тиигэжэ бээ магтуулхын тула мүргэлэй гэрээр дүүрэн, газсагууршые тунхагладаг ха юм. Тэдэнэр өөһэдынгөө шагнал энэ дээрээл абажа байна гэжэ танда үнэниие хэлэнэб. ³ Үгытэйшүүлдэ бадар үргэхэдөө, тэрээн тухайгаа хани нүхэдтөөшые бү мэдүүлэ. ⁴ Үргэл хэхэдээ, нюудагаар хэжэ бай. Тиигэбэлшни нюуса юумэ хаража мэдэжэ байдаг шинии Эсэгэ ашыеш заагагүй харюулха.

Зальбарха тухай

⁵ Зальбархадаа, ши хоёр нюуртанда адли бү боло. Тэдэнэр улад зондо үзэгдэхэ харагдахын тула мүргэлэй гэртэ бодоод, гудамжын булангуудаар зогсоод зальбарха мүргэхэ дуратай байдаг. Тэдэнэр өөһэдынгөө шагнал энэ дээрээл абажа байна гэжэ танда үнэниие хэлэнэб. ⁶ Харин ши зальбархадаа, өөрынгөө таһалгада орожо, үүдээ хаагаад, шамтай далда газарта байһан Эсэгэдээ зальбараарай. Тиигэбэлшни нюуса юумэ хаража мэдэжэ байдаг шинии Эсэгэ ашыешни заагагүй харюулхал. ⁷ Зальбархадаа, ши онгондо мүргэгшэ хүнүүдтэл адляар дэмы үгэнүүдые бү шаша. Тэдэ үлүү үгэтэн олон табые шашахадаа, онгонуудтаа дуулдахабди гэжэ һанадаг ха юм. ⁸ Тэдэ зониие бү нажаагты: эрихэ гуйхыншни урда тээ Эсэгэшни шамда хэрэгтэй юумэнүүд тухай мэдээд байдаг ха юм. ⁹ Иигээд зальбаржа байгаарай:

«Тэнгэридэ оршодог Эсэгэмнай!

Наггин нэрэшни алдаршахань болтогой.

¹⁰ *Хаан түрэшни мандахань болтогой,
тэнгэри огторгойтойл адляар
газар дэлхэй дээрэшье
эрхэ хүсэлини бэлхэнь болтогой!*

¹¹ *Ажамидаралаймнай хоол мүнөөдэр мандаа хайрлыш!*

¹² *Манда муу юумэ хэгшэдые манай хүлисэдэгтэл адляар,
маанадай буруу хэрэгүүдые хүлисыш даа.*

¹³ *Горидолго хорхойтуулгада маниие бу оруулыш даа,
муу мэхэтэй шолмошоо аршалжа байгыш даа!*

*Хаан түрэ, хүсэ шадал, алдар соло мүнхэдөө шинии ха юм.
Болтогой!»*

¹⁴ Хэрбээ ондоо хүнүүдэй танда хэһэн муу юумэнүүдые хүлисэжэ байбалтнай, тэнгэридэ оршодог Эсэгэтнайшье таниие хүлисэхэл.

¹⁵ Хэрбээ бусадые танай хүлисэхэгүй байбал, огторгойдо оршодог Эсэгэтнай баһа танай буруу ябадалнуудые хүлисэхэгүйл.

Масаглаха тухай

¹⁶ Масаглахадаа хоёр нюуртан мэтээр гунигтай шарай харуулхаяа бү оролдогты. Тэдэнэр масаглаһанаа хүн бүхэндэ мэдүүлхын тула уйдхартай барагар шарай үзүүлдэг юм. Тэдэнэр өөһэдынгөө шагнал энэ дээрээл абажа байна гэжэ танда үнэниие хэлэнэб. ¹⁷ Хоол

барингүй ябахдаа, ши үнээ намнаад*, нюураа угаа. ¹⁸Тиигэбэлшни, масаглаһан тухайшни бусад зон мэдэхгүй. Харин шамтай далда газарта байһан Эсэгэшни мэдэжэ байха. Тиин нюуса юумэ мэдэжэ байдаг Эсэгэшни ашыеш заатагүй харюулха.

Тэнгэридэхи баялиг тухай

¹⁹Газар дэлхэй дээрэ баялиг зөөри өөртөө бү суглуулагты, тэрэниетнай хүйр хорхой, жэбэ жонхо эдижэ магадгүй, хулгайшад шургажа ороод, хулуужа магадгүй. ²⁰Харин баялиг зөөри огторгой дээрэ суглуулагты, тэндэ хибэн хорхойшые, жэбэ жонхошые эдихгүй, хулгайшадшые шургажа ороод хулуухагүй. ²¹Ушарынь хэлэбэл, эрдэни баялигайтнай байһан газарта зүрхэ сэдхэлтнайшые оршодог бшуу.

Бэын гэрэл тухай

²²Нюдэн болбол бэын гэрэл дэн юм. Нюдэнэйшни арюун гэрэлтэй байгаа хаа, бүхы бэешни гэрэлтэй гэгээн байха. ²³Хэрбээ нюдэнэйшни харасын сэбэр бэшэ юм хаань, бүхы бэешни харанхы бүрэнхы байхал. Теэд досоохи гэрэлэйшни харанхы юм хаань, харанхынь өөрөө ямар бад балай байлтай гээшэб?

Бурхан ба эд зөөри тухай

²⁴Хэншые хоёр эзэндэ зарагдажа шадахагүй: нэгэн гэбэл, таанад нэгэ эзэндээ дурагүй, нүгөөдэдөө дуратай байхалта; али үгышые хаа, нэгэ эзэндээ дуратайгаар, нүгөөдэдөө дурагүйгөөр ажаллаха бшуут. Таанад Бурханда болон эд зөөридэ нэгэ зэргэ алба хэжэ шадахагүйлта.

Юрын ажабайдал тухай һанамжа

²⁵Тиимэһээл таанадта иигэжэ хэлэхэб: амиды ябахын тула юу эдихэ уухабибди, юу үмдэхэбибди гэжэ ханаагаа бү зобогты. Амимнай эдээ хоолһоо шухала бэшэ аал? Бэемнай хубсаһа хунарһаа шухала бэшэ аал? ²⁶Огторгойгоор ниидэдэг шубуудые ажаглан харыт: тэдэнэр юумэ тарйдаггүй, хададаггүй, амбаарта үрэнэ таряа суглуулжа хадагалдаггүйл. Зүгөөр, танай Огторгойн Эсэгэ тэдэниие тэжээдэг

* Эхэ бэшэгтээ: «толгойдоо хангалтай ургамалай тоһо түрхи» гэжэ бэшээтэй байдаг.

ха юм. Таанар тэдэ шубуудта ороходоо үлүү шухала бэшэ аалта?
²⁷ Таанадай хэнтнай шадалаараа оролдоод, тохоногойшые шэнээн ургажа шадахаб?

²⁸ Баһа хубсаһа хунар тухай ханаагаа юундэ зобонобта? Хээрэдэ сэсэгүүдэй яажа ургадагые харыт: тэдэ ажал хэдэггүйл, өөһэдтөө утаһа ээрэжэ хубсаһа оёдоггүйл. ²⁹ Алдар суутай Соломоншые арггүй ехэ эд баялигтай байһаншые хаа, эдэ сэсэгүүд шэнги тиимэ гоёор хубсалдаггүй һэн гэжэ би танда хэлэнэб. ³⁰ Мүнөөдэр эндэ ургажа байгаад, үглөөдэрынъ, магад, галда шатаагдажашые болохо хээрэ ургаһан алишые ногоо Бурхан үзэсхэлэнтэ гоёор шэмэглэдэг юм. Харин таанадые Бурхан тэрэ ногоонһоо хураггүй ехээр анхараа бэээ, этигэл багатан!

³¹ Тиимэхээ «Бидэ юу эдихэмнай гээшэб?» али «Юу уухамнай гээшэб?» али «Юу үмдэхэмнай гээшэб?» гэжэ өөһэдтөө бү хэлэгты, ханаагаа бү зобогты. ³² Юундэб гэбэл, Бурхание мэдэхэгүй хүнүүд лэ иимэ юумэнүүдээр ханал бодолоо бүрин эзэлүүлдэг юм. Эдэ бүгэдэ юумэнэй таанадта хэрэгтэй байһые Огторгойн Эсэгэтнай хайн мэдэжэ байна бшуу. ³³ Түрүүшээр Бурханай хаан түрые, Бурханай үнэн зүбые бэдэрэгты, тиигээ хаатнай бусад бүгэдэ юумэнүүд танда үгтэхэ. ³⁴ Тиимэхээ үглөөдэрэйнгөө тухай ханаагаа бү зобогты, юундэб гэбэл, үглөөдэртнай өөрөө өөр тухайгаа ханаагаа зобохол: үдэр бүхэндэ ханаагаа зобохо юумэниинь олон байдаг лэ.

Бусадые зэмэлхэ тухай

7 ¹ Бусадые бү шүүбэрилэн зэмэлэгты, тиигэбэл Бурхан таанадые шүүбэрилэн зэмэлхэгүйл. ² Ушарынъ хэлэбэл, бусадые яажа зэмэлнэбта, тиигэжэл Бурхан таанадые зэмэлхэ, ямар хэмжээгээр хэмжэнэбта, тиимэл хэмжээгээр танда хэмжэжэ үгэхэ. ³ Нүхэрэйнгөө нюдэндэ байһан гэшүүһэ хараад, өөрынгөө нюдэндэ байһан модо юундэ обёорногүйбши? ⁴ Үгышые хаа, нюдэндэшни модоной орожо тороод байхада, ши нүхэртөө: «Байза, би шинии нюдэндэ ороод байһан гэшүүһэ гаргаһууб», – гэжэ яагаад хэлэхэбши? ⁵ Хоёр нюуртан! Түрүүшээр өөрынгөө нюдэнэй модо гарга, тиигээ хаа, нүхэрэйнгөө нюдэнэй гэшүүһэ яажа гаргахые мэдэхэлши.

⁶ Нангин юумэ нохойдо бү хаягты, тэдэ эрьсэд лэ өөртэтнай добтолхол. Субад эрдэни гахайн урда бү сасагты, тэдэ тэрэниетнай миин лэ хүлөөрөө гэшхэхэл.

Тоншоогты – таанадта нээжэ үгэхэ

⁷ Тиимэһээ эригты, тиихэдэтнай танда үгэхэл; бэдэрэгты, тиихэдээ олохот; үүдэ тоншоогты, тиихэдэтнай танда нээхэ. ⁸ Юундэб гэбэл, эриһэн алишье хүн абадаг, бэдэрһэн хүн олодог, тоншоһон хүндэ үүдэ нээжэ үгэдэг. ⁹ Хилээмэ эриһэн хүбүүндээ гартань шулуу барюулха эсэгэ таанарай дунда олдохо аал? ¹⁰ Мүн загана эрихэдэнь могой үгэхэ хүн байха аал? ¹¹ Хэрбээ нүгэл шэбэлтэй таанадай үхибүүдтээ хайн юумэ үгэжэ шададаг байхадатнай, Огторгойн Эсэгэтнай эрижэ байһан хүндэ бүришье бэлэнээр хайн хайханиее үршөөхэ бэшэ аал?

¹² Бусад хүнүүд танда ямараар хандаһай гэжэ һананабта, тиигэжэл таанад бусадуудта хандажа байгты: энэ болбол Моисейн Хуулиин ба лүндэншэдэй хургаалай гол удхань мүн.

Уйтахан хаалга тухай

¹³ Уйтахан хаалгаар орогты: юундэб гэбэл, тамада хүргэдэг хаалгань үргэн, харгынь уужам юм, тиин тэрээгээр олон лэ зон ябадаг. ¹⁴ Ажамидаралда хүргэдэг хаалгань уйтахан, харгынь нариихан бэрхэ юм, тэрэение олоошо зон үсөөн байдаг.

Модон үрэ жэмэсээрэ танигдаха

¹⁵ Хуурмаг лүндэншэдһөө болгоомжолжо байгты. Тэдэнэр гадаада талаһаа хонид байһан хэбэр үзүүлэн таанадта ерэбэшье, доосоогоо арьяатан шоно мэтэ байха. ¹⁶ Тэдэниие таанад хэһэн хэрэгүүдэйнь үрэ дүнгөөр танихат. Үүргэнэ модон үзэм жэмэс үгэдэггүй, үргэхэтэй буртаг үбһэн амтан жэмэс ургуулдаггүй. ¹⁷ Тэрээндэл адляар, алишье хайн модон хайн үрэ жэмэс үгэдэг, муу модон муу үрэ жэмэс үгэдэг. ¹⁸ Хайн модон муу үрэ жэмэс ургуулжа шадахагүй, муу модон хайн үрэ жэмэс ургуулжа шадахагүй. ¹⁹ Хайн үрэ жэмэс үгэдэггүй алишье модон таһа сабшагдаад, галда хаягдадаг юм. ²⁰ Тиимэһээл таанар хуурмаг лүндэншэдые хэрэгүүдээрнь танихат.

Хуурмаг шабинар

²¹ «Дээдын Эзэн! Дээдын Эзэн!» гэжэ намда хэлэгшэ хүн бүхэн Бурханай хаан орондо орохогүй, зүгөөр тэнгэридэ байгша Эсэгымни эрхэ хүсэл бүтээдэг хүнүүд лэ тиийшээ орохо юм. ²² Зарга шүүбэрийн Үдэрэй болоходо, олон зон намда: «Дээдын Эзэн! Дээдын

Эзэн! Шинии алдар нэрэхээл бидэ номнодог хэмди. Баһа шинии алдар нэрээр бидэ ада шүдхэрнүүдые намнажа гаргадаг хэмди, шинии алдар нэрээр гайхамшагтай хэрэгүүдые бүтээдэг хэмди», – гэжэ хэлэхэл. ²³Одоо тиихэдэнь би: «Би хэзээшье таанадые мэдэдэг байгаагүйб. Холо бологты намһаа, нүгэлтэ зон», – гэжэ харюусахалби.

Хоёр барилгашан тухай

²⁴Минии хэлэһэн энэ хургаалые шагнажа, бээлүүлдэг алишые хүниие би шулуун хуури дээрэ гэрээ барихан, бодомжотой сэсэн хүнтэй адлишаахаб. ²⁵Аадар бороо адхараад, уһа мүрэнүүд үерлөө, шанга халхин буужа, тэрэ гэр руу шуумайгаа. Харин шулуун хуури дээрэ бодхоогдохон тэрэ гэр унажа хандарбагүй.

²⁶Харин минии энэ хургаал шагнаад, бээлүүлдэггүй хүн бүхэн элһэн дээрэ гэрээ барихан бодомжолгүй тэнэг хүнтэй адли юм. ²⁷Аадар бороо адхараад, уһа мүрэнүүд үерлөө, шанга халхин буугаад, үнөөхи гэр дайраа. Тиихэдэнь тэрэ гэр аймшагтайгаар хандаран унаа.

Иисусай эрхэ засаг тухай

²⁸Иисусай иигэжэ хургажа дүүргэхэдэ, үй түмэн зон тэрэнэй хургаалда гайхажа байба. ²⁹Юундэб гэбэл, Иисус Хуули заадаг багшанарта, фарисейнүүдтэ адляар бэшэ, харин эрхэ засаг баригшада адляар улад зониие хургажа байгаа.

Иисус үбиэн хүниие эдэгээбэ

8 ¹Хада дээрэхээ Иисусай буухадань, тэрэнэй хойноһоо олон зон дахажа ябаба. ²Гэнтэ хэлхэ бузар үбшэнтэй нэгэ хүн ойртоод, Иисусай хүлдэнь мүргэжэ:

«Дээдын Эзэн, аа! Хэрбээ ши хүсэбэл, намайе арюудхан эдэгээжэ шадахаш», – гэбэ.

³Иисус гараа харбайжа, тэрэ хүндэ хүрөөд абаха зуураа:

«Эдэгээхэ хүсэлтэйб, арюун больш даа», – гэбэ. Тиихэдэнь тэрэ хүн хэлхэ бузар үбшэнһөө дары арюудхагдан эдэгэбэ. ⁴Иисус тэрэ хүндэ:

«Энээн тухай ши хэндэшые бү хэлэ. Зүгөөр санаартада ошожо, бэээ үзүүлэ. Тиигээд эдэгэһэнээ бултанда гэршэлхын тула ши Моисейн зарлигай ёһоор үргэл хээрэй», – гэбэ.

Иисус зуунай даргын зарасые эдэгээбэ

⁵ Иисусай Капернаум хото орожо байхадань, зуунай нэгэ дарга тэрээндэ ойртожо, туһалхыень гуйба:

⁶ «Эзэн, аа! Минии зараса саа үбшэндэ даруулаад, гэртээ тулижа хэбтэнэ», – гэбэ.

⁷ «Зай, би ошоод, тэрээниешни эдэгээхэб», – гэжэ Иисус харюусаба. ⁸ Тиэхэдэнь зуунай дарга иигэжэ харюусаба:

«Ай, эзэн! Шамайе гэртээ урижа оруулхаар бэшэ хүн гээшэлби даа. Ганса зарлигаа буулгыш даа, тиигэбэлшни зарасамни эдэгэ-жэрхихэ. ⁹ Ушарынь хэлэбэл, бишье баһал дээрээ ноёдтой, мүн мэдэлдээ сэрэгшэдтэй хүнби. Тэдэнэйнгээ нэгэндэнь: „Ошо“ гэхэдэм ошодог, нүгөөдэдэнь: „Ерэ“ гэхэдэм ерэдэг, зарасадаа: „Тэрээниие хэ“ гэхэдэм хэдэг юм».

¹⁰ Иисус энэниие дуулаад, ехээр гайхаба, тиигээд хойноһоонь ябаһан зондо:

«Би израильшуудайшье дунда иимэ хүзэг этигэлтэй хүниие үзөө-гүйб гэжэ тааналта үнэниие хэлэнэб», – гэбэ. ¹¹ «Тэрээнһээ гадна зүүн, баруун зүгһөө олон зон ерэжэ, Огторгойн хаан орондо Абра-һамтай, Исаагтай, Яковтай зэргэлээд найрай шэрээдэ һууха. ¹² Харин хаан орондо орохо ёһотой байгаад, орохоёо дурлаагүй хү-нүүд харанхы бүрэнхыдэ хаягдаад, уйлаха бархиралдаха, шүдөө хабиралдаха».

¹³ Тиигээд Иисус зуунай даргада:

«Ши гэртээ хари, шинии этигэдэгэй ёһоор лэ болохо», – гэжэ хэлэбэ. Тиигэжэ хэлэхэтэйнь сасуу зуунай даргын зараса эдэгэшэ-һэн байгаа.

Иисус олон зониие эдэгээбэ

¹⁴ Иисус Пётрой гэртэ ороод, тэрэнэй хадам эхын халуунтай үб-шэн хэбтэхые хараба. ¹⁵ Эхэнэрэй гарта халта хүрөөд абахадань, халууниинь буураба. Тиигээд Пётрой хадам эхэнь хэбтэриһээ бодо-жо, айлшанаа хүндэлбэ.

¹⁶ Үдэшэ болоходо, ада шүдхэртэ барюулан олон хүнүүдые тэ-рээндэ асарба. Иисус ганса үгөөр ада шүдхэрнүүдые намнажа гар-габа, хамаг үбшэн зониие эдэгээбэ. ¹⁷ «Манай ядарал тэрэ өөр дээрээ үргэлжэ, үбшэ хабшыемнай абажа ябаа», – гээд Исаяя лүн-дэншын хэлэһэниинь бүтэбэ даа.

Иисустай хамта ябахая ханахан хүнүүд тухай

¹⁸ Иисус хажуудань олон зоной сугларшаһые харахадаа, далайн нүгөө бээдэ тамаржа ошохыень шабинартаа захирба. ¹⁹ Нэгэ Хуули заадаг багша Иисуста дүтэлөөд:

«Багша! Шинии хаанашье ошоо хаа, би халангүй дахаад ябахаб», – гэбэ.

²⁰ Тиихэдэнь Иисус тэрээндэ:

«Араата үнэгэн орохо нүхэтэй, тэнгэрийн шубуун хонохо уургайтай юм, харин Хүн түрэлхитэнэй Хүбүүн толгойгоо табижа амарха газаргүйл», – гэжэ хэлэбэ.

²¹ Иисусай ондоо нэгэ шабинь тэрээндэ: «Дээдын Эзэн, аа! Түрүүшээр гэртээ харижа, эсэгээ хүдөөлүүлээд ерэхыемни табиш даа», – гэбэ.

²² Тээд Иисус тэрээндэ: «Намтай яба. Үхэхэн хүнүүд өөһэдөө үхөөшэдөө хүдөөлүүлэг лэ», – гэжэ харюусаба.

Иисус халхи номгоруулна

²³ Тэндэхээ хүдэлэн Иисус онгосодо һууба, шабинаныньше хойноһоонь орожо һуулсаба. ²⁴ Гэнтэ далай ехээр долгилжо, долгинууд онгосыень хушан, шэнгээн алдаба. Тэрэ үедэ Иисус унтаж байгаа.

²⁵ Шабинанынь хажуудань ерээд хэрэжэ:

«Ай, багша! Маниие абарыш, хосорхомнайл», – гэлдэбэ. ²⁶ «Таанад юундэ иитэрээ айгаабта? Һүзэг этигэлээр хомор байнат даа», – гэжэ Иисус тэдэндээ хэлэбэ. Удаань хүл дээрээ бодожо, дошхон халхинда, нуурай долгинуудта зогсохыень захирба. Тиихэдэнь оршон тойрон огто аалин намдуу болошобо.

²⁷ Онгосо соо байһан улад гайхалдажа:

«Халхишье, далайшье мэдэлдээ оруулаад байдаг энэ хэн гээшэб?» – гэлдэбэ.

Иисус ада шүдхэртэ барюулһан хоёр хүниие эдэгээбэ

²⁸ Далайн нүгөө бээдэ оршодог Гадара хотын шадар тамаржа ерээд, замаар ябатарнь, ада шүдхэртэ барюулһан хоёр хүн үхэхэн хүнүүдые хүдөөлүүлдэг агы нүхэн соһоо гаража, Иисуста ойртобо. Тэдэ хоёрой ехэл галзуу гайтай хадань тэрэ харгыгаар хэншье ябахая зүрхэлдэггүй бэлэй. ²⁹ Тиигээд тэдэ галзуу амитад:

«Ай, Бурханай Хүбүүн, ши маанадтай юу хэхэ ханаатайбши? Ши маниее сагнаа урид хэхээхээ иишэ ерэбэ гүш?» – гэжэ хашхаралдаба.

³⁰ Тэндэһээ холохон хүрэг ехэ гахайнууд бэлшэжэ байба. ³¹ «Хэрбээ маниее эндэһээ намнажа гаргаха гээ наа, тэрэ гахайн хүрэгтэ ошохыемнай зүбшөөгыш», – гэжэ тэдэ ада шүдхэрнүүд Иисусые гуйба.

³² «Ошогты», – гэжэ Иисусай хэлэхэдэнь, ада шүдхэрнүүд үнөөхи хоёрой бөөһөөнь гараад, гахайн хүрэгтэ оробо. Тиихэдэнь бүхы гахайн хүрэг хабсагайн хүбөөһөө далай уруу хүрэжэ үхэбэ.

³³ Гахай манаашад тэндэһээ гүйлдэжэ, хото ороод, ушархан бүхы юумэн тухай, мүн ада шүдхэртэ барюулхан хүнүүдтэй юу тохёолдон тухай хөөрөбэ. ³⁴ Тиихэдэнь хотын хамаг зон Иисусые угтахаяа гараба. Тэрэниие хараад, нютагнаань гаража ошохыень гуйба.

Иисус саа үбшэнтэй хүниие эдэгээбэ

9 ¹ Тиигээд Иисус онгосодо хуугаад, һөөргөө ажаһуудаг хото руугаа тамаржа ерэбэ. ² Хэдэн хүн тэрээндэ саа үбшэндэ дайруулан нэгэ хүниие шэрдэгтэйн тэлээд асарба. Иисус тэдэ зоной аргагүй ехэ этигэл хүзэгтэй байхые хараад, саа үбшэнтэндэ хандан: «Ши, хүбүүн, зоригоо бү алда! Нүгэлнүүдшни хүлисэгдэбэ», – гэжэ хэлэбэ.

³ Тиихэдэнь Хуули заадаг зарим багшанар: «Энэшни Бурханиее доромжолжо байнал», – гээд досоогоо ханаба. ⁴ Тэдэнэй ханал бодол мэдэжэ байһан Иисус хэлэбэ: «Таанар юундэ иимэ харата ханал сэдхэлдээ бодобот? ⁵ „Нүгэлнүүдшни хүлисэгдэбэ“ гэхэдэ гү, али „бодоод яба“ гэжэ хэлэхэдэ бэлэн гү? ⁶ Хүн түрэлхитэнэй Хүбүүнэй газар дэлхэй дээрэ нүгэл шэбэлнүүдые хүлисэхэ эрхэтэй байһые таанарай мэдэжэ байхын тула би таанадта баталжа харуулахаб». Тиигээд Иисус үбшэн хүндэ: «Хүл дээрээ бодоод, дэбисхэрээ абажа, гэртээ хари», – гэжэ хэлэбэ. ⁷ Тиихэдэнь үнөөхи хүн бодоод, гэртээ ябаба. ⁸ Улад зон энээниие хараад айн хүрдэбэ, хүн түрэлхитэндэ иимэ ехэ эрхэ засаг хайрлаһанайнь түлөө Бурханиее магтан алдаршуулба.

Иисус Матвейе шэлэжэ абаба

⁹ Тэндэһээ саашаа ябажа ябатараа, Иисус Матвей гэдэг алба тагшын татабари суглуулдаг газартаа хуухые хараад: «Хойноһоомни яба», – гэжэ хэлэбэ. Тиихэдэнь Матвей бодоод, хойноһоонь ябаба.

¹⁰ Хожомын Иисусай шабинартайгаа хамта Матвейндэ хоол барижа байхадань, алба татагшад, нүгэл хэгшэд олоороо ерэжэ, тэдэнээр хамта хоол бариба. ¹¹ Зарим фарисейнүүд энээниие хараад, Иисусай шабинарта: «Юундэ танай багша алба татагшадтай, нүгэл хэгшэдтэй хамта эдинэ ууна гээшэб?» – гэбэ.

¹² Иисус тэдэнэй хэлэһые дуулаад, иигэжэ харюусаба: «Элүүр уладта эмшэн хэрэггүй, харин үбшэн хүнүүдтэ хэрэгтэй юм. ¹³ Таанад ошожо, „Намда тахил тахихын орондо бусад зондо үршөөл хайратай байхыетнай хүсэнэб“ гэжэ Нангин Бэшэг соо хэлэгдэһэн үгын удха мэдэжэ абагты. Би үнэн сэдхэлтэниие бэшэ, харин нүгэл хэгшэдые дуудахаяа ерээ хүнби».

Масаглаха тухай асуудал

¹⁴ Иоаннай шабинарын Иисуста ерээд: «Юундэ бидэнэр, мүн фарисейнүүд байгаад лэ масаглажа байдагбибди, харин шинии шабинар огто масагладаггүйб?» – гэжэ һураба.

¹⁵ Тиихэдэнь Иисус тэдэндэ иигэжэ харюусаба:

«Түрэ хуримай айлшад хүрьгэн хүбүүнтэйгээ хамта байха сагтаа гуниглаха аал? Үгыл даа! Зүгөөр хүрьгэн хүбүүниие тэдэнһээ абаад ябаха үдэрэй ерэхэдэнь, тэдэ айлшад масаглахал.

¹⁶ Хэншые хуушан хубсаһанда шэнэ бүдөөр халааһа табидаггүй бшуу. Тиигэбэлнь шэнэ табиһан халааһан хуушан хубсаһые удара татажа, хахархайень улам ехэ болгохол. ¹⁷ Мүн баһа һая нэрэһэн архия хуушан туламда хэдэггүйл. Тиигээ һаа, арһан тулам хахараад, архинь адхархал, арһан тулам хэрэгһээ гарахал. Теэд һая нэрэһэн архия шэнэ арһан туламда хэхэдэ, алининшые бүтэн зандаа байхал».

Һаһа бараһан басаган ба үбшэн эхэнэр тухай

¹⁸ Тиигэжэ хэлэжэ байтарнь, нэгэ дарга ерээд, Иисусай хүлдэ мүргэжэ: «Басагамни һаяхан һаһа барашабал. Манда ерэжэ, тэрээн-дэмни гараараа хүрөө һаашни, басагамни амидырхал», – гэбэ.

¹⁹ Тиихэдэнь Иисус шабинартайгаа бодоод, тэрэ хүнтэй хамта ябаба.

²⁰ Арбан хоёр жэл соо шуһа гоожоод тогтодоггүй үбшэнгөөр зобожо байһан нэгэ эхэнэр Иисуста хойноһоонь ойртоод, хубсаһандань халта гараараа хүрэбэ. ²¹ Юундэ тиигээб гэхэдэ, „Хубсаһандань халта хүрөөд абаал һаа, эдэгэхэб“ гэжэ тэрэ эхэнэр досоогоо этигэжэ байгаа бшуу.

²² Иисус эрьежэ, тэрэ эхэнэрые хараад: «Басаган, ши зоригтой бай! Этигэлшни шамайе абараа», – гэбэ. Тэрэ дороо эхэнэр эдэгэшэбэ.

²³ Даргын гэртэ ороод, Иисус наһа барагшые шаналха хүгжэмшэдэй болон улад зоной бахардан үймэлдэжэ байхые хараба. ²⁴ «Эндэһээ гарагты. Энэ балшар басаган үхөөгүй, миил унтажа байна хая юм», – гэхэдэнь, Иисусые улад зон наада барин энеэлдэбэ. ²⁵ Улад зоной газашаа гарахадань, Иисус басаганай хэбтэһэн таһалгада орожо, гарһаань баряад, бодоходонь туһалба. ²⁶ Энэ ушар тухай хураг суу тэрэ орон дайдаар хаа хаанагүй тараба.

Иисус хоёр хохор хүниие эмшэлбэ

²⁷ Иисусай тэндэһээ ябажа ябаханда, хойноһоонь хоёр хохор хүн дахажа: «Давидай үри наһанан, Иисус, маниие үршөөжэ хайрлыш!» – гэжэ хашхаралдаба.

²⁸ Тиигээд Иисусай гэртэ ороходонь, үнөөхи хоёр хүн тэрээндэ дүтэлбэ. Иисус тэдэнһээ: «Таанарые элүүр мэндэ болгохо аргатай байһандамни этигэнэ гүт?» – гэжэ хураба.

Тэдэнь: «Тиимэ даа, Дээдын Эзэн!» – гэжэ харюусаба.

²⁹ Тиигэхэдэнь Иисус тэдэ хоёрой нюдые гараараа хүрөөд: «Таанарай этигэнэһэй ёһоор лэ болог», – гэжэ хэлэбэ. ³⁰ Тиин тэдэ хоёрой нюдэниинь харадаг болошобо. Иисус тэдэ хоёрто: «Энээн тухай хэндэшые бү хэлэгты», – гэжэ һайнаар захиба.

³¹ Харин тэдэнь гэрһээ гараад лэ, Иисус тухай хураг бүхы тэндэхи орон дайдаар тарааба.

Иисус хэлэ амагүй хүниие эдэгээбэ

³² Тэдэ хоёрой гаража байха үедэ ада шүдхэртэ барюулһан хэлэ амагүй нэгэ хүниие Иисуста асарба. ³³ Ада шүдхэрыень гаргаһан хойнонь, хэлэ амагүй хүн юумэ хэлэдэг болобо. Улад зон гайхалдажа: «Израильда иимэ мэтын юумэн хэзээшые үзэгдөөгүйл», – гэлсэбэ. ³⁴ Харин фарисейнүүд: «Энэшни ада шүдхэрнүүдэй ноёной хүсөөр лэ ада шүдхэрнүүдые дарана», – гэбэ.

Иисус сугларһан уладые хайрлаба

³⁵ Иисус бүхы хото турануудаар, хүдөө нютагуудаар ябажа, мүргэлэй гэрнүүдтэ хүнүүдые хургаба, Бурханай хаан түрэ тухай һайн мэдээсэл номнобо, ямаршые үбшэ хабшатай, гай ядаралтай зониие аргалан эдэгээбэ. ³⁶ Олон мянган зониие харахадаа, Иисус тэдэниие

хайрлаба. Тэдэ зон ядаршанан, эндэ тэндэ тарашанан хонишонгүй хонидтол мэтэ байгаа бшуу. ³⁷Тиимэхээ Иисус шабинартаа иигэжэ хэлэбэ: «Ургаса ехэ байна, тээд тэрэниие суглуулха хүнүүдынь үсөөн лэ. ³⁸Тиимэхээ ургасаяа суглуулха хүдэлмэрилэгшэдые ябуулхыень Ургасын Эзэндэ зальбарэгты».

Иисус арбан хоёр элиэнэрээ шэлэжэ абаба

10 ¹Иисус өөрынгөө арбан хоёр шабинарые дуудаад, ада шүдхэрнүүдые намнажа гаргаха, ямаршые үбшэн хабшанһаа, ядаралһаа хүнүүдые эдэгээхэ эрхэ тэдээндээ үгэбэ. ²Арбан хоёр элшэнэрэйнэ нэрэнүүд иимэ: түрүүшынхинь Пётр гэжэ нэрлүүлһэн Симон, тиигээд тэрэнэй дүү Андрей, Яков ба Иоанн гэдэг Зэбэдэйн хоёр хүбүүд, ³Филипп Варфоломей хоёр, Фома ба алба татагша Матвей, Алфейн Яков, Фаддей гэжэ нэрлүүлһэн Леввей, ⁴Патриот бүлгэмэй гэшүүн Симон, мүн хожомын Иисуста урбаһан Иуда Искариот гэгшэд болоно.

Арбан хоёр элиэнэрэй зорилго тухай

⁵Эдэ арбан хоёр шабинараа эльгээхэдээ, Иисус тэдээндээ иигэжэ захиба: «Бусад арадуудта бү ошогты, самаряан хотонуудаар бү орогты. ⁶Гансал Израилиин арадта ошогты, тэдэ төөригдэһэн хүрэг хонидто адли бшуу. ⁷Таанар ошожо, Огторгойн хаан түрын мандахань ойртоо гэжэ номногты. ⁸Үбшэн хүнүүдые эдэгээгты, үхэһэн хүнүүдые амидыруулагты, хэлхэ бузар үбшэнтэниие арюудхагты, ада шүдхэрнүүдые намнажа гаргагты. Таанад түлөөһөгүй абаһанаа түлөөһөгүй үгэжэ байгты. ⁹Өөһэдтөө алта, мүнгэшые, зэд садшые абажа бү гарагты. ¹⁰Харгыда туулмаг сүүмхэшые, хэлгэхэ хубсаһашые, гуталшые, тулга таягшые бү абагты. Юундэб гэхэдэ, хүдэлмэрилэгшые хэрэгтэй юумээрнь хангаха зэргэтэй юм. ¹¹Ямаршые хотодо, хүдөө нютагта ороходоо, таанадые гэртээ байлгаха дуратай зохид хайн хүниие оложо, тэрэнэйдэ зогсогты, тиигээд тэрэ нютагһаа гаража ошотороо тэндээл байгты. ¹²Гэртэ ороходоо: „Амгалан мэндэ нуухатнай болтогой“, – гэжэ амаршалжа байгты. ¹³Хэрбээ тэрэ айлай таанадые угтажа абабал, танай хүсэһэн амгалан тайбантнай тэрэ гэртэ тогтожо үлдэг лэ. Хэрбээ тэрэ айлай таанадые угтажа абахагүй байбалнь, амгалан тайбаниие хүсэһэн үрээлтнай таанадтаа бусаг. ¹⁴Ямар нэгэн айлай гү, али хотынхидой таанадые угтажа абаха дурагүй һаань, үгы һаа таанадай хэлэһые шагнаха дурагүй

наань, тэрэ гэрһээ гү, али хотоһоо гаража ошогты, хүлдэтнай халдаһан тооһыень һэжэржэ өөһэдтэнь орхигты. ¹⁵ Зарга шүүбэрийн Үдэрэй болоходо тэрэ хотын зоние Бурхан Содом, Гоморро хотынхидһоо бүри үлүү аймшагтай хэһээлтэдэ хүртөөхэ гэжэ таанарта үнэниие хэлэнэб.

Хашалга зоболонгууд тухай һэргылнэ

¹⁶ Шонын хүрэгтэ хонидые тууһан мэтээр би таанадые эльгээнэб. Тиимэһээ таанар могой мэтэ эсэн, гулабхаа мэтэ эгээлэй даруу байгты. ¹⁷ Таанадые зарга шүүбэрийн газарта абаашажа тушааха гү, али үгы һаа мүргэлэй гэрнүүд соо сохихо наншаха хүнүүдһээ бээ һэргылжэ ябагты. ¹⁸ Минии түлөө таанарые захирагшадай, мүн хаашуулай урда байлгабал, тэдэндэ, мүн бусад арадуудта нам тухай хэлэхэт. ¹⁹ Таниие барижа тушаахадань, юу хэлэхэ, яажа хэлэхэ тухайгаа һанаагаа бү зобооройгты. Тэрэ сагтаа хэлэхэ үгэнүүдтнай таанадта үршөөгдэхэ. ²⁰ Тиихэдэ, таанар өөһэдөө хэлэхэгүйт, харин танай Эсэгийн Һүлдэ танаар хэлүүлхэ.

²¹ Аха дүүнэр бэе бээе, эсэгэнь хүбүүгээ үхэлдэ үгэхэ; баһа үхибүүдынь эхэ эсэгынгээ урдаһаа үһөөрхэн бодожо, тэдэнээ алаха. ²² Минии түлөө таанадые булта үзэн ядаха; зүгөөр эсэстэнь хүрэтэр тэсэжэ гараһаниинь абарагдаха. ²³ Таанарые нэгэ хотодо хашажа мүрдэбэлнь, ондоо хото руу зугадажа ошогты. Ушарынь хэлэбэл, Израилиин бүхы хотонуудаар таанарай ябажа үрдегүй байтар Хүн түрэлхитэнэй Хүбүүн заларжа ерэхэ гэжэ би таанадта баталан хэлэнэб.

²⁴ Шабинь өөрынгөө багшаһаа дээгүүр байхагүй, мүн барлагынь өөрынгөө эзэнһээ дээгүүр байхагүй. ²⁵ Шабинь багшынгаа зэргэ болобол, барлагынь эзэнэйгээ зэргэ болобол, болохо даа. Хэрбээ гэрэй эзэниие Веельзевул гэжэ шолмосой нэрээр нэрлэбэл, тэрэнэй гэртэхиние бүришые муухайгаар нэрлэхэ бэшэ гү?

Хэнһээ айха хэрэгтэйб?

²⁶ Тиин тэдэ зонһоо бү айгты: эли болохогүй ямаршые далда юумэн байдаггүй, мэдээжэ болохогүй нюуса юумэн байдаггүй.

²⁷ Харанхыда таанарта хэлэһыемни гэрэлтэйдэ дабтажа хэлэхэ ёһотойт. Шэхэндэтнай шэбэнэжэ хэлэһыемни гэрэй оройһоо айладхаха ёһотойт. ²⁸ Хүнэй бэе хүнөөгөөд, хүнэһыень хүнөөхэ хүсэ шадалгүй хүнүүдһээ бү айгты, зүгөөр хүнэй хүнэһыеньшые, бэеһыеньшые гал тамада хаяжа хүнөөхэ аргатай Бурханһаал айжа хүрдэжэ

ябагты. ²⁹ Хоёр борбилоо хашарна мүнгөөр худалдадаг. Гэбэшье нэгэшье бишыхан борбилоо Бурханай зүбшөөлгүйгөөр газарта унахагүйл. ³⁰ Харин таанадые абажа үзэбэл, толгойнтнай үхэншье хүрэтэрөө тоолоотой бшуу. ³¹ Тиимэхээ бү айгты: таанар олон борбилоонууднаа үнэтэй сэнтэйт.

*Бурханай табисууртые угтажа абаха,
тэрээнхээ арсаха тухай*

³² Улад зоной урда минии мэдэлдэ байнаб гэжэ айладхаһан хүн бүхэниие бишье Огторгойдо оршодог Эсэгынгээ урда минии гэжэ гэршэлхэб. ³³ Харин улад зоной урда намһаа арсаһан хүн бүхэнһөө бишье Огторгойдо оршодог Эсэгынгээ урда арсахалби.

Амгалан байдал бэшэ, харин хэлмэ асарааб

³⁴ Газар дэлхэй дээрэ амгалан байдал тогтоохоёо ерээ гэжэ нам тухай бү һанагты. Би амгалан байдал бэшэ, харин хэлмэ абажа ерээб. ³⁵ Би хүбүүдые эсэгэнэрэйнъ урдаһаа, басагадые эжынэрэйнъ урдаһаа, бэридые хадам эхэнэрэйнъ урдаһаа бодхоохоёо ерээб. ³⁶ Нэгэ гэрэй гэшүүд хоорондоо харша дайсад байха. ³⁷ Эсэгэдээ гү, али эхэдээ намһаа үлүү ехээр дуратай байһан алишье хүн минии шабиин зэргэдэ хүртэхэ эрхэгүй. Мүн баһа хүбүүндээ гү, али басагандаа намһаа үлүү ехээр дуратай алишье хүн минии шабиин зэргэдэ хүртэхэ эрхэгүй. ³⁸ Өөрынгөө хэрээһэ абаад, минии хойноһоо дахаагүй хүн минии шабиин нэрэ зэргэдэ хүртэхэгүй. ³⁹ Ами наһаяа гамнагша тэрэнээ алдаха, харин ами наһаяа минии түлөө үгэһэн хүн тэрэнээ алмаха.

Шагнал

⁴⁰ Таанарые угтажа абаһан хүн намайе угтажа абана. Намайе угтажа абаһан хүн намайе эльгээһэн Эсэгые угтажа абана. ⁴¹ Лүндэншые лүндэншэ байһанайнь түлөө угтажа абаһан хүн тэрэ лүндэншэтэй адли шагналда хүртэхэ. Баһа үнэн сэдхэлтэниие үнэн сэдхэлтэй байһан хадань угтажа абаһан хүн тэрэ үнэн сэдхэлтэнтэй адли шагналда хүртэхэ. ⁴² Баһа хамагай бага шабидамни гансал шабимни байһанайнь түлөө аяга хүйтэн уһа үгэһэн хүн өөрынгөө шагнал заабол абаха гэжэ би таанадта баталан хэлэнэб».

Уһаар арюудхагша Иоанн

11 ¹Арбан хоёр шабинартаа эдэ заабаринуудые үгэһэн хойноо Иисус тэрэ газарһаа хүдэлжэ, улад зониие хото турануудаар ябажа һургаба.

²Түрмэдэ хаалтатай Уһаар арюудхагша Иоанн Христосой бүтээжэ байһан хэрэгүүд тухай дуулаад, хоёр шабинараа ³иигэжэ асуухыень тэрээндэ эльгээбэ:

«Ерэхэ ёһотойнь ши гээшэ гүш, али бидэ ондооо хүлээхэ ёһотой гүбди?»

⁴⁻⁵Тиихэдэнь Иисус тэдэндэ иигэжэ харюусаба:

«Үөхөр хүнүүдэй дахин харадаг болоһые, дохолон хүнүүдэй ябадаг болоһые, арһанай халдабарита үбшэнтэй хүнүүдэй арюудхагдаһые, дүлии хүнүүдэй һонор болоһые, үхэһэн хүнүүдэй үндын бодоһые, үгытэй хүнүүдэй Бурханай хаан түрэ тухай номнол дуулаһые, хаража байһанаа, мүн дуулажа байһанаа Иоаннда ошожо хэлэгты. ⁶Нам тухай һэжэг түрөөгүй хүн зол жаргалтай даа».

⁷Иоаннай шабинарай ябахадань, Иисус Иоанн тухай улад зондо иигэжэ хэлэбэ:

«Иоаннда сүл губи руу ошоходоо, ямархан юумэ харахаяа найдаабта? Һалхинда найгалзажа байһан хулһа харахаяа гү? ⁸Таанар юу үзэхэеэ тишэ ошообта? Зөөлэн хубсаһа үмдөөд ябаһан хүниие гү? Теэд зөөлэн хубсаһа үмдөөд ябадаг хүнүүд хаанай үргөөдэ ажаһуунал. ⁹Таанар юу үзэхэеэ тишэ ошообта? Лүндэншые гү? Тиимэ даа, тиихэдэ таанад лүндэншэһөө дээгүүр хүниие хараалта гэжэ таанарта хэлэнэб. ¹⁰Иоанн тухай Нангин Бэшэг соо: „Шинии ябаха харгы бэлдэхыень би түрүүндэшни өөрынгөө Эльгээмэлые ябуулнаб гэжэ Бурхан хэлэнэ“, – гээд бэшээтэй юм. ¹¹Уһаар арюудхагша Иоаннһаа агууехэ хүн эхын умайһаа түрөөгүй юм гэжэ баталан таанадта хэлэнэб. Тиимэшье һаа, Огторгойн хаан ороной мэдэлдэ һуугшадай эгээлэй багань тэрээнһээ агууехэ юм даа. ¹²Уһаар Арюудхагша Иоаннай мэдээсэлээ номноһон үдэрнүүдһээ эхилээд мүнөөдэр болотор Огторгойн хаан орон һүр хүсэ нэмэнэ, тиин хүсэ шадал гаргаһан зон энээниие туйлана. ¹³Иоаннай ажамидарха үе саг хүрэтэр юунэй болохо тухай лүндэншэдэй номууд соо болон Моисейн Хуули соо бүрин хэлэгдээтэй юм. ¹⁴Хэрбээ таанад тэдэ номуудта этигэжэ байбал, мэдэгты: Иоанн болбол ерэхэ ёһотой гэжэ уридшалан хэлэгдэһэн Илия гээшэ. ¹⁵Шэхэтэй юм һаа, анхарагты!

¹⁶ Мүнөө, энэ оршон үеын зоние хэнтэй жэшэхэбиб? Эдэнэр газаа нууһан үхибүүдтэ адли. Нэгэ бүлэгынь нүгөө бүлэгтөө иигэжэ хашхарна:

¹⁷ „*Таанарта жэмбүүрээр наадахадамнай, хатараагүйт. таанарта гунигтай дуу дуулахадамнай, бархираагүйт*“.

¹⁸ Иоаннай ерээд, масагладаг, архи дарһа амсадаггүй байхадань, хүн бүхэн: „Ада шүдхэртэ барюулһан хүн“ гэлсээ. ¹⁹ Хүн түрэлхитэнэй Хүбүүнэй ерээд, юумэ эдидэг, дарһа болгодог байхадань, хүн бүхэн: „Харагты даа! Энэтнай эдимэр, архиншан, алба татаашадай, нүгэл хэгшэдэй нүхэр“ гэлсэбэ. Тиигэбэшье Бурханай сэсэн мэргэниинь хэрэгүүдэйн үрэ дүнгөөр баталагдадаг юм».

Этигэл хүзэггүй хотонууд тухай

²⁰ Иисусай гайхамшагта хэрэгүүдээ үлэмжэ олоор бүтээһэн хотонуудта зоной нүгэл үйлэдэхээ болижо, Бурханда хандахагүйдэнь, Иисус тэдэниие зэмэлэн хэлэбэ:

²¹ «Хоразин хотынхид, таанад уй гашуудал үзэхэт! Бетсаида хотынхид, таанад баһал уй гашуудал үзэхэт! Хэрбээ танай хотонуудта бүтээһэн гайхамшагта хэрэгүүдээ Тир Сидон хотонуудта үзүүлһэн байбални, тэдэ хотын зон үни гэхээр Бурханда хандаха һэн. Тэдэнэр хахархай хубсаһа үмдэжэ, тархи дээрээ үнэнэ адхажа нүгэлнүүдээ гэмшэнэнэ баталха бэлэй. ²² Зарга шүүбэрийн Үдэрэй болоходо Бурхан Тир, Сидон хотынхидто таанадта ороходоо бүри үршөөл хайратайгаар хандаха гэжэ баталан хэлэнэб. ²³ Капернаум хотынхид, таанад огторгойдо алдаршаха ханаатай байна гүт? Таанад тамын оёорто унахат. Хэрбээ танай хотодо бүтээһэн гайхамшагта хэрэгүүдээ Содомдо харуулһан байбални, тэрэ хотынхид гэмээ наманшалаад, хотонь мүнөөшье хүрэтэр бүтэн байха бэлэй. ²⁴ Зарга шүүбэрийн Үдэрэй болоходо, Бурхан Содом хотынхидто таанадта ороходоо үлүү үршөөл хайратайгаар хандаха гэжэ танда баталан хэлэнэб».

Намда ерэжэ, ханаагаа амарагты

²⁵ Баһа тэрэ сагта Иисус иигэжэ хэлэбэ:

«Газар тэнгэрийн Дээдын Эзэн, Эсэгэмни! Сэсэн мэргэн, эрдэм номтой зонһоо далдалан нууһан юумээ эгээлэй юрын зондо нээжэ элирүүлһэнэйшни түлөө шамда баяр баясхалан хүргэнэб. ²⁶ Зүб

даа, Эсэгэмни! Ши иимэл юумэнэй болохые хүсэжэ байгаа ха юмши. ²⁷ Бүхы юумые Эсэгэмни намда үгөө. Эсэгэһээ ондоо хэншые Хүбүүе мэдэхэгүй, мүн Хүбүүнһээ, баһа Хүбүүнэй дуулгаһан хүнүүдһээ ондоо хэншые Эсэгые мэдэхэгүй.

²⁸ Хүшэр хүндэ ашаанда даруулжа ядарһан зон булта намда ерэгты, би танай ханаа амаруулахб. ²⁹ Минии хазаар абажа өөһэдыгөө хазаарлагты, намһаа нуража абагты, ушарынь юуб гэбэл, би даруу, номгон сэдхэлтэйб, тиин таанад ханаагаа амархат. ³⁰ Минии таанадта үгэхэ хазаар хашар бэшэ юм даа, таанадта ашаха ашаан хүнгэн юм даа».

Субботын үдэр тухай асуудал

12 ¹ Нэгэ Субботын үдэр Иисус шабинартайгаа таряалангаар ябаба. Шабинарынь гэдэһэ үлдөөд ябаһан дээрэһээ таряанай залаа таһалан эдижэ байгаа. ² Фарисейнүүд энээниие хараад: «Харалши даа, шабинаршни субботодо хэжэ болохогүй юумэ хэнэл», – гэжэ Иисуста хэлэбэ.

³ Тиихэдэнь Иисус тэдэндэ иигэжэ харюусаба: «Давидай, мүн тэрээнтэй хамта ябагшадай гэдэһэ ехээр үлдэхэдөө юу хэһэн тухайнь таанар уншаагүй юм аалта? ⁴ Давид Бурханай гэртэ ороод, хамта ябаһан хүнүүдтэйгээ үргэлэй хилээмэ абажа эдэе хэн. Харин Хуулиин ёһоор Давидшые, тэрээнтэй хамта ябалсагшадшые тэрэ хилээмэ эдихэ ёһогүй байгаа, гансал санаартан тэрэниие эдихэ эрхэтэй бэлэй. ⁵ Мүн суббото бүхэндэ Бурхан Һүмэ соо алба хэжэ байһан санаартан Субботын үдэрэй тогтоол эбдэнэ гэжэ Моисейн Хуули соо хэлэгдэһые таанар уншаагүй аалта? Тиигэһэншые мүртөө тэдэнэр зэмэгүй гэшэ гү? ⁶ Зүгөөр Бурхан Һүмэдэ ороходоо агууехэ юумэн эндэ байна гэжэ танда хэлэнэб. ⁷ Хэрбээ таанар: „Намда тахил тахихын орондо бусад зондо үршөөл хайратай байхыетнай хүсэһэнэб“ гэжэ Нангин Бэшэг соо хэлэгдэһэн үгын үнэн удха мэдэжэ байбал, зэмэгүй зониие буруушаахагүй хэнта. ⁸ Ушарынь хэлэбэл, Хүн түрэлхитэнэй Хүбүүн субботыншые Эзэн мүн».

Хатаһан гартай хүн тухай

⁹ Иисус тэндэһээ ябажа, мүргэлэй гэртэ оробо. ¹⁰ Тэндэнь нэгэ хатаһан гартай хүн байба. Буруу юумэ хэһэнэһын түлөө Иисусые зэмэлхэ ханаатайшуул тэрээнһээ: «Субботодо хүниие эмшэлхэнэ зүб гү?» – гэжэ нураба.

¹¹ Иисус тэдэндэ иигэжэ харюусаба: «Танай хэнтнай нэгэ хонитой аад, тэрэнэйнгээ Субботын үдэр гүнзэгы нүхэ уруу унашабалынь, тэрэнээ барижа, дээшэнь татажа гаргахагүйб? ¹² Тиихэдэ хүн гээшэмнай хониндо ороходоо бүри үнэ сэнтэй юм. Тиимэхээ Субботын үдэр хайн юумэ бүтээхэнь зүб даа». ¹³ Тиигээд Иисус нүгөө хатаһан гартай хүндэ: «Гараа харбай», – гэбэ. Тэрэнь гараа харбайба; тиин хатаһан гарынь нүгөө гартайгаа адли хайн болошобо. ¹⁴ Харин фарисейнүүд мүргэлэй гэрһээ гаража ошоод, Иисусые яжа алаха тухай зүбшэн хэлсэбэ.

Шэлэгдэжэ абтаһан Бурханай зараса

¹⁵ Зүгөөр Иисус тэдэнэй хэлсээн тухай мэдээд, тэндэхээ гаража ошообо. Хойноһоонь олон зон дахажа ябаба. Иисус үбшэн хабшантай байһан зоние бултыень эмшэлэн эдэгээгээд, ¹⁶ Бурханай таби суурта байһыемни нэгэшье хүндэ бү мэдүүлэгты гэжэ улад зондо захирба. ¹⁷ Иигэжэл лүндэншэ Исаягаар дамжуулан Бурханай найдуулһаниинь бүтэбэ даа:

- ¹⁸ *«Энэ болбол минии шэлэжэ абтаһан зараса,
сэдьхэлдэмни таатай инаг хайрата Хүбүүмни гээшэ.
Нангин Һүлдээ тэрэндэ хайрлахаб,
тэрэ бүхы арадуудта Зарга шүүбэри тухаймни айладхаха.*
- ¹⁹ *Тэрэ арсалдахагүй, хашхархагүй,
шанга гэшээр газаагуур хүрхирхэгүй,*
- ²⁰ *хухарһан хулһые таһа татахагүй,
залиржа байһан дэн унтараахагүй.
Үнэн зүб зарга шүүбэри илалтада хүргэхэ,*
- ²¹ *Тиин бүхы арадууд тэрэндэ найдажа байха».*

Иисус ба шолмос тухай

²² Нэгэтэ хүнүүд ада шүдхэртэ барюулан дээрэхээ һохор, хэлэ амагүй хүниие Иисуста асарба. Иисус тэрэ хүниие эдэгээбэ: тэрэ юумэ хэлэдэг, харадаг болобо. ²³ Тиихэдэнь хамаг зон гайхажа: «Энэмнай найдуулагдаһан Давидай үри һадаһан бэшэ гү?» – гэлсэбэ.

²⁴ Теэд фарисейнүүд энээниие дуулаад: «Энэшни Веельзевулай, ада шүдхэрнүүдэй ноёной хүсөөр лэ ада шүдхэрнүүдые дарана», – гэжэ хэлэбэ.

²⁵ Тэдэ фарисейнүүдэй һанал бодол мэдэжэ байһан Иисус тэдэндэ иигэжэ хэлэбэ: «Хэдэн бүлэг боложо хубааралдаад, хоорондоо

хөморолдоһон алишые хаан орон хооһорон, бутаран халаха. Баһа хоорондоо хубааралдажа хөморолдоһон алишые хото, үгы хаа гэр бүлэ мүн лэ бутаран халаха. ²⁶ Хэрбээ шолмосой хаан оронойхин хоорондоо хубааралдаад, хөморолдожо барисалдажа байбал, хаан орониинь хэр удаан тогтоборитой бүтэн байхаб? ²⁷ Хэрбээ би танай хэлэһэн ёһоор Веельзевулай хүсөөр ада шүдхэрнүүдые намнажа гаргадаг байгаа хаа, танай шабинар хэнэй хүсөөр тэдэниие намнажа гаргадаг гээшэб? Шабинарайтнай хэжэ байһан хэрэгүүд буруу байһыетнай баталха. ²⁸ Хэрбээ Бурханай Нангин Һүлдөөр ада шүдхэрнүүдые дарадаг хаамни, тэрэ Бурханай хаан түрын эндэтнай тогтоод байһые баталха. ²⁹ Ямар хүн бар хүсэтэй хүнэй гэртэ ороод, түрүүн эзэниинь хүлижэ уяагүй хаа, эд зөөриинь тоножо гаргахаб? Эзэниинь хүлиһэн хойноол гэр барааень дээрмэдэхэ бшуу.

³⁰ Минии талада байгаагүй хүн намда харша тэмсэгшэ гээшэ, намтай хамта ургаса суглуулаагүй хүн тэрэниие дэмы үринэ гээшэ. ³¹ Тиимэһээл би таанарта иигэжэ хэлэхэ байнаб: ямаршые харата үгэ хэлэһэн, али нүгэлтэ хэрэг үйлэдэһэн хүн бүхэн хүлисэгдэхэ; харин Нангин Һүлдые хараажа муушалһан хүн хүлисэгдэхэгүй. ³² Тиихэдэ Хүн түрэлхитэнэй Хүбүүндэ харша юумэ хэлэһэн хүн бүхэн хүлисэгдэхэ; харин Нангин Һүлдэдэ харша юумэ хэлэһэн хүн энэшые наһандаа, мүн хэтэ заяандаашые хүлисэгдэхэгүй.

Модон ба тэрэнэй үрэ жэмэс тухай

³³ Һайн модон Һайн үрэ жэмэс үгэдэг, муу модон муу үрэ жэмэс асардаг. Модоной шанарынь тэрэнэй үрэ жэмэсээрнь танигдадаг юм. ³⁴ Ай, хорото могойн түрэлтэн! Таанар хара һанаатайшуул аад, Һайн юумэ яажа хэлэхэбта? Ушарынь юуб гэбэл, зүрхэ сэдхэлдэ байһан юумэн хэлэнэй үзүүртэ гарадаг ха юм. ³⁵ Һайн хүн үнэтэ баялиг сооһоо Һайниинь гаргадаг, харин хара һанаатай хүн харата дорой суглуулбаринаа мууень гаргадаг. ³⁶ Зарга шүүбэрийн болохо Үдэр таанад хэзээшыеб дэмы шашаһан үгэ бүхэнэйнгөө түлөө тоосоо хэжэ харюусахат гэжэ таанарта баталан хэлэнэб. ³⁷ Тиигэжэ таанад өөһэдынгөө үгэнүүдһээ боложо зүбтэнэй тоодо гү, али үгы хаа буруутанан зэмэтэнэй тоодо орохот».

Гайхамшагта дүлгэ тэмдэг харуулха тухай эрилтэ табина

³⁸ Тиигээд зарим Хуули заадаг багшанар болон фарисейнүүд: «Багша аа! Манда нэгэ гайхамшагта дүлгэ тэмдэг үзүүлхыешни хүсэнэбди», – гэбэ.

³⁹ Тиэхэдэнь Иисус тэдэндэ харюусаба: «Харата муухай, забхай оршон үеын зон, гайхамшагта дүлгэ тэмдэг харахаяа ханаба гүт? Теэд Иона лүндэншэтэй ушархан гайхамшагта дүлгэ тэмдэгтээ ондоо дүлгэ тэмдэг таанадта үгтэхгүй. ⁴⁰ Яажа Иона халим загананай гэдэһэн дотор гурбан үдэр, гурбан хүни үнгэргөө һэм, тон тиигэжэл Хүн түрэлхитэнэй Хүбүүн гурбан үдэр, гурбан хүни соо газарай гүндэ оршохо. ⁴¹ Зарга шүүбэрийн Үдэрэй болоходо Ниневи хотынхид бодожо, таанадые буруушаан гэмнэхэ, юундэб гэбэл, тэдэнэр Ионын номнол шагнаад, нүгэлнүүдээ орхижо, Бурханда хандаһан юм. Харин мүнөө эндэ Ионоһоо бүри шухала нэгэн байна гэжэ таанадта хэлэнэб. ⁴² Зарга шүүбэрийн болохо Үдэр Урда зүгэй хатан бодожо, таанадые буруушаан гэмнэхэ. Тэрэ хатан Соломон хаанай сэсэн үгые шагнахаяа газарай мухарһаа ерэхэн байгаа бшуу. Теэд мүнөө эндэ Соломонһоо бүри шухала нэгэн байна.

Хорото ада шүдхэрэй бусажа ерэхэн тухай

⁴³ Хүнэй бэһээ гараһан ада шүдхэр уһагүй сүл губьяр тэнэжэ, амар заяа бэдэрээд, олохогүйдөө: ⁴⁴ „Байһан гэртээ бусахам даа“, – гэдэг. Бусажа ерэхэдэнь, гэрынэ эзэлэгдээгүй, хамагдаһан, сэбэрлэгдэһэн байдаг. ⁴⁵ Тиигээд тэрэ ада шүдхэр өөрһөөн хураггүй хоротой ондоо долоон ада шүдхэрые абажа ерэдэг. Тэдэнь үнөөхи гэртэнь орожо байрладаг. Тиигэхэдэнь тэрэ хүниинь урдынхидаа ороходоо бүри ехээр тамаа үзэдэг. Тон энээндэл адляар энэ оршон үеын зон иимэ дорой байдалтай болохо», – гэжэ Иисус хэлэбэ.

Иисусай эжы ба аха дүүнэрынэ

⁴⁶ Иисусай иимэ мэтээр улад зоние хургажа байха үдэнь тэрэнэй эжы, дүүнэрынэ тэрээнтээ хөөрэлдэхэ ханаатай ерээд, гэрэй газаа зогсожо байба. ⁴⁷ Тиимэхээ нэгэ хүн Иисуста: «Хара даа, эжышни, дүүнэршни газаа зогсожо байна. Шамтайгаа хөөрэлдэхэ ханаатай байна», – гэбэ.

⁴⁸ Иисус тэрэ хэлэхэн хүндэ: «Эжымни хэн бэ, аха дүүнэрни хэд бэ?» – гэжэ хэлэбэ. ⁴⁹ Тиигээд шабинар тээшээ гараараа заагаад, «Хара даа, эжымни, аха дүүнэрни эдэ гээшэ. ⁵⁰ Огторгойдэ оршодог Эсэгымни эрхэ хүсэл бүтээгшэд минии аха дүүнэр, эгэшэ дүүнэр, эжымни гээшэ», – гэбэ.

Таряашан тухай хургаалта үгэ

13 ¹ Иисус тэрэ үдэртөө гэрһээ гараад, далайн эрьедэ ошожо нууба. ² Хажуудань хара мянган зоной суглархада, Иисус онгосодо нууха болобо, тиихэдэнь улад зон бүгэдөөрөө далайн эрьедэ зогсобо. ³ Тэрэ хургаалта үгэнүүдые хөөрэн, улад зониие олон юумэндэ хургаба: «Нэгэ таряашан таряа тарихаяа гараба. ⁴ Үрэхээ сасахадань, зариманиинь харгын хажууда унаба, тэдэниинь шубууд ерэжэ тоншобо. ⁵ Зарим үрэхэниинь хүрһэ багатай, шулуутай газарта унаба, тиигээд нимгэн хүрһэтэй газарһаа түргэн бултайба. ⁶ Харин наранай гарахада, гүнзэгы үндэхэлээгүй зүлгэ ногоон уршыгаад хаташаба. ⁷ Баһа зарим үрэхэнүүд үүргэнэ соо унажа, хөөгтэ даруулагдаба. ⁸ Зарим үрэхэниинь үрэхэлтэй газарта унажа, хайн ургаса үгэбэ: нэгэ зариманиинь тариһанһаа зуу дахин ехэ, нүгөөдүүлын жара дахин ехэ, бусадын гуша дахин ехэ үрэ үгэбэ. ⁹ Шэхэтэй юм һаа, анхарагты!»

Хургаалта үгэнүүдэй зорилго тухай

¹⁰ Шабинарын Иисуста дүтэлжэ: «Ши юундэ улад зондо таамаг удхатай хургаалта үгэнүүдые хэлэнэбши?» – гэжэ нураба.

¹¹ Тиихэдэнь Иисус иигэжэ харюусаба: «Огторгойн хаан түрэ тухай гүн нюусанууд таанадтал тайлбариллагдана. ¹² Ушарын юуб гэбэл, юумэтэй байһан хүндэ нэмэгдэжэ үгтэхэ, тиимэхэ тэрэ хүн улам арьбажаха. Юумэгүй байһан хүнһөө һүүлшын юумэниинь абтаха. ¹³ Юундэ тэдэндэ таамаг удхатай хургаалта үгэнүүдые хэлэнэ-биб гэбэл, тэдэнэр хаража байһанаа обёорногүй, шагнажа байһанаа дууланагүй, юумэ ойлгоногүй. ¹⁴ Тиихэдээ Исаяя лүндэншын тэдэн тухай уридшалан хэлэн ёһоор болоно:

*„Хүнүүд хэдышье шагнаад, ойлгохогүй;
хэдышье шэртэжэ хараад, юумэ обёорхогүй.*

¹⁵ *Юундэб гэбэл, эдэ зоной сэдхэлын мохоороо,
шэхэнь таглараа,
нюдэнь анигдаа.
Тиимэхэ тэдэ нюдөөрөө юумэ харанагүй,
шэхээрэ дууланагүй,
ухаагаараа юумэ ойлгоногүй,
тэдэниие аргалжа эдэгээхымни тула
намда ханданагүй“.*

¹⁶ Харин таанад аза жаргалтайт: нюдэнтнай харана, шэхэтнай дуулана. ¹⁷ Олон лүндэншэд, Бурханай хүнүүд таанадай хаража байһан юумэ харахые ехээр хүсэбэшье, хараагүй, таанадай дуулажа байһан юумэ дуулаха дуратай байгаад, дуулажа шадаагүй гэжэ таанадта баталан хэлэнэб.

Таряашан тухай хургаалта үгын удхые Иисус тайлбарилна

¹⁸ Мүнөө таанар таряашан тухай хургаалта үгын удха ушарые шагнагты. ¹⁹ Бурханай хаан түрэ тухай мэдээсэл шагнаад, юумэ ойлгоогүй хүнүүд – харгын хажууда сасагдаһан үрэхэндэ адли юм. Тэдэндэ муу шолмос ерээд, сэдхэл зүрхэндэнь таригдаһые абаад арилдаг. ²⁰ Шулуутай газарта унаһан үрэхэн гээшэнь мэдээсэл шагнаад, тэрэниие гансата баяртайгаар хүлээн абаһан хүнүүд тухай хэлэгдэнэ. ²¹ Зүгөөр тэрэ мэдээсэл сэдхэлдэнь гүнзэгы үндэхэлөөгүй ушарһаа удаан тогтодоггүй: мэдээсэлэй түлөө зоболонгой тохёолдоо хаань, али мүрдэжэ намнажа эхилээ хаань, тэрэниие удангүй орхижорхидог. ²² Үүргэнэ соо унаһань иимэ удхатай: хэн нэгэн мэдээсэл дуулажа абабашье, энэ ажамидаралайнгаа түлөө оролдолгонь, эд зөөридэ обтолгонь мэдээсэлые даражархидог, тиин тэрэ мэдээсэл ямаршые үрэ дүнгүй байдаг. ²³ Үрэхэлтэй хүрхэндэ таригдаһань иимэ удхатай: мэдээсэл шагнаад, тэрэниие ойлгоһон хүнүүд аша үрэ ехэтэй юм – тэдэнэй нэгэ зариманиинь тариһанһаа зуу дахин ехэ, нүгөөдүүлэнь жара дахин ехэ, баһа бусадэнь гуша дахин ехэ үрэхэлтэй байдаг».

Таряан дундуур ургаһан буртаг үбһэн тухай хургаалта үгэ

²⁴ Иисус ондоо хургаалта үгэ тэдэндэ хэлэбэ:

«Огторгойн хаан түрэ иимэ нэгэ ушартай адлишаажа болохо: Нэгэ хүн таряаландаа һайн үрэхэ тариба гэхэ. ²⁵ Хүнүүдэй унтахада, дайсаниинь ерээд, шэниисынь хоорондуур буртаг үбһэ таряад ябашоо ха. ²⁶ Таряалангайнь ногоорон, эдешэжэ эхилхэдэ, буртаг үбһэншые бултайжа харагдаба. ²⁷ Гэрэй эзэндэ зарасанарынь ерээд: „Эзэн аа! Ши таряаландаа һайн үрэхэ таряа бэшэ һэн гүш? Теэд хаанаһаа тэндэшни буртаг үбһэн ургааб?“ – гэбэ. ²⁸ „Дайсан хүн тиимэ юумэ хээ“, – гэжэ эзэниинь тэдээндэ хэлэбэ. Тиихэдэнь зарасанарынь: „Хүсэбэлшни, бидэ ошожо буртаг үбһэ түүхэбди“, – гэбэ. ²⁹ Зүгөөр гэрэй эзэн иигэжэ харюусаба: „Үгы, буртаг үбһэ түүхэдээ, тэрээнтэй хамта шэниисын таряа түүлсэжэ болохот. ³⁰ Таряа

хурялгын болотор али алинииньшые ургажа байг. Ургаса хуряаха хаһада таряа хуряагшадта түрүүн буртаг үбһыень суглуулжа боогоод, галдахыень захиаб, тиигэһэн хойнонь шэниисэ суглуулжа, амбаар-тамни хадагалхые захиаб“».

Горчицын үрэхэн тухай хургаалта үгэ

³¹ Иисус баһа ондоо хургаалта үгэ дурадхан хэлэбэ:

«Огторгойн хаан түрэ иимэ ушартай адлишаажа болохо: Нэгэ хүн таряаландаа горчицын үрэхэ тарйба гэхэ. ³² Тэрэ үрэхэн бусад хүрэнгэнүүдэй захада эгээн жэжэхэншые һаа, ургахадаа, ямаршые ургамалһаа ехэ модон боложо ургадаг. Тиихэдэнь тэнгэрийн шу-бууд ниидэжэ ерээд, мүшэр соонь уургайгаа түхээрдэг».

Эһэбэри тухай хургаалта үгэ

³³ Иисус тэдэндэ ондоо хургаалта үгэ хэлэбэ:

«Огторгойн хаан түрэ эһэбэритэй сасуулжа болохо: нэгэ эхэнэр багахан эһэбэри абажа, гурбан хэмжүүрэй гурилтай худхажа эһэтэ-рынъ эдхэбэ».

Иисусай хургаалта үгэ хэрэглэхэнэй ушар

³⁴ Иисус эдэ бүгэдые улад зондо хургаалта үгэнүүдээр зураглажа байгаа, хургаалта үгэнүүдые хэрэглэнгүй юумэ хөөрэдэггүй бэлэй.

³⁵ «Би хургаалта үгэнүүдые тэдэндэ хэлэхэб, юртэмсын бүтээгдэхэ-һээ нааша нюуса байһан бүхы юумэнүүдые тайлбарилхаб», – гэжэ лүндэншын хэлэхэниинь бүтэжэ байгаа.

Буртаг үбһэн тухай хургаалта үгын удхые тайлбарилна

³⁶ Иисусай улад зоние табяад, гэртэ ороходонь, тэрээндэ шаби-нарынъ дүтэлжэ: «Таряалан дээрэхи буртаг үбһэн тухай хургаалта үгын удха манда тайлбарилжа үгыш», – гэбэ.

³⁷ Тиихэдэнь Иисус харюусаба:

«Һайн үрэхэ таригшань Хүн түрэлхитэнэй Хүбүүн гээшэ. ³⁸ Та-ряалан гээшэнь газар дэлхэй мүн. Һайн үрэхэниинь Бурханай хаан ороной хүнүүд, харин буртаг үбһэниинь шолмосой хүнүүд мүн.

³⁹ Буртаг үбһэ тариһан дайсан гээшэнь альбан шолмос гээшэ. Хада-лан – хамаг юумэнэй ээсынь, тиин таряа хадагшад – Бурханай Эльгээмэлнүүд гээшэ. ⁴⁰ Буртаг үбһэ түүжэ галда шатаһантай тон адли юумэн хамаг юумэнэй эсэстэ болохо: ⁴¹ Хүн түрэлхитэнэй

Хүбүүн Эльгээмэлнүүдээ ябуулха, тэдэнь хаан орон соонь бүхы буруу ябадалтаниие болон бусад зониие нүгэлдэ оруулагшадые суглуулха, ⁴² тиигээд тэдэниие гал дүлэ руу хаяха. Тэндэ хүнүүд бархиралдаха, шүдөө хабиралдаха. ⁴³ Харин үнэн сэдхэлтэн Эсэгынгээ хаан түрэ соо нарандал адляар яларха. Шэхэтэй юм хаа, анхарагты!

Далда хадагалагдаһан баялиг тухай хургаалта үгэ

⁴⁴ Огторгойн хаан түрэ баһа иимэ юумэндэ адли: Нэгэ хүн таряалан соо хадагалагдаһан баялиг эрдэни олоод, тэрэнээ һөөргэнь нюуба. Олзодоо аргагүй ехээр баярлаһан хүн бүхы зөөриесэ наймаалаад, үнөөхи таряалан худалдажа абаба.

Үнэтэй субад эрдэни тухай хургаалта үгэ

⁴⁵ Огторгойн хаан түрэ баһа үнэтэй субад эрдэни бэдэрһэн наймаашанай ⁴⁶ дээдэ зэргын субад эрдэни олоод, бүхы зөөриесэ наймаалан, тэрэниие худалдажа абаһантай адли юм.

Губшуур тухай хургаалта үгэ

⁴⁷ Баһа Огторгойн хаан түрэ иимэ юумэндэ адли: Загаһашад губшуураа далайда хаяжа, элдэб түрэлэй загаһа барибга гээ. ⁴⁸ Тиигээд дүүрэшэһэн губшуураа эрьедэ татажа гаргамсаараа загаһа илгажа оробо: хайн загаһыень үлөөгөөд, муунуудыень хаяба. ⁴⁹ Хамаг юумэнэй эсэстэ эгээл тиимэ юумэн болохо: Бурханай Эльгээмэлнүүд ерэжэ, нүгэл хэгшэдые үнэн сэдхэлтэнэй дундаһаа илгаха, ⁵⁰ тиигээд тэдэ нүгэл хэгшэдые галтай пеэшэн руу хаяха: тэндэ хүнүүд бархиралдаха, шүдөө хабиралдаха».

Шэнэ болон урданай баялиг тухай

⁵¹ Иисус шабинарһаа: «Эдэ бүгэдые таанар ойлгобо гүт?» – гэжэ һураба.

Тиихэдэнь шабинарынь: «Ойлгообди!» – гэжэ харюусаба.

⁵² Иисус тэдэндэ иигэжэ хэлэбэ: «Огторгойн хаан түрэ даһан алишье Хуули заадаг багша эрдэни баялигайнгаа санһаа шэнэшье, мүн урданайшье баялигуудые абажа хэрэглэдэг эзэндэ адли юм».

Нютагтаа лүндэншэ нэрэ хүндэтэй болодоггүй

⁵³ Эдэ хургаалта үгэнүүдээ түгэсхөөд, Иисус тэрэ нютагһаа гаража, ⁵⁴ өөрынгөө түрэл хото ерэбэ. Тиигээд мүргэлэй гэр соо зоние хургаба.

«Иимэ сэсэн ухаан, гайхамшагта хэрэгүүдые бүтээхэ хүсэ энэшни хаанаһаа абанаб?» – гэжэ тэрэниие шагнаһан зон гайхалсаба.

⁵⁵ «Энэмнай дарханай хүбүүн бэшэ гү? Эхэнь Мария бэшэ гү? Яков, Иосиф, Симон, Иуда гэгшэд дүүнэрын бэшэ гү? ⁵⁶ Дүү басагадын бултадаа эндэ ажамидардаг бэшэ гү? Яжа энэшни эдэ бүгэдые бүтээнэ гээшэб?»

⁵⁷ Тиигэжэ зон тэрэнэй талаар хэжэглэбэ. Иисус тэдэндэ:

«Лүндэншэдые нютагынхидһаань, гэр бүлэһөөнь бусад зон булта хүндэлжэ ябадаг юм», – гэжэ хэлэбэ.

⁵⁸ Улад зоной этигэл хүзэггүй байһан туладань Иисус нютагтаа гайхамшагта хэрэгүүдые ехээр бүтээбэгүй.

Уһаар Арюудхагша Иоаннай ами таһалба

14 ¹ Тэрэ үедэ Галилей можын Ирод захирагша Иисус тухай хураг дуулаад: ² «Энэ Уһаар арюудхагша Иоанн байна. Энэшни амидыраа, тиимэһээл гайхамшагта хэрэгүүдые бүтээнэ», – гэжэ албатандаа хэлэбэ.

³ Урдань Ирод Филипп дүүгэйнгээ Иродиада һамганһаа боложо Иоанные барижа хүлээд, түрмэдэ хаахыень захирһан байгаа. ⁴ Юүндэб гэхэдэ, Иоанн: «Ши Иродиатай хууха ёһогүйш», – гэжэ Иродтэ хэлэһэн байгаа. ⁵ Ирод Иоанные алахая ханабашье, улад зонһоо айгаа, ушарынь гэхэдэ, улад зон Иоанные лүндэншэ гэжэ тоолодог байгаа.

⁶ Иродэй түрэхэн үдэрэй найрта Иродиадын басаганиинь айлшадай урда хатаржа, Иродтэ ехээр хайшаагдаба. ⁷ Тиимэһээ басаганай ямаршы эриһэн юумые үгэхэб гэжэ Ирод амалба. ⁸ Эхынгээ хурган ёһоор басаган:

«Мүнөө эндэ Уһаар арюудхагша Иоаннай толгойе табак дээрэ табяад намда үгэ!» – гэжэ хэлэбэ.

⁹ Тиихэдэнь Ирод хаан ханаата болобошые, бүхы айлшадай урда үгөө үгэхэн тула басаганай хүсэл дүүргэгты гэжэ захирба. ¹⁰ Тиимэһээ түрмэ соо Иоаннай толгойе таһа сабшаба. ¹¹ Тиигээд толгойень табак дээрэ табяад, басаганда асараа, тэрэнь эхэдээ абашажа үгөө. ¹² Иоаннай шабинанынь бэеыень абашажа хүдөөлүүлээ бэлэй. Тиигээд энээн тухай Иисуста ошожо дуулгаа хэн.

Иисус таба мянган хүниие садхааба

¹³ Иисус Иоанн тухай дуулаад, байһан газарһаа гансаараа онгосоор тамаржа эзэгүй ээлүүд газарта ошобо. Энээн тухай улад зон дуулаад, тура хотонуудһаа гаража, хойноһоонь ябагаар ошобо. ¹⁴ Иисус онгосоһоо буухадаа олон зониие хараад, тэдэниие хайрлан, үбшэнтэниие аргалжа эдэгээбэ. ¹⁵ Үдэшэ болоходо, Иисусай шабинанынь тэрээндэ ерэжэ: «Энэ эзэгүй газар байна, тиигээдшые орой болоо. Хүдөө тосхонуудта ошожо, эдихэ юумэ худалдажа абахыень улад зоноо табиш», – гэбэ. ¹⁶ Зүгөөр Иисус тэдэндэ: «Улад зоной ошоһоной хэрэггүй, таанад тэдэндэ эдихэ юумэ үгэгты», – гэжэ хэлэбэ. ¹⁷ Тиихэдэнь шабинанынь: «Бидэ оройдоол табахан монсогор хилээмэтэй, хоёр загаһатай байнабди», – гэжэ харюусаба.

¹⁸ «Тэдэнэ иишэнь намда абажа ерэгты», – гэжэ Иисус хэлэбэ. ¹⁹ Тэрэ улад зондо ногоон дээрэ һуухыень захирба. Тиигээд табан хилээмэ, хоёр загаһыень абажа, тэнгэри өөдэ шэртэн, Бурханда баяр баясхалан хүргэбэ. Удаань хилээмэ хухалжа, шабинартаа үгэбэ, тэдэнь улад зондо дам тарааба. ²⁰ Зон бүгэдөөрөө эдижэ садаба. Тиигэхэдэнь эдеэнэй үлөөдэһөөр арбан хоёр түрсүүгы дүүргэбэ. ²¹ Эхэнэрнүүдһээ, үхибүүдһээ гадна тэндэ табан мянга шахуу эрэшүүл эдеэлһэн байба.

Иисусай уһан дээгүүр ябаһан тухай

²² Тиигээд Иисус шабинараа онгосодо һуулгажа, түрүүндэнь далайн нүгөө бээдэ тамаржа ошоһыень захирба. Харин өөрөө улад зонной таратар үлөө һэн. ²³ Зоноо тараагаад, Иисус хада өөдөө зальбархаяа гансаараа гараба. Үдэшэндөөшые тэрэ тэндэ гансаараа байгаа. ²⁴ Эгээл тэрэ үедэ шабинарайнь тамаржа байһан онгосо далайн тэгэндэ хүрөөд, урдаһаань һалхинай үлээхэдэ, долгиндо сохюулжа байба. ²⁵ Үүр сайхын урдаһана* Иисус далайн уһан дээгүүр ябаад, шабинартаа ошоо һэн. ²⁶ Шабинанынь тэрэнэй уһан дээгүүр ябахыень хараад, айн мэгдэжэ: «Энэ хии үзэгдэл байна», – гэжэ айһандаа хашхаралдаба. ²⁷ Зүгөөр Иисус тэдэнтэй дары дуугаралсан: «Зоригтой байгты. Энэ биб, бү айгты», – гэбэ. ²⁸ Пётр тэрээндэ: «Дээдын Эзэн аа, хэрбээ энэ үнэхөөрөө ши юм һаа, намайе уһан дээгүүр ябаад, шамда ерэхыемни захирыш», – гэбэ.

* Һүниин дүрбэдэхи харуулай үедэ.

²⁹ Тиихэдэнь Иисус: «Ерэ», – гэбэ. Пётр онгосоһоо гараад, багшынгаа урдаһаа уһан дээгүүр ябаба. ³⁰ Тээд шанга һалхинай үлээхые обёорходоо айгаад, уһанда шэнгэжэ эхилбэ.

«Дээдын Эзэн! Намае абарыш», – гэжэ тэрэ хашхарба.

³¹ Иисус тэрэ дороо гараа һарбайжа, Пётрые дүнгэн баряад:

«Ямар бирагүй этигэл хүзэгтэйбши! Юундэ һэжэглэбэш?» – гэбэ.

³² Тэдэ хоёрой онгосодо һуухатайнь сасуу һалхин намдаба. ³³ Онгосодо байһан шабинарынь Иисуста мүргэжэ: «Ши үнэхөөрөөл Бурханай Хүбүүн байнаш», – гэбэ.

Иисус Геннисаредтэ үбшэнтэниие эдэгээбэ

³⁴ Иисус шабинартайгаа далай гаталжа, Геннисаредэй газарта хүрэжэ ерэбэ. ³⁵ Тэндэхи зон Иисусые таяад, бүхы оршон тойронхи газарта хүнүүдые эльгээжэ, хамаг үбшэнтэниие тэрээндэ асаржа байгаа.

³⁶ Хубсаһандатнай халташые хүрэхые зүбшөөгыт даа гэжэ тэдэ Иисусаа гуйба. Тиигээд хубсаһандань хүрэхэн хүн бүхэн эдэгэбэ.

Үбгэ эсэгэнэрэй заншал тухай

15 ¹ Тиигээд Иерусалимһаа хэдэн Хуули заадаг багшанар, фарисейнүүд Иисуста ерэжэ:

² «Шабинаршни юундэ үбгэ эсэгэнэрэймнай заншалнуудые баримталнагүйб? Тэдэнэршни эдихынгээ урда тээ гараа угаангуйл», – гэбэ.

³ Иисус тэдээндэ иигэжэ харюусаба: «Тиихэдээ юундэ таанар Бурханай захяа заабари дүүргэнгүй, өөһэдынгөө ёһо гуримые баримталнабта? ⁴ „Аба эжы хоёроо хүндэлэ“ гэжэ Бурхан заабарилаа бэшэ һэн гү? Мүн баһа „Аба эжы хоёроо муушалһан хүн үхэлдэ хүртэхэ“ гээ бэшэ һэн гү? ⁵ Харин таанар эхэ эсэгэдээ үгэжэ тухалха аргатай байһан юумэе: „Би Бурханда үргөөб“ гэжэ хэлэбэл, ⁶ өөрынгөө эхэ эсэгые хүндэлхэ хэрэггүй гэжэ заанат. Тиигэжэ таанар Бурханай захяа заабари сахингүй, өөһэдынгөө тогтоохон ёһо заншалаар һэлгэнэт. ⁷ Хоёр нюуртан! Таанар тухай лүндэншэ Исайя үнэн сохомые уридшалан хэлээ һэн лэ:

⁸ „Энэ улад зон хэлэ амаараа намайе хүндэлнэ,

харин зүрхэ сэдхэлдээ нам тухай огто бодоногүй.

⁹ Хүнүүдэй зохёохон ёһо гуримуудта хургажа байхадаа,

тэдэ дэмы намда мүргэнэ даа“».

Ямар юумэнүүд хүнийг бузарланаб?

¹⁰ Иисус улад зонийг дуудаад:

«Хэлэһыемни шагнажа, ойлгохыг хэшээгты! ¹¹ Амандатнай ородог эдээн таниг бузарладаггүй, харин аманһаатнай гарадаг муухай үгэнүүд таниг бузарладаг юм», – гэжэ хэлэбэ.

¹² Тиихэдэнь шабинаныг Иисустай ойртоод: «Хэлэһэн үгэнүүдшнй фарисейнүүдэй ханаанда таарабагүй гэжэ мэдэнэ гүш?» – гэжэ һураба.

¹³ Иисус иигэжэ харюусаба: «Тэнгэридэ байгша Эсэгымни таряагүй ямаршыг ургамал үндэһэтэйгөө хамта абтажа хаягдаха. ¹⁴ Тэдэн тухай ханаагаа огто бү зобогты. Тэдэнэр хохор хүнүүдэй хохор удайдагшад мүн; теэд хохор хүн хохорыг хүтэлжэ ябабал, хоюулаа нүхэ руу унаха юм».

¹⁵ «Хүнийг бузарладаг юумэнүүд тухай хөөрэһэнөө маанадта тайлбарилжа үгыш даа», – гэжэ Пётр гуйба.

¹⁶ «Хэлэһыемни хэнтнайшыг мүнөө болотор ойлгоогүй гээшэ гү? ¹⁷ Ойлгоногүй аалта, амандаа хэһэн эдээтнай хотондотнай ороод, һүүлдэнь бөөһөөтнай гарадаг. ¹⁸ Харин аманһаатнай гараһан үгэнүүд зүрхэ сэдхэлһэйтнай гарадаг; тэдэнтнай таанадыг бузарладаг ха юм. ¹⁹ Ушарыг юуб гэбэл, зүрхэнһөөтнай хара һанал бодолнууд гарадаг, тиигээд таанадыг алахада, эрэдээ гү, али эхэнэртээ урбахада, забхай зальхай ябадалда, хулгай хэхэдэ, бусадыг хардахада, муушалхада түлхидэг юм. ²⁰ Эдэ бүхы ябадалнууд таанадыг бузарладаг. Зүгөөр угаагдаагүй гараараа юумэ эдихэдээ таанад бөө бузарладаггүйт».

Эхэнэрийг хүзэг этигэл тухай

²¹ Иисус байһан газарһаа хүдэлжэ, Тир Сидон хотонуудай шадархи газар дайдада хүрэжэ ерэбэ. ²² Тэндэ ажаһуудаг нэгэ хананей эхэнэр Иисустай ерэжэ: «Дээдын Эзэн, Давидай үри һадаһан, намайг хайрлажа үршөөгш! Басагамни ада шүдхэртэ барюулаад, аймшагтай зобожо байна», – гэжэ хашха уухи табиба.

²³ Теэд Иисус тэрэ эхэнэртэ юушыг хэлэбэггүй. Тиихэдэнь тэрэнэй шабинаныг дүтэлжэ: «Энэ эхэнэрыг ябуулыш, хойноһоомнай дахаад лэ, хашхараад лэ һаланагүйл», – гэжэ гуйба.

²⁴ «Би имагтал Израилийн төөрижэ хосорһон хонидто эльгээгдэһэн байгаа», – гэжэ Иисус харюусаба.

²⁵ Харин тэрэ эхэнэр бүри ойртоод, Иисусай урда дохин мүргэжэ: «Дээдын Эзэн! Намда туһалыш», – гэжэ гуйба.

²⁶ «Хүүгэдэй эдихэ хоол абаад, нохойнуудта хаяхань зохихогүй юм», – гэжэ Иисус тэрээндэ харюусаба.

²⁷ Тиигэхэдэнь тэрэ эхэнэрын: «Зүб даа, Дээдын Эзэн! Теэд эзэдэй шэрээ дээрэхээ унаһан бутархай нохойнуудшые эдидэг бшуу», – гэжэ урдаһаань хэлэбэ.

²⁸ Тиихэдэнь Иисус тэрээндэ: «Ай, эхэнэр! Шинии хүзэг этигэл ехэ байна! Һанаһан хүсэһэн юумэншни бүтэхэ!» – гэжэ харюусаба. Эгээл тэрэ үедэ эхэнэрэй басаганиинь эдэгэшэбэ.

Иисус олон зониие эдэгээбэ

²⁹ Тэндэхээ Иисус Галилей далайн шадар ерэбэ. Һүүлдэнь нэгэ гүбээ дээрэ гаража һууба. ³⁰ Тэрээндэ олон зон ерэжэ байгаа. Тэдэ дохолон, хохор, хэлэгүй, бэртэһэн, мүн бусадшые элдэб янзын үбшэнтэй зониие Иисуста асаржа, хүлэйн дэргэдэ һуулгаба. Тэдэ үбшэнтэй зониие Иисус бултыень эдэгээбэ. ³¹ Тиин хэлэгүй байһан зоной хэлэхые, бэртэһэн хүнүүдэй эдэгэхые, дохолонуудай ябахые, хохорнуудай хараатай болоһые хараһан зон аргагүй ехээр гайхаа бэлэй. Тиигээд Израилиин Бурханда алдар соло дуудаа һэн.

Иисус дүрбэ мянган хүниие садхааба

³² Иисус шабинараа дууджа: «Би эдэ зониие хайрланаб. Тэдэ намтай гурбан үдэр байлсаа, теэд мүнөө эдихэ юумэгүй болоод байна. Эдэниие үлэн хооһоор табиха дурагүй байнаб. Гэртээ бусаха замдаа эдэ һуларжа ядархал», – гэбэ.

³³ Теэд шабинанынь: «Иимэ сүл губида эдэ олон зониие эдеэлүүлжэ садхааха хоол бидэ хаанаһаа абахабибди?» – гэжэ урдаһаань һураба.

³⁴ «Танда хэды шэнээн хилээмэн бииб?» – гэжэ Иисусай һурахада, тэдэнь: «Долоон хилээмэн, хэдэхэн загаһан бии», – гэжэ харюусаба.

³⁵ Иисус улад зониие һуухыень захирба. ³⁶ Тиигээд долоон хилээмэ, загаһа абажа, Бурханда баяр баясхалан хүргэбэ, тэдэниинь хухалаад, шабинартаа үгэбэ, шабинанынь улад зондо дам тараажа үгөө һэн. ³⁷ Хүн бүхэн дураараа эдижэ садаад, үшөө тиихэдэ эдеэнэй үлөөдэһэн долоон түрсүүгээр дүүрэн болоо. ³⁸ Эхэнэрнүүдхээ, үхибүүдхээ гадна дүрбэн мянган эрэшүүл эдеэлжэ садаһан байгаа.

³⁹ Иисус улад зониие табяад, онгосодо һуужа, далайгаар тамаран, Магадан хотын шадархи газар дайдада хүрэжэ ерэбэ.

Гайхамшаг үзэгдэлнүүдые харуулха гэхэн эрилтэ

16 ¹ Хэдэн фарисейнүүд, саддукейнэр Иисусые туршаха зорилготойгоор тэрэндэ ойртобо. Тиигээд гайхамшагта дүлгэ тэмдэг харуулхыень дурадхаба. ² Иисус тэдэндэ харюусаба: «Үдэшэндөө огторгойн барагар улаан байбалнь, таанад: „Үглөөдэр сэлмэг байха“ гэдэгта. ³ Харин үглөөгүүр огторгойн барагар улаан, бүрхэг байбалнь, таанад: „Мүнөөдэр бороо орохонь“ гэдэгта. Хоёр нюуртан! Таанад огторгой хараад, ямар үдэрэй болохые мэдэдэг аад, харин мүнөө сагай дүлгэ тэмдэгүүдые тайлбарилха аргагүй байнат. ⁴ Харата муухай, забхай оршон үеын зон, гайхамшагта дүлгэ тэмдэг харахаяа ханаба гүт? Теэд Иона лүндэншэтэй ушархан гайхамшагта дүлгэ тэмдэгхээ ондоо дүлгэ тэмдэг таанадта үгтэхэгүй».

Тиигээд Иисус тэдэнхээ холодобо.

Фарисейнүүдэй болон саддукейнэрэй эхээбэри

⁵ Шабинарынь хилээмэ абахаяа мартаад, далайн нүгөө эрьедэ та маржа гараба. ⁶ Иисус тэдэндэ: «Һэргэлэн байгты! Фарисей, саддукейнэрэй эхээбэрихээн болгоомжолжо байгты», – гэжэ хэлэбэ.

⁷ Шабинарынь өөһэд хоорондоо: «Маанадай хилээмэ абаагүй хаданнай тиигэжэ хэлээ ёһотой», – гэлсэбэ.

⁸ Энээниие Иисус мэдээд, тэдэндэ иибэ: «Этигэл багатан, таанар хилээмэ абаагүйбди гэжэ юундэ хоорондоо хэлсээбта? ⁹ Таанад мүнөө болотор ойлгобогүй гээшэ гүт? Табан хилээмээр табан мянган хүнэй садаһан тухай, үшөө тиихэдэ хэдэн түрсүүг үлөөдэхэнэй суглархан тухай таанар хананагүй аалта? ¹⁰ Долоон хилээмээр дүрбэн мянган хүнэй садаһан тухай, үшөө тиихэдэ хэдэн түрсүүг үлөөдэхэнэй суглархан тухай мартаа аалта? ¹¹ Хилээмэн тухай таанарта хэлээгүй байһыемни мүнөө болотор ойлгоногүй гүт? Фарисейнүүдэй, саддукейнэрэй эхээбэрихээ һэргылжэ байгты!»

¹² Һүүлэй һүүлдэ шабинарынь хилээмэнэй эхээбэрихээ бэшэ, харин фарисейнүүдэй, саддукейнэрэй хургаалһаа һэргылэгты гэжэ хэлэхыень ойлгобо.

Пётр Иисусые Бурханай табисуурта гэжэ айладхана

¹³ Иисус Филиппэй Кесари хотын хажууда ерээд байхадаа, өөрын шабинарһаа: «Хүн түрэлхитэнэй Хүбүүн тухай хүнүүд юун гэнэб?» – гэжэ һураба.

¹⁴ «Зарим хүнүүд шамайе Ухаар арюудхагша Иоанн гэнэ, бусадын Илия гэжэ ханана, баһа нүгөөдүүлын Иеремия гү, али ондоо лүндэншэдэй нэгэн гэлсэнэ», – гэжэ тэдэн харюусаба.

¹⁵ «Теэд таанар намайе хэн гэжэ хананабта?» – гэжэ Иисус тэдэнхээ һураба.

¹⁶ «Ши Бурханай табисуурташ, Амиды Бурханай Хүбүүнши», – гэжэ Симон Пётр харюусаба.

¹⁷ Тиихэдэн Иисус: «Ионын хүбүүн Симон, ши золтойш! Энэ үнэн зүбье шамда хүнэй ханаан нээгээ бэшэ, харин тэнгэриде оршодог минии Эсэгэ тайлбарилаа. ¹⁸ Тиимэхээ би шамда хэлэнэб: ши Пётр* – шулуун гэшэш, тиин би энэ шулуун дээрэ өөрынгөө хүзэглэгшэдэй бүлгэмые бодхоохоб, тэрэнииемни үхэлшые өөрөө диилэхэгүй. ¹⁹ Огторгойн хаан ороной түлхюурые би шамда үгэхэб. Тиин газар дээрэ хорихон юумэншни огторгой дээрэ хоригдохо; газар дээрэ зүбшөөһэн юумэншни огторгой дээрэ зүбшөөгдэхэ», – гэбэ. ²⁰ Тиигээд Бурханай табисуурта байһан тухайнь хэндэшые хэлэхэгүйень Иисус шабинартаа захирба.

Иисус зобохо, үхэхэ тухайгаа хэлэнэ

²¹ Тэрэ саһаа эхилээд Иисус өөртэйнь юунэй ушарха тухай шабинартаа хэлэдэг болобо. «Би Иерусалим ошохо ёһотойб, тэндэ ахамадһаа, түрүү санаартанһаа, Хуули заадаг багшанарһаа боложо ехэ зоболон эдлэхэб. Би алуулхаб, тиигээд гурбан үдэрһөө амидырхаб», – гэдэг байба. ²² Тиихэдэн Пётр тэрэниие хажуу тээшэн дууджа абаашаад: «Дээдын Эзэн, үгы даа! Тиимэ юумэн шамтай хээээшые болохогүйнь болтогой!» – гэжэ зогсоожо байгаа.

²³ Иисус Пётрто хандан: «Холо боло намһаа, Сатана! Ши намда һаад хэнэш. Шинии ханал бодолнуудшни Бурханһаа үршөөгдэнэ бэшэ, харин хүн шанарһаашни бүрилдэнэ», – гэбэ. ²⁴ Тиигээд Иисус өөрынгөө шабинарта хэлэбэ: «Намтай ябалсаха дуратай хүн өөр тухайгаа бодохоёо болёод, үдэр бүхэн хэрээһээ үргэлөөд**, хойноһоомни яба. ²⁵ Ами наһаяа гамнаха ханаатайшуултнай тэрэнээ алдаха; харин минии түлөө амияа үгэһэнтнай тэрэнээ алмаха. ²⁶ Хэрбээ танай бүхы дэлхэйе олзолоод, ами хүнэхээ алдабалтнай,

* Энэ нэрэ «шулуун» гэхэн удхатай.

** Зоболон туйлахадашые, үхэлэй саазада хүртэхэдэшые бэлэн байха гэхэн удхатай.

танда ашагтай гү? Үгыл даа! Таанад ямаршые юумэ түлөөд, ами хүнэһээ бусаажа шадахагүйлта. ²⁷ Хүн түрэлхитэнэй Хүбүүн Эсэгынгээ алдар соо Эльгээмэлнүүдтэйгээ хамта һаяар ерэхэл, тиигээд хэһэн хэрэгэйнэ зэргээр хүн бүхэниие шиидхэхэл. ²⁸ Эндэ байгшадай зариман Хүн түрэлхитэнэй Хүбүүнэй хаан түрээ баряад заларжа ерэхые үзөөгүйдөө үхэхэгүй гэжэ таанадта баталан хэлэнэб».

Иисусай хубилалга

17 ¹ Зургаан хоногой үнгэрхэдэ, Иисус Пётрые, аха дүү Яков Иоанн хоёрые абажа, хүнүүдэй нюдэнһөө далда байдаг үндэр хада өөдэ гараба. ² Тэндэ Иисус шабинарайнгаа урда хубилба: нюурынъ наран шэнгээр ялараа, хубсаһаниинъ туяа мэтэ сагаан болоо. ³ Гэнтэ тэрээнтэй хөөрэлдэжэ байһан Моисей Илия хоёр бии болоо. ⁴ Пётр Иисуста: «Дээдын Эзэн! Эндэ байхадамнай манда ямар хайн гэшэб! Хэрбээ хүсэбэлшни, эндэ гурбан майхан бодхоохбди: нэгыень шамда, нэгыень Моисейдэ, үшөө нэгыень Илияда», – гэбэ.

⁵ Тиигэжэ хэлэжэ байтарнь ялагар үүлэнэй һүүдэр тэдэниие хушаба, үүлэнһээ: «Энэ минии инаг хайрата Хүбүүмни юм, намда таатай юм; үгыень дуулагты», – гэхэн абяан дуулдаба.

⁶ Энэ абяае дуулахадаа, шабинарынъ ехээр айжа, уруугаа хаража газарта унаба. ⁷ Зүгөөр Иисус дүтэлжэ, тэдэниие гараараа хүрөөд: «Бодогты, бү айгты», – гээ. ⁸ Тэдэнэй өөдөө харахадань, Иисусаа ондоо хэншые тэдэндэ харагдабагүй.

⁹ Шабинартаяа хадаһаа буужа ябахадаа, Иисус: «Хүн түрэлхитэнэй Хүбүүнэй үхөөд амидыртар, энэ үзэхэнөө хэндэшые бү хөөрэгты», – гэжэ тэдээндээ захирба.

¹⁰ «Хуули заадаг багшанар юундэ Бурханай табисуурта Христосой ерэхын урда тээ Илия лүндэншэ ерэхэ ёһотой гэдэг бэ?» – гэжэ шабинарынъ Иисусаа асууба.

¹¹ Тиихэдэнь Иисус: «Үнэхөөрөө Илия түрүүн ерэжэ, бүхы юумые бэлэн болгохо ёһотой. ¹² Гэбэшье Илия заларжа ерээ, харин хүнүүд тэрээниие таниягүй, дура зоргоороо тэрээнтэй болоо гэжэ танда хэлэхэ байнаб. Эгээл тиигэжэ тэдэ Хүн түрэлхитэнэй Хүбүүниие зобоохо юм», – гэжэ харюусаа.

¹³ Тиихэдэнь Уһаар Арюудхагша Иоанн тухай тэрэ хэлэнэ гэжэ шабинарынъ ойлгобо.

Ада шүдхэртэ барюулхан хүбүүе эдэгээбэ

¹⁴ Иисусай шабинартайгаа улад зондо бусажа ерэхэдэнь, тэрээндэ нэгэ хүн ойртоод, урдань үбдэг дээрээ хүгэдэн, ¹⁵ «Эзэн! Минии хүбүүе үршөөжэ хайрлыш. Тэрэмни таталзажа унадаг, ада шүдхэрэй хэрзэгыгээр добтолходо, гал, уһа руу ходо хүрэдэг. ¹⁶ Би тэрэнээ танай шабинарташые асарааб, теэд тэдэ эдэгээжэ шадаагүй», – гэжэ хэлэбэ.

¹⁷ «Этигэл хүзэггүй, забхай ябадалтай зон аа! Үшөө хэды шэнээн таанадтай байхабиб? Үшөө хэды болотор таанадые тэсэжэ байхабиб? Хүбүүгээ нашань намда абаад ерэ», – гэжэ Иисус хэлэбэ. ¹⁸ Иисусай ада шүдхэртэ захирхадань, тэрэнь хүбүүнэй бэе сооһоо гаража, хүбүүн дары эдэгэшөө һэн.

¹⁹ Хожомынь шабинарынь Иисуста дүтэлжэ: «Яахадаа бидэ тэрэ ада шүдхэрые даража шадабагүй гээшэбибди?» – гэжэ гансаараа байхадань һураба.

²⁰ Иисус тэдэндэ харюусаба: «Таанарай этигэл багадаһанда тиигээ. Хэрбээ таанад горчицын жэжэхэн үрэхэнэйшые шэнээхэн этигэлтэй байжа, энэ хадада хандан: „Эндэхээ хүдэлжэ тишшээ боло“ гэе һаатнай, хада тишшэлхэ юм. Таанар юушые хэжэ шадаха һэнта гэжэ танда баталан хэлэнэб. ²¹ Эдэ мэтын ада шүдхэрнүүдые имагтал зальбаралаар, масаг сахин даража болохо юм*».

Иисус дахин үхэхэ тухайгаа хэлэнэ

²²⁻²³ Бүхы шабинарайнгаа Галилейдэ суглараад байхада Иисус тэдээндээ өөр тухайгаа: «Хүн түрэлхитэнэй Хүбүүн хүнүүдэй гарта тушаагдахань, тиигээд тэрэ алуулаад, гурбадахи үдэртөө амидырха», – гэжэ хэлэбэ. Шабинарынь булга ехээр гашуудаба.

Бурхан Һүмэдэ алба татабари түлэхэ тухай

²⁴ Иисусай шабинартайгаа Капернаумда ерэхэдэнь, Бурхан Һүмын алба татабари суглуулагшад Пётрто ойртоод: «Багшатнай Бурхан Һүмэдэ алба татабари түлэхэ гү?» – гэжэ һураба.

²⁵ «Түлэнгүй яахаб», – гэжэ Пётр хэлээ.

Тиигээд Пётрой гэртэ ороходонь, Иисус түрүүлэн: «Симон, ши юун гэжэ һананабши? Энэ дэлхэйн хаашуул хэнһээ түлөөһэ, алба

* Энэ зүйл зарим эхэ бэшэгүүдтэ үгы байдаг.

татабари абадаг бэ? Өөхэдынгөө албатанһаа гү, али хариин зонһоо абадаг гү?» – гэжэ һураба.

²⁶ Пётр тэрээндэ: «Хариин зонһоо абадаг», – гэжэ харюусаа. Иисус тиигэхэдэнь: «Тиимэхээ албатан зондонь түлэхэ хэрэггүй гэнэ худхатай бэшэ аал? ²⁷ Зүгөөр бидэ эдэ зониие сухалдуулхагүйбди. Тиимэхээ ши далайн эрьедэ ошожо, загана хахуулида. Хахуулидашни ороһон түрүүшын загана абаад, амандань мүнгэ* олохош. Тэрэниие абаад, алба татагшадта минии түлөө, өөрынгөөшье түлөө үгөөрэй», – гээ һэн.

Хэн агууехэнь бэ?

18 ¹ Тэрэ үедэ шабинарынь ерээд: «Огторгойн хаан түрэдэ хэниинь агууехэб?» – гэжэ Иисусаа һураба. ² Тиихэдэнь Иисус нэгэ үхибүүе дууджа, шабинарайнгаа урда байлгаад, ³ хэлэбэ: «Хэрбээ таанар хубилжа, үхибүүдтэл адли болоогүй һаа, Огторгойн хаан орондо орохогүйт гэжэ баталан хэлэнэб. ⁴ Энэ үхибүүндэл адли хэн номгон даруу болоноб, тэрэ Огторгойн хаан түрэдэ үлэмжэ ехэнь гээшэ. ⁵ Минии нэрээр иимэ нэгэ үхибүүе тогтоожо абаһан хүн намайе тогтоожо абаһан болоно.

Нүгэл шэбэлдэ түлхихэ тухай

⁶ Зүгөөр намда этигэгшэ эдэ багашуулай нэгыеньшье нүгэл хилэнсэдэ түлхихэн хүн дээрэ аймшагтай хэһээлтэ бууха. Тэрэ хүнэй хүзүүндээ тээрмын шулуу уюулаад, далайн гүн руу шэдүүлжэ шэнгэбэлнь, тэрээндэ өөртэнь дээрэ байха һэн. ⁷ Хүнүүдые нүгэл хилэнсэдэ түлхидэг юумэнүүдһээ боложо газар дэлхэйдэ уй гашуудал тулгарна. Зүгөөр хүнүүдые нүгэл хилэнсэдэ түлхидэг юумэнүүд ходо оллоод лэ байха, тиигээд нүгэл хилэнсэдэ түлхигшэ аймшагтай уй гашуудал үзэхэ. ⁸ Хэрбээ гарайшни гү, али хүлэйшни нүгэлдэ шамайе оруулаа һаань, тэдэнээ таһа сабшаад хая, хоёр гартайгаа, хоёр хүлтэйгөө залиршагүй галай тамада хаягданхаар, гаргүйгөөр гү, али хүлгүйгөөр хэтэдээ амиды ябабалшни дээрэ. ⁹ Хэрбээ нюдэнэйшни нүгэлдэ шамайе оруулаа һаа, тэрэнээ һуга татаад хая. Хоёр нюдэтэйгөө галай тама руу хаюуланхаар, үрөөһэн нюдэтэйгөө хэтэдээ амиды ябабалшни дээрэ.

* Тэрэнь хоёр хүнэй алба татабари түлэхэдэ хүрэхэ статир гэжэ нэрэтэй мүнгэ һэн.

Үгы болоһон хонин тухай хургаалта үгэ

¹⁰ Таанад эдэ багашуулай нэгыеньшые доогуур бү харагты, тэдэ-нэй тэнгэридэ оршогшо хахиюуһан – Эльгээмэлнүүдынь – минии Эсэгийн шарайе хододоо тэнгэридэ хаража байдаг юм гэжэ танда хэлэнэб. ¹¹ Ушарынь хэлэбэл, Хүн түрэлхитэнэй Хүбүүн хосорогшодые оложо абархаяа ерээ. ¹² Таанар юун гэжэ хананабта? Зуун хонитой нэгэ хүн ганса хонинойгоо төөрижэрхёо хаань, ерэн юһэн хонидоо хада дээрэ орхёод, төөриһэн ганса хониёо бэдэржэ ошохогүй аал? ¹³ Тиигээд тэрэнээ оложорхёо хаа, үнөөхи хүн төөрээгүй ерэ юһэн хонидойнгоо тушаа бэшэ, харин олоһон ганса хонинойнгоо тушаа аргагүй ехээр баярлаха гэжэ танда үнэниие хэлэнэб. ¹⁴ Энээндэл тон адляар, тэнгэридэ оршогшо танай Эсэгэ эдэ багашуулай нэгыеньшые алдаха дурагүй байна.

Хэн нэгэнэй нүгэлдэ орохо тухай

¹⁵ Хэрбээ хүзэглэгшэ аха дүүнэрэйшни нэгэн шамда харша нүгэлтэ юумэ хээ хаань, тэрээндээ ошожо, гансаарандань буруу байһыень заажа үгэ. Хэрбээ тэрэ хэлэһыешни дуулабал, ши хүзэглэгшэ аха дүүгээ һөөргэнь бусаабаш. ¹⁶ Хэрбээ шагнахаяа арсабалнь, үшөө нэгэ хоёр хүниие абаад ошо: ямаршые гэмнэлгэ хоёр гү, али гурбан хүнэй гэршэлгээр баталагдаха. ¹⁷ Тэдэниешые дуулахаяа арсабалнь, хүзэглэгшэдэй бүлгэмдэ дуулга. Хэрбээ хүзэглэгшэдэй бүлгэмые дуулахаяа арсабалнь, ши тэрэ хүндэ ондоо яһатанай хүндэ гү, али алба татаашада хандаһандал адляар хандажа бай.

Зүбшөөхэ ба хорихо тухай

¹⁸ Газар дээрэ хорихон юумэнтнай огторгой дээрэ хоригдохо; газар дээрэ зүбшөөрһэн юумэнтнай огторгой дээрэ зүбшөөгдэхэ гэжэ таанарга үнэниие хэлэнэб. ¹⁹ Тэрээнһээ гадна, хэрбээ таанадай хоёртнай газар дэлхэй дээрэ үгээ ойлголсоод, ямаршые юумэ эрээ хаатнай, эрээшыетнай Огторгойдо оршодог минии Эсэгэ танда үгэхэ гэжэ хэлэхэ байнаб. ²⁰ Ушарынь юуб гэхэдэ, хоёр гү, али гурбан хүн минии нэрээр хаана сугларнаб, тэндэнь би хоорондонь байхаб».

Хайрагүй зараса тухай хургаалта үгэ

²¹ Тиихэдэнь Пётр Иисуста ойртоод:

«Дээдын Эзэн! Намда харша нүгэл үйлэдэгшэ аха дүүгээ би хэды дахин хүлисэхэ ёһотой болонобиб? Долоо дахин гү?» – гэжэ һураба.

²² Иисус тэрээндэ иигэжэ харюусаба: «Долоо дахин бэшэ, харин долоон дала дахин гэнэб. ²³ Ушарынь хэлэбэл, Огторгойн хаан түрэ өөрынгөө зарасанартай тоосоо хэхэээ ханаһан хаанда адлишуу юм. ²⁴ Тоосожо эхилхэдэнь, тэрээндэ арба мянган талант мүнгэ* үритэй хүниие абажа ерэбэ. ²⁵ Үриее түлэхэ юумэгүй байхадань, эзэн хаан тэрэниие, тэрэнэй һамгыень, үхибүүдыень, мүн эдлэжэ байһан бүхы зөөрииень худалдаад, үрииень түлүүлхые захирба. ²⁶ Тиихэдэнь барлаг хаанай хүлдэнь унажа, „Эзэн хаан! Намаие хүлеэжэ хайрлыш, би үриее шамда дууһыень түлэхэлби“, – гэжэ гуйба. ²⁷ Эзэн хаан барлагые хайрлажа, үрииень хүлисөөд, гэртэнь табиба. ²⁸ Тэрэ зараса гадагшаа гаража ябатараа, өөртэнь зуун динари** үритэй нэгэ нүхэртэйгөө тааралдаба. Тиигээд тэрэнээ һабардажа баряад: „Үриее намда түлэ“ гэжэ байгаад, хоолойень бахалуурдаба. ²⁹ Тиихэдэнь нүхэрынь хүлдэнь унан: „Намаие хүлеэжэ хайрлыш, би шамда үриее дууһыень түлэхэлби“, – гэжэ ехэтэ гуйба. ³⁰ Теэд түрүүшынь зараса хүлээхээ асаба. Тэрээнһээ гадна, үриее түлэтэрынь нүхэрөө түрмэдэ һуулгаба. ³¹ Энэниие бусад зарасанарынь хараад, урмаа хухаржа, эзэн хаандаа ерэжэ хөөрэбэ. ³² Тиихэдэнь эзэн хаан түрүүшын зарасаа дуудуулжа асараад: „Хэрэггүй нобшын зараса! Намаие гуйхашни, би үриешни дууһан хүлисөө бэлэйб. ³³ Шамаие минии хайрлаһандал адляар, шишье нүхэрөө хайрлаха ёһотой байгаа бэшэ гүш?“ – гэжэ сухалтайгаар хэлэбэ. ³⁴ Тиигээд уурлаһан эзэн хаан бүхы үриее түлэтэрынь тэрэниие түрмын тамалагшадта тушааба.

³⁵ Хэрбээ хүзэглэгшэ аха дүүгээ танай үнэн зүрхэнһөө хүлисөөгүй һаа, Огторгойдо оршогшо Эсэгэмни танда баһал тиигэжэ хандаха юм», – гэбэ Иисус.

* Нэгэ талант мүнгэ жиирэй хүдэлмэришэн арбан табан жэл соо ажаллажа олодог байгаа.

** Нэгэ динари мүнгые жиирэй хүдэлмэришэн нэгэ үдэр соо ажаллажа олодог байгаа.

Хамганһаа халаха тухай

19 ¹ Иигэжэ хургаһанайнгаа һүүлээр Иисус Галилейһээ гаража, Иордан голой саада бэеын Иудейн можо хүрэжэ ерэбэ. ² Хойноһоонь олон хүн дахажа ябаба, тиин Иисус тэдэнэй үбшэн зоһниень бултыень аргалба.

³ Хэдэн фарисейнүүд Иисуста ойртожо, тэрэниие туршаха һанаатайгаар: «Хүн ямаршые шалтагаанаар хамганһаа халаха эрхэтэй гү?» – гэжэ һураба.

⁴ Иисус харюусаба: «Бүтээгшэ түрүүшээр эрэ эмэ хоёрые зохёон бүтээгээ гэжэ таанар уншаагүй аалта? ⁵ Тиигээд: „Эрэ хүн эхэ эсэгээ орхёод, хамгантайгаа нэгэдэхэ, тиин тэрэ хоёр ганса бэе болон эблэрхэ“ гэжэ хэлээ юм. ⁶ Тиихэлээрээ тэдэ хоёр болбол хоёр бэшэ, харин нэгэ бэе гээшэ. Тиимэһээ Бурханай нэгэдүүлһэн юумые хүн хубааха ёһогүй».

⁷ Урдаһаань фарисейнүүд: «Тиигээ һаа, юундэ Моисей халаха тухай гэршэлгэ хамгандаа үгөөд лэ тэрээнһээ халажа болохо гэнэн зүбшөөл үгөөб?» – гэжэ Иисусаа һураба.

⁸ Иисус тэдэндэ: «Шулуун сэдхэлтэй байһан хадатнай хамганһаа халаха зүбшөөл Моисей таанарта үгөө; теэд Бурхан анханһаа тиигэжэ заяагаагүй юм. ⁹ Зүгөөр би таанарта иигэжэ хэлэхэб: өөртөнх урбаагүй хамганһаа халаад, ондоо эхэнэртэй гэрлэһэн хүн бүхэн урбагша болоно», – гэжэ хэлээ.

¹⁰ Шабинарын тэрээндэ: «Хэрбээ хүн хамганайнгаа урда тиимэ уялгатай байбалнь, юрэдөө хамга абангүй байбал дээрэ бэшэ гү», – гэжэ хэлэбэ.

¹¹ Иисус тэдэндэ иигэжэ харюусаа: «Энэнь хүн бүхэндэ хамаатай бэшэ, гансал Бурханай заяаһан хүнүүдтэ хамаатай юм. ¹² Яахадааб гэхэдэ, хүнүүд элдэб янзын шалтагаанаар хамга абадаггүй юм: зариман түрэхөөн зэмдэг дутагдалтай байдаг, бусадые хүнүүд тиимэ болгожорхидог, үшөө зариман Огторгойн хаан ороной аша туһада хамга абадаггүй. Зүгөөр энээниие ойлгожо абаха арга бэлигтэй хүнүүд ойлгожо абаха ёһотой».

Иисус балшар үхибүүдые адислана

¹³ Иисусай гарһаа адис абуулжа, зальбаралдань хүртөөхын тула зарим хүнүүд тэрээндэ үхибүүдээ асарба. Гэбэшые шабинарын тэдэ зондо дурагүйгөөр дуугаржа байгаа. ¹⁴ Теэд Иисус: «Үхибүүдые наашань

табигты, намда ерэхэдэнь наалта бү хэгты, юундэб гэхэдэ, эдэ үхибүүд-тэ адлишуу хүнүүд лэ Огторгойн хаан оронойхин юм», – гэжэ хэлээ.

¹⁵ Иисус үхибүүдые гараараа адислаад, тиигээд тэндэһээ ябаа һэн.

Баян залуу хүн тухай

¹⁶ Хэншьеб нэгэтэ Иисуста ерэжэ: «Эрхим багша! Мүнхын амидаралда хүртэхын тула би ямар буянтай юумэ хэхэ ёһотойбиб?» – гэжэ һураба.

¹⁷ «Юундэ намайе эрхим гэбэш? Гансал Бурхан эрхим гээшэ. Хэрбээ мүнхын амидаралда хүртэхээ ханабал, тэрэнэй захяа заабаринуудые сахижа бай», – гэжэ Иисус тэрэ хүндэ харюусаба.

¹⁸ «Ямар захяа заабаринуудые?» – гэжэ нүгөөдэнь асууба.

Тиэхэдэнь Иисус: «Бү ала, ханидаа бү урба, хулгай бү хэ, бусад тухай худал юумэ бү хэлэ, ¹⁹ эхэ эсэгээ хүндэлэ, баһа бусад зондо өөртөө адли дуратай бай», – гэжэ тоолон хэлэбэ.

²⁰ «Эдэ захяа заабаринуудые бултыень би эдир наһанһаа сахижа ябадаг хүнби. Энээнһээ гадна би юу хэхэ ёһотойбиб?» – гэжэ залуу хүбүүн һураба.

²¹ Иисус тэрээндэ: «Хэрбээ эрхим түгэс байха гэбэл, ошожо зөөри зөөшээ бултыень худалдаад, мүнгыень үгытэйшүүлдэ хубаажа үгэ, тиигээ һаа, тэнгэри дээрэ баялиг зөөритэй болохош. Тиигээд намда ерэжэ, хажуудамни ябаарай», – гэбэ.

²² Энээниие дуулахадаа залуу хүбүүн уйдхартайгаар саашалба, ушарынь юуб гэхэдэ, тэрэ хүбүүн аргагүй ехэ эд зөөритэй байгаа ха юм.

²³ Иисус шабинартаа: «Баян хүнэй Огторгойн хаан орондо орохонь ехэл бэрхэтэйл байха даа. ²⁴ Баян хүнэй Бурханай хаан орондо орохоһоонь бэлээр зүүнэй хүбөөр тэмээн ороод гарахал гэжэ таанарта дабтан хэлэхэб», – гээ бэлэй.

²⁵ Энээниие дуулаад, шабинарынь ехээр гайхалдан: «Тиигэхэдэ хэн абарагдаха аргатайб?» – гэлсэбэ.

²⁶ Иисус тэдэниие харан: «Хүнүүд өөһэдыгөө абаржа шадахагүй, харин Бурхан юушые шадаха», – гэбэ.

²⁷ Тиэхэдэнь Пётр: «Бидэ хамаг юумээ орхёод, шамайе дахаабди. Бидэ юундэ хүртэхэбибди?» – гэжэ Иисусаа һураба.

²⁸ Иисус тэдэндэ хэлэбэ: «Хүн түрэлхитэнэй Хүбүүнэй өөрынгөө алдарта Хаан шэрээдэ һуухадань, намайе дахажа ябаһан таанад баһа арбан хоёр хаан шэрээдэ һуужа, Израилиин арбан хоёр угсаатаниие шүүбэрилхэт гэжэ баталан таанадта хэлэнэб. ²⁹ Баһа минии түлөө

гэр байраяа гү, аха дүүнэрээ гү, эгэшэ дүүнэрээ гү, аба эжыгээ гү, һамга үхибүүдээ гү, али эдлэжэ байһан газараа орхиһон хүн бүхэн зуу дахин ехэ юумэ абаха, үшөө тиихэдэ мүнхын амидаралда хүртэхэ. ³⁰ Зүгөөр мүнөө түрүү зэргэдэ байгшадай олониинь һүүл хабида орохо, тиихэдэ мүнөө һүүл зэргэдэ байһанай олониинь түрүүлэн гараха.

Үзэмэй сэсэрлигтэ хүдэлдэг хүнүүд тухай хургаалта үгэ

20 ¹Огторгойн хаан түрэ иимэрхүү юм: Нэгэ хүн үзэмэйнгөө сэсэрлигтэ ажалшадые хүлһэлхээ гэрһээ эртэ үглөөгүүр гаража ошобо. ²Тиигээд үдэрэй нэгэ динари түлэхөөр хүлһэншэдтгээ хэлсээд, тэдэниие ажаллахыень сэсэрлигтээ эльгээбэ. ³Тэрэл үглөөгүүр юһэн сагай багта тэрэ наймаа хэдэг газар ошожо, тэндэ ямаршые ажалгүй хэдэн хүнүүдэй байхые хараба. ⁴Эзэн тэдэндэ хандажа: „Таанаршые минии үзэмэй сэсэрлигтэ ошожо ажаллагты, хүлһыетнай таанарта зүбөөр үгэхэб“, – гэхэдэнь, ⁵тэдэ хүнүүд ажаллахаяа ошобо. Тэрэ хүн хахаддэр, мүн үдэрэй гурбан сагта дахин наймаанай газар ошожо, баһал ажалгүй хүнүүдые хүлһэлбэ. ⁶Һүүлэй һүүлдэ табан сагай багаар гарахадаа, үшөө хэдэн хүнэй зугаатай зогсохые хараба, тиигээд тэдэндэ хандажа: „Таанар юундэ ямаршые юумэ хэнгүй бүхэли үдэр эндэ зогсонобта?“ – гэжэ асууба. ⁷Тэдэнь: „Маниие хэншые хүлһөлөөгүйл“, – гэжэ харюусаба. Тиихэдэнь тэрэ хүн: „Зай, тиимэ һаа, таанар минии үзэмэй сэсэрлигтэ ошожо ажаллагты“, – гэжэ хүнүүдтэ хэлэбэ. ⁸Үдэшэ болоходо, үзэмэй сэсэрлигэй эзэн эрхилэгшэдэ хандажа: „Ши хүдэлмэришэдые дуудажа, һүүлдэ ажаллахаяа гараһан хүнүүдһээ эхилээд, түрүүшээр гараһан хүнүүдээр түгэсэн, ажалайнь хүлһэ түлэ“, – гэбэ. ⁹Табан сагта хүдэлхээ гараһан хүнүүд нэгэ-нэгэ динари ажалай хүлһэ абаба. ¹⁰Тиимэһээ түрүүн ажаллажа эхилһэн хүнүүд: „Үлүү ехэ мүнгэ абахабди“, – гэжэ һанаа, теэд тэдэ баһал нэгэ-нэгэ динари ажалай хүлһэ абаба. ¹¹Тэдэ хүлһээ абаад, гэрэй эзэнэй урдаһаа гэмэрэлдэбэ. ¹²„Һүүлдэ ерэхэн эдэ хүнүүд оройдоол нэгэ саг ажалаа, харин ши эдэндэ бүхэли үдэр бүгшэм халуунда зобожо хүдэлһэн бидэндэл адли мүнгэ түлэбэш“, – гэбэ. ¹³Гэрэй эзэн тэдэнэй нэгэндэнь иигэжэ хэлэбэ: „Нүхэр! Би шамайе мэхэлээгүйлби, нэгэ динари ажалай хүлһэ абахаш гэжэ ши бидэ хоёр зүбшөө бэшэ һэнгүбди? ¹⁴Ши өөрынгөө ажалай хүлһэ абаад яба. Һүүлдэ хүлһэлһэн энэ хүндэ би шамда түлэһэнтэй адли мүнгэ үгэхэ һанаатайб. ¹⁵Өөрынгөө мүнгэтэй би дуратай юумээ хэхэ эрхэтэй бэшэ гүб? Али минии гар бардам байһанда ши атаархахаяа һанаба гүш?“

¹⁶ Тон тийгэжэл адагай һүүлдэ байгшад түрүү зэргэдэ гараха, тиин түрүү зэргэдэ байгшад адагай һүүлшын болохо».

Иисус үхэхэ тухайгаа гурбадахия хэлэнэ

¹⁷ Иисус Иерусалим ошохо замдаа арбан хоёр шабинараа хажуу тээшэнь дуудаад:

¹⁸ «Мүнөө бидэ Иерусалим орохомнай. Тэндэ Хүн түрэлхитэнэй Хүбүүниие түрүү санаартанай, Хуули заадаг багшанарай гарта тушааха. Тэдэнэр Хүбүүе гэмнэн, үхэлэй саазада хүртөөхэ гэжэ шийдэхэ. ¹⁹ Тиигээд тэрээниие хариин зоной гарта тушааха. Тэдэнь тэрээниие доромжолон наада бариха, сохиho, хэрээһэндэ хадаха. Тиигэбэшье Хүбүүн үхөөд, гурбадахи үдэртөө амидырха», – гэбэ.

Зэбэдэйн хүбүүдэй эхын гуйлта

²⁰ Зэбэдэйн хүбүүдэй эхэнь хүбүүдтээ хамта Иисуста ерээд, урдань дохин мүргэжэ, тэрээнэй үршөөл гуйба.

²¹ «Ши юу хүсэнэбши?» – гэжэ Иисус тэрэ эхэнэрһээ асууба.

Тэрэнь Иисуста: «Ши Хаан шэрээдээ һуухадаа, эдэ хоёр хүбүүдэймни нэгыень баруун таладаа, нүгөөдыень зүүн таладаа һуулгажа хайрлыш даа», – гэбэ.

²² Иисус харюудань: «Таанад юун тухай гуйжа байһанаа үнэхөөрөө ойлгоногүйт. Минии амсаха ёһотой зоболонгой аягаһаа таанад уужа амсажа шадаха аалта?» – гэбэ.

Тиихэдэнь Яков Иоанн хоёр: «Шадахабди», – гэжэ тэрээндэ харюусаба.

²³ Иисус тэдэндэ: «Үнэхөөрөө таанад минии зоболонгой аягаһаа амсахат. Теэд баруун таладамни, зүүн таладамни һууха хүнүүдые һунгахань минии мэдэлдэ бэшэ юм. Эдэ һууринуудта минии Эсэ-гын табиган хүнүүд һууха юм», – гэжэ хэлэбэ.

²⁴ Бусад арбан шабинарынэ энээн тухай дуулахадаа, аха дүү хоёрто сүхалаа ехээр хүрэбэ. ²⁵ Тиимэһээ Иисус тэдэниие дууджа: «Хариин захирагшад өөһэдынгөө арад зониие зонхилхо дуратай байдаг, мүн түшэмэд һайдуудыньше албатанаа захирха бүрин засагтай байдаг гэжэ таанар мэдэнэт. ²⁶ Харин таанад тэдэндэл адляар бээе абажа бү ябагты. Агууехэ болохо һанаатай хүнтнай бусадайнгаа бултанайнь зараса болохо ёһотой. ²⁷ Али таанарай дунда түрүү зэргэдэ гараха һанаатай хүнтнай бусадайнгаа бултанайнь барлаг болохо

ёһотой. ²⁸ Хүн түрэлхитэнэй Хүбүүн хүнүүдые зарахаяа ерээ бэшэ, харин бусад уладта алба хэхээ, мүн үнэтэ ами наһанайнгаа сэнгээр олон хүнүүдые абархаяа ерээ», – гэбэ.

Иисус хоёр хохор хүниие эдэгээбэ

²⁹ Иисусай шабинартайгаа Иерихонһоо гаража ябахата, тэдэнэй хойноһоо үй түмэн зон дахажа ябаба. ³⁰ Тэрэ үедэ харгын захата дууһан хоёр хохор хүн хажуугаарнь Иисусай гаража ябаһан тухай дуулаад: «Эзэн, Давидай үри һадаһан, маниие үршөөжэ хайрлыш!» – гэжэ хашхаралдаба. ³¹ Улад зоной тэдэ хоёрто дуугүй бологты гэбэшье, тэдэ хоёрынь бүри шангаар: «Эзэн, Давидай үри һадаһан! Маниие үршөөн хайрлыш», – гэжэ хашхаралдаба.

³² Иисус зогсожо, тэдэниие дуудаад: «Таанад намһаа юу хүсэнэбта?» – гэжэ һураба.

³³ Тэдэ хоёрынь: «Эзэн! Хараатай болохые хүсэнэбди», – гэжэ харюусаба.

³⁴ Иисус тэдэниие хайрлажа, нюдэнүүдтэнь халта хүрөөд абаа. Тэрэ дороо нюдэнүүдынь харадаг боложо, тэдэ хоёр Иисусай хойноһоо ябаба.

Иисус Иерусалимда оробо

21 ¹ Иисус шабинартайгаа Иерусалимда ойртожо ерээд, Элеон хадын хаяата оршодог Беттагэ тосхон ошобо. Иисус түрүүлэн тишэнь хоёр шабия эльгээхэ зуураа ² тэдэндээ иигэжэ захиба: «Сэхэ урдатнай байһан тосхон ошогты. Тэндэ орохотойгоо сасуу нэгэ залуу элжэгэнэй эхэтгээ суг уяатай байхые олохот. Тэдэниие уяаһаань тайлаад, намда асарагты. ³ Таанарта хэн нэгэнэй юумэ хэлээ һаань, „Эдэнэр Эзэндэ хэрэгтэй болоо“ гэжэ харюусаарайт, тиихэдэтнай элжэгэнүүдые абажа ябахыетнай дары зүбшөөхэ».

⁴ Иигэжэл лүндэншөөр дамжуулан Бурханай найдүүлһан бүгэдэ юумэнүүд бүтэбэ даа:

⁵ *«Номгон даруу шинии Хаан
Эмэ элжэгэ унаад,
тэрэнэй унага – даагыень унаад,
шамда заларжа ерэнэ гээд
Сионий хотодо* дуулгаарайгты».*

* Иерусалим хото тухай хэлэгдэнэ.

⁶ Шабинанынь ошоод, Иисусай захиһан ёһоор хэбэ: ⁷ элжэгы даагатайнь асаржа, нюрган дээрэнь хубсаһаяа дэбдээд, Иисусые унуулба. ⁸ Үй түмэн зон ябаха харгы дээгүүрнь хубсаһаяа дэбдибэ, зарим зон мүшэрнүүдые отолоод, харгы дээгүүрнь табиба. ⁹ Урдуурнь ябаһан зон, мүн хойноһоонь дахагшад:

«Давидай үри надаһан алдар солотой байһай!

Дээдын Эзэнэй нэрээр заларан Ерэгшэ

үршөөл хайратай байһай!

Дээдын тэнгэридэ оршоһон Бурханда алдар соло!» – гэжэ шанга шангаар хашхаралдаба.

¹⁰ Иисусай Иерусалимда ороходонь, бүхы хото шэбээгэйхин хүлгэнэжэ: «Энэ хэн бэ?» – гэлдэбэ.

¹¹ «Энэ Иисус алдартай Галилейн Назаредэй лүндэншэн мүн», – гэжэ улад зон харюусажа байгаа.

Иисусай Бурхан Һүмэ ошоһон тухай

¹² Иисус Бурхан Һүмэ ошожо, тэндэ хонжоо наймаа хэгшэдые, юумэ худалдажа абагшэдые бултыень намнажа гаргаба. Мүнгэ холигшодой шэрээнүүдые, гулабхаа худалдагшадай хандалинуудые хүмэрюулбэ. ¹³ Тиигээд тэдэндэ: «Минии гэр мүргэл зальбаралай гэр гээд нэрлэгдэхэ гэжэ Нангин Бэшэг соо хэлээтэй байдаг. Харин таанад энэ гэр дээрмэшэдэй шэбээлдэг үүр болгожорхёот», – гэбэ.

¹⁴ Бурхан Һүмэдэ Иисуста һохор дохолон хүнүүд ерэбэ, Иисус тэдэниие эдэгээбэ. ¹⁵ Иисусай бүтээһэн гайхамшагта хэрэгүүдые хараад, мүн Бурхан Һүмэ дотор: «Давидай үри надаһан алдар солотой байһай!», – гэжэ үхибүүдэй шанга шангаар хашхаралдахые дуулаад, түрүү санаартан, Хуули заадаг багшанар сүхалаа хүрэгжэ:

¹⁶ «Эдэнэй юу хэлэжэ байхые дуулана гүш?» – гэжэ Иисусаа асууба.

«Дуулангүй яахаб! Теэд: „Ши үхибүүдэй, нарай нялха хүүгэдэй аманһаа магтаал соло гаргуулааш“ гэжэ Нангин Бэшэгтэ хэлээтэй байһые таанад хэзээшье уншаагүй аалта?» – гэжэ Иисус тэдэндэ хэлэбэ.

¹⁷ Иисус тэдэниие орхёод, Иерусалим хотоһоо гаража, Бетани тосхон ошожо хоноо хэн.

Иисус үрэ жэмэсгүй боди модо хараалдаа хүртөөбэ

¹⁸ Хойто үглөөгүүрнь һөөргөө хото руу ошожо ябахандаа, Иисус ехээр гэдэнһээ үлдэбэ. ¹⁹ Харгын заханда нэгэ боди модоной ургаж байхые хараад, хажуудань ошобо, теэд тэндэнь набшаһадһаа бэшэ ямаршые жэмэс олдобогүй. Тиимэһээ Иисус тэрэ модондо хандажа:

«Энээнһээ хойшо шамһаа ямаршые жэмэс гарахагүй», – гэжэ хэлээ. Тэрэ дороо модон хаташаба.

²⁰ Энээнһиие шабинарынъ хараад, «Боди модон хайшан гээд иимэ амархан хаташаба гээшэб?» – гэжэ гайхалсаба. ²¹ Иисус: «Хэрбээ таанар ямаршые һэжэггүй, бүрин этигэл хүзэгтэй байбал, минии энэ боди модонтой хэһэнтэй адли юумэ, мүн бүришые ехэ юумэ бүтээхэ аргатай байхат гэжэ таанадта баталан хэлэнэб. Энэ уулада хандан: „Эндэнһээ хүдэлөөд, далай руу хүрэ“ гээ һаатнай, тиимэ юумэн болохо. ²² Зальбаржа байхандаа этигэл хүзэгтэй байбал, ямаршые эриһэн юумэнтнай танда үгтэхэ», – гэжэ шабинартаа хэлээ бэлэй.

Иисусай эрхэ засаг тухай асуудал

²³ Бурхан һүмэдэ Иисусай дахин ерээд хургажа байхадань, түрүү санаартан, улад зоной ахамдууд тэрээндэ ойртожо: «Ши иимэ юумэ хэхэ ямар эрхэтэйбиши? Иимэ эрхэ засаг шамда хэн үгөөб?» – гэжэ асууба.

²⁴ Иисус: «Бишые таанадһаа нэгэ юумэ һурахамни. Хэрбээ намда харюу үгэбэлтнай, бишые иимэ юумэ хэхэ ямар эрхэтэй байһанаа таанарта хэлэхэб. ²⁵ Уһаар арюудхаха эрхэ Иоаннда Бурхан үгөө юм гү, али хүнүүд гү?» – гэжэ урдаһаань һураба.

Түрүү санаартан, ахамдууд өөһэд хоорондоо зүбшэлдэн: «Хэрбээ Бурханһаа тиимэ эрхэ үгтөө гэбэлнай, тиигэбэл яахандаа Иоаннда этигэдэггүй байгааба гэхэл. ²⁶ Хэрбээ хүнүүд үгөө гээ һаамнай, зон маниие яахаб бү мэдэе, аймшагтай юумэ болохо», – гэлдэбэ, юундэб гэбэл, хүн зон бултадаа Иоанна лүндэншэн гэжэ тоолодог байгаа. ²⁷ Тиимэһээ тэдэнэр Иисуста: «Бидэ мэдэнэгүйбди», – гэжэ харюусаа һэн. Тиихэдэнь Иисус: «Эдэ юумэнүүдые хэхэ эрхэ намда хэнэй үгэһые би баһа хэлэхэгүйб!» – гэжэ тэдэндэ хэлээ һэн.

Хоёр хүбүүд тухай хургаалта үгэ

²⁸ «Би таанадта хоёр хүбүүдтэй байһан нэгэ хүн тухай хургаалта үгэ хөөрэхүүб. Һүүлдэнь таанад һанал бодолоороо хубаалдаарайт. Эсэгэнь ехэ хүбүүндэ ойртожо: „Хүбүүн аа! Мүнөөдэр үзэмэй

сэсэрлигтэ ошожо ажаллыш даа“, – гэбэ. ²⁹ Теэд тэрэ хүбүүнийнь: „Ажаллаха дурагүй байнаб“, – гэжэ харюусаба. Зүгөөр хожомынь буруу байһанаа ойлгоод, ажаллахаяа ошобо. ³⁰ Тиигээд үнөөхи хүн бага хүбүүндээ ойртожо, баһал үзэмэй сэсэрлигтэ ошожо ажаллахыень хэлэбэ. Тэрэнь: „Эзэн, би ошоход“, – гэхэн аад, ошобогүй. ³¹ Эдэ хоёр хүбүүдэй алинийнь эсэгынгээ хүсэхэниие дүүргээб? – гэжэ Иисусай һурахадань, тэрээндэ: «Ехэ хүбүүнийнь», – гэжэ харюусаба.

Тиихэдэнь Иисус тэдэндэ хэлэбэ: «Алба татаашад, мүн янхан эмэнүүд таанарай түрүүндэ Бурханай хаан орондо орохо гэжэ үнэниие хэлэнэб. ³² Ушарынь хэлэбэл, Иоанн танда Бурханай зүб зам заажа үгөө, теэд таанар тэрээндэ этигээгүйт, харин алба татаашад, янхан эмэнүүд тэрээндэ этигээ. Тиин таанар энээниие хараадшье, удаань гэмшэжэ Иоаннда этигээгүйт».

Үзэмэй сэсэрлиг хүлһөөр абанан хүнүүд тухай

³³ «Үшөө иимэ нэгэ һургаалта үгэ шагнагты», – гэжэ Иисус түрүү санаартанда, ахаматуудга хэлэбэ. «Гэрэй нэгэ эзэн үзэмэй сэсэрлиг таряад, тойруулжа хүрээлбэ, тиигээд сэсэрлиг соогоо үзэмэй шүүхэ шахажа байхаар нүхэ малтаба, харуулай үндэр башни бариба, тиигээд тэрэнээ үзэмшэдтэ хүлһэлөөд, аянда мордобо. ³⁴ Жэмэс түүхэ сагай болоходо сэсэрлигэй эзэн үрэ жэмэсэй ургасаһаа минии хубиие абажа ерэгты гэжэ үзэмшэдтэ барлагуудаа эльгээбэ. ³⁵ Тиихэдэнь үзэмшэд эзэнэй барлагууды бариһан бэээрээ нэгыень зада сохибо, нүгөөдыень алаба, үшөө нэгыень шулуугаар үхэтэрынь шэдэбэ. ³⁶ Эзэн түрүүшынхихээ олон барлагууды дахин эльгээбэ; тэдэнтэйнь үзэмшэд мүн урдынхидаал адли юумэ үйлэдөө бэлэй. ³⁷ Һүүлэй һүүлдэ эзэн хүбүүемни тэдэ хүндэлхэ аабза гэжэ һанан, өөрынгөө хүбүүе үзэмшэдтэ эльгээбэ ха. ³⁸ Теэд үзэмшэд хүбүүень хараад, өөһэд хоорондоо: „Энэ хүбүүн эсэгынгээ эд зөөри залгамжалха. Энээниие алая, тиигэбэл бүхы зөөринь манай болохо“, – гэлдэбэ. ³⁹ Тиигээд тэрэ хүбүүень барижа, үзэмэй сэсэрлигһээ гаргаад, алажархёо бэлэй.

⁴⁰ Зай, тиихэлээрээ үзэмэй сэсэрлигэй эзэн ерээд, тэдэ үзэмшэдые яаха болоноб?» – гэжэ Иисус һураба.

⁴¹ «Харатай тэдэ үзэмшэдые эзэн зобоожо алаха, тиигээд үзэм жэмэсэй ургасаһаа эзэнэй хубиинь саг соонь түүжэ эзэндэнь асардаг ондоо үзэмшэдтэ сэсэрлигээ хүлһэлэн даалгаха», – гэжэ Иисуста харюусаба.

⁴² Иисус тэдэндэ хэлэбэ: «„Хэрэггүй гэжэ барилгашадай голожо хаяһан шулууниинь гэрэй гол шухала тулга шулууниинь болоо: энээниие Дээдын Эзэн бүтээгээ, тиин манда ехэл үзэсхэлэнтэ гоёор харагдана“, – гэжэ Нангин Бэшэгтэ хэлэгдэһые таанар хэзээшье уншаагүй аалта?

⁴³ Тиимэһээ танда хэлэхэ байнаб, Бурханай хаан түрэ таанарһаа абтаад, тэрэнэй эрхэ хүсэл дүүргэдэг зондо үгтэхэ. ⁴⁴ Тэрэ шулуу мүргэжэ унаһан хүн хаха бута унаха; тэрэ шулуун хүнэй дээрэ унаһаа, тэрэниие низа дараха».

⁴⁵ Түрүү санаартад, фарисейнүүд Иисусай хөөрөһэн хургаалта үгэнүүдые дуулахадаа, өөһэд тухайнь хэлэжэ байна гэжэ ойлгобо.

⁴⁶ Тиимэһээ Иисусые барижа хэһээхээ хүсэбэ, теэд улад зонһоо айба, юундэб гэбэл, зон тэрэниие лүндэншэ гэжэ тоолодог байгаа.

Түрэ найр тухай хургаалта үгэ

22 ¹ Иисус хүнүүдтэ баһа хургаалта үгэнүүдээр иигэжэ хэлэбэ: ² «Огторгойн хаан түрэ болбол нэгэ хаанай хүбүүндээ түрэ хуримай найр хэһэнтэй адлишуу юм. ³ Хаан зарасанараа эльгээжэ, урилгатай айлшадаа түрэ хуримай найрта хүрэжэ ерэхыень дуудаба, теэд тэдэнь ерэхэ дурагүй байба. ⁴ „Найрай хоол мүнөө бэлэн болоо; шахамалнууд гаргаатай, бүхы юумэн түхээрэтэй байна; түрэдэ хүрэжэ ерэгты“, – гэһэн мэдээсэлтэйгээр хаан дахин ондоо зарасанараа урилгатай айлшадта эльгээбэ. ⁵ Теэд урилгатай хүнүүдын ямаршье анхарал хандуулбагүй: зариманиинь өөһэдынгөө таряаланда гараба, нүгөөдүүлын наймаа хэхээ ошобо, ⁶ бусадын хаанай зарасанары барижа сохибо, тиигээд алаба. ⁷ Хаан энээн тухай дуулахадаа уурлаад, сэрэгээ эльгээжэ, тэдэ алууршадые хюдаба, хото шэбээнүүдыень шатаажа усадхаба. ⁸ Тиигээд хаан зарасанартаа: „Түрэ найр хэхэдэ бүхы юумэн бэлэн болоо, теэд урилгатай байһан айлшад иигэжэ хүндэлхээр бэшэ байшаба. ⁹ Тиимэһээ харгын бэлшэртэ гараад, дайралдаһан хүн бүхэниие түрэ найрта уригты“, – гэбэ. ¹⁰ Тиин зарасанар гудамжануудта гаража, дайралдаһан муушье, һайншье һанаатай зониие бултыень суглуулба; тиигээд түрэ найр боложо байһан гэр айлшадаар дүүрэшэбэ. ¹¹ Хаан айлшадые харахаяа гэртэ ороходоо, тэндэ хуримай дэгэл үмдөөгүй нэгэ хүниие хараад, ¹² тэрээндэ хандажа: „Нүхэр! Ши хуримай дэгэлгүйгөөр иишээ хайшан гээд орообши?“ – гэжэ һураба. Теэд нүгөө хүниинь юушье дуугарбагүй. ¹³ Хаан зарасанартаа: „Энээнэй гар хүлыень хүлээд,

газаашань харанхыда абаашажа хаягты: тэндэ хүнүүд бархиралдаха, шүдөө хабиралдаха“, – гэжэ хэлэбэ. ¹⁴ Уряалаар ерээшэд олоншые хаа, шэлэгдэн абтаашад үсөөн юм», – гэжэ Иисус хөөрөөгөө түгэсхэбэ.

Хаанай юумэ хаанда, Бурханай юумэ Бурханда үгэгты

¹⁵ Тиихэдэнь фарисейнүүд суглараад, тэрэниие үгэ алдуулжа гэмнэхэ тухай өөһэд хоорондоо хэлсэбэ. ¹⁶ Фарисейнүүд өөрынгөө шабинарые Иродэй талынхидтай хамта Иисуста эльгээжэ: «Багша аа! Ши үнэн сэхые хэлэдэгши, Бурханай бодото замаар ябахые хургадагши, хэнэйшые урда билдагуушалдаггүйш, юуб гэбэл, нюур харадаггүйш гэжэ бидэ мэдэнэбди. ¹⁷ Тиимэһээ юун гэжэ ханажа байханаа манда хэлэжэ үгыш: Римэй хаанда алба татабари түлэхэмнай зүб гү, али буруу гү?» – гэжэ нуруулба.

¹⁸ Тиихэдэнь Иисус тэдэнэй муу мэхые мэдэжэ байгаад: «Хоёр нюуртан! Таанар юундэ намайе туршанабта? ¹⁹ Алба татабари түлэхэдэ хэрэглэдэг нэгэ мүнгэ намда асаржа харуулагтыл даа», – гэхэдэнь, нүгөөдүүлэнь нэгэ динари мүнгэ асаржа үгэбэ. ²⁰ Тиихэдэнь Иисус: «Эндэ хэнэй дүрсэ зураатай, хэнэй нэрэ бэшээтэй байнаб?» – гэжэ нураба.

²¹ «Хаанай», – гэжэ нүгөөдүүлэйн харюусахада, Иисус: «Тиимэһээ хаанай юумые хаандань, Бурханай юумые Бурханда үгэгты», – гэжэ тэдэндэ хэлэбэ. ²² Иимэ харюу дуулахадаа, үнөөхи зон ехээр гайхалдажа, Иисусые орхёод саашалба.

Амидыралга тухай асуудал

²³ Хүнүүд үхөөд амидырдаггүй гэжэ тоолодог саддукейнүүдэй зариманиинь тэрэл үдэр Иисуста ерээд, иигэжэ асууба: ²⁴ «Багша аа! Хэрбээ намга абаһан хүн үхибүүдгүйгөөр наһа барабал, тэрэнэй дүүнь бэлбэһэн эхэнэртэйнь нууха ёһотой, тиигээд тэдэнһээ гаранхан үхибүүн нүгшэһэн ахынь үхибүүн гэжэ тоологдохо зэргэтэй гэжэ Моисей манда захяа һэн. ²⁵ Зай, долоон аха дүүнэр эндэ ажаһуугаа гэе. Тэдэнэй ахань намга абаад, үхибүүдтэй болонгүйгөөр наһа бараа гэхэ, тиин бэлбэһэн эхэнэрынь дүүдэнь үлэбэ гэхэ; ²⁶ ахадаал тон адляар, хоёрдохишые, гурбадахишые саашалан долоодохишые дүүнь үхибүүтэй болонгүй наһанһаа нүгшөө боллолтой. ²⁷ Һүүлэй Һүүлдэ тэдэнэй намганииньшые наһа бараба. ²⁸ Теэд Бурханай үхэхэн хүнүүдые амидыруулхада тэрэ эхэнэр долоон аха

дүүнэрэй алинайнь һамган байхаб? Тэдэ долоон аха дүүнэр булга тэрэ эхэнэрые һамга абаа ха юм».

²⁹ Иисус тэдээндэ хэлэбэ: «Таанад Нангин Бэшэгэй юун гэжэ хургадагы, Бурханай хүр хүсые мэдэдэггүй туладаа эндүүржэ байнат. ³⁰ Үхэһэн хүнүүдые Бурханай амидыруулхада, тэдэ огторгойдо оршодог Бурханай Эльгээмэлнүүдтэл адли байха, тиимэһээ һамгашье абахагүй, хадамдашые гарахагүй. ³¹⁻³² Теэд үхөөшэдэй амидырха тухай Бурханай таанарта:

„Би Абраһамай Бурхан, Исаагай Бурхан, Яковай Бурханби“, – гэжэ хэлэһые уншаагүй аалта? Бурхан болбол үхэһэн хүнүүдэй бэшэ, харин амиды хүнүүдэй Бурхан юм».

³³ Иисусай хургаалнуудые шагнажа байһан улад зон тэрээндэнь ехэл гайхалдажа байгаа.

Эгээн шухала захяа заабари

³⁴ Иисус саддукейнэрые абяа аниргүй болгожорхёо гэжэ фарисейнэр дуулаад, сугларба. ³⁵ Тэдэнэй дундаһаа нэгэ Хуули заадаг багша Иисусые туршажа: ³⁶ «Багша аа! Хуули тогтоолой ямар захяа заабаринь эгээн шухала бэ?» – гэжэ һураба.

³⁷ Иисус тэрээндэ: «Ши бүхы зүрхэ сэдхэлээрээ, бүхы хүнэһе һүлдөөрөө, бүхы ухаан бодолоороо Эзэн Бурхандаа дуратай бай», – гэжэ харюусаба. ³⁸ «Энэ болбол нэгэдэхи, эгээн шухала захяа заабари мүн. ³⁹ „Бусад зондо өөртөөл адли дуратай бай“ гэһэн хоёрдохи шухала захяа заабари түрүүшынхидээ адлишуу юм. ⁴⁰ Моисейн Хуулин бүхы зүйлнүүд, лүндэншэдэй номууд эдэ хоёр захяа заабари соо тобшологдон баталагдадаг юм».

Давидай үри һадаһан тухай асуудал

⁴¹ Зарим фарисейнүүдэй суглархадань, Иисус тэдэнһээ: ⁴² «Бурханай табисуурта тухай таанар юун гэжэ һананат? Тэрэ хэнэй удам байхаб?» – гэжэ һураба. Тэдэнь: «Давид хаанай үри һадаһан байха», – гэжэ харюусаба.

⁴³ Иисус тэдэндэ: «Тиигэбэл, юундэ Давид хаан Нангин Һүлдын нүлөөдэ абтан Бурханай табисууртые Дээдын Эзэн гэжэ нэрлээб:

⁴⁴ „*Бузар дайсадыешни хүлдэш мүргүүлтэрни баруун таладамни һуугаарай гэжэ Дээдын Эзэн минии Эзэндэ хэлээ*“ гээ юм.

⁴⁵ Хэрбээ Давид Бурханай табисууртыг Эзэмни гэжэ нэрлэбэл, юундэ Бурханай табисуурта тэрэнэй үри болохоб?»

⁴⁶ Тиихэдэнь хэншые Иисуста харюу үгэжэ шадахагүй байба. Тэрэ үдэрһөө хойшо тэрээнһээ юумэ һурахаяа хэншые зүрхэлбэгүй.

Иисус Хуули заадаг багшанарыг, фарисейнүүдыг зэмэлнэ

23 ¹ Иисус улад зондо, өөрынгөө шабинарта ² иигэжэ хэлэбэ: «Хуули заадаг багшанар, фарисейнүүд Моисейн Хуули тайлбарилжа байдаг. ³ Тиимэһээ таанад хургаһан бүхы юумэнүүдынь дүүргэжэ, хэ гэһыень хэжэ байгты; харин тэдэнэй хэһэн юумэ бү хээрэйгты, юуб гэхэдэ, тэдэнэр хэлэһэн номноһоноо хэрэг дээрэ бүтээдэггүй юм. ⁴ Тэдэнэр даагдашагүй, хүндэ хүшэр ашаануудыг хүнүүдэй мурэ дээрэ хүлижэ табяад, харин тэрэ ашаае абаашахада гансашыг хургаараа хүдэлгэжэ туһалдаггүй юм. ⁵ Зүгөөр юумэ хэжэ байһан хэбэр хүнүүдтэ үзүүлхэ гэжэ бүхы шадалаараа оролдодог. Нангин Бэшэг сооһоо мурнүүдыг бүд дээрэ олоор бэшээд, духаяа боодог, гартаа уядаг, Бурханда зорюулаатай байһыень харуулһан дэгэлдэнь оёотой сагауудынь бусад зонойхиһоо ута унжагар байдаг, Нангин Бэшэг сооһоо буулгажа абтаһан мурнүүдыг хадагалжа ябадаг арһан туламуудынь ехэл томо байдаг. ⁶ Мүн түрэ найрта эгээн хүндэтэй һуури эзэлхэ, мүргэлэй гэр соо урдуур һууха дуратай байдаг. ⁷ Баһа тэдэнэр олон зоной дунда мэндэшэлүүлхэ, „Рабби! Рабби!“ гэжэ нэрлүүлхэ дуратай. ⁸ Теэд таанарай хэншыг багша гэжэ өөрыгөө нэрлүүлхэ ёһогүй, юундэб гэбэл, таанар ори ганса багшатайт, тиин таанад бултадаа аха дүүнэр гээшэт. ⁹ Баһа газар дэлхэй дээрэ хэниешыг эсэгэ гэжэ бү нэрлэгты, юундэб гэхэдэ, таанар огторгойдо оршодог ори ганса Эсэгэтэйт. ¹⁰ Баһа „хургагша“ гэжэ өөһэдыгөө бү нэрлэгты, юундэб гэбэл, гансал Бурханай табисуурта Христос танай хургагша юм. ¹¹ Танай дунда агуухэтнай бусадайнгаа зараса болохо ёһотой. ¹² Бээ дээгүүр абаһан хүн дарагдаха; харин өөрыгөө дараһан хүн үргэгдэхэ.

¹³ Хуули заадаг багшанар, фарисейнүүд, таанад гашуудал зоболон үзэхэт! Хоёр нюурта таанад! Огторгойн хаан оронииг хүнүүдһээ хаажэ, өөһэдөөшыг тэндэ ороногүйт, орохо дуратайшуулыгешыг тишэнь табинагүйт. ¹⁴ Хуули заадаг багшанар, фарисейнүүд, таанад гашуудал зоболон үзэхэт! Хоёр нюурта таанад! Бэлбэһэн эхэнэрнүүдэй гэр хоһолдогта, хүнэй харахада ехэ удаан мүргөөшэ болодогта. Энээнэйнгээ түлөө аймшагтайгаар хэһээлгэхэт. ¹⁵ Хуули

заадаг багшанар, фарисейнүүд, таанад гашуудал зоболон үзэхэт! Хоёр нюурта таанад! Нэгэшье хүниие өөрын шаби болгохын тула уһан далайешье, орон нютагуудыешье тойрон гаталдагта; тиигээд тиимэ шаби олоод, тэрээниие өөрһөөн долоон доро тамада орохо амитан болгодогта. ¹⁶ Һохор балай хүтэлэгшэд, таанад гашуудал зоболон үзэхэт! Таанад: „Хэрбээ али нэгэн хүн Бурхан Һүмөөр тангариглаа һаа, тангаригынь хүсэнгүй; харин Бурхан Һүмэдэ байһан алтаар тангариглаа һаа, тангаригынь хүсэн түгэлдэр“, – гэжэ һурганат. ¹⁷ Ай, һохор тэнэгүүд! Алиниинь шухал бэ: алтань гү, али алта арюудхагша Бурхан Һүмэнь гү? ¹⁸ Мүн таанад: „Хэрбээ али нэгэн хүнэй үргэлэй шэрээгээр тангариглаа һаа, тангаригынь хүсэнгүй, харин тэрэ шэрээ дээрэ табиһан үргэлөөр тангариглаа һаа, тангаригынь хүсэн түгэлдэр“, – гэжэ һурганат. ¹⁹ Ай, һохор тэнэгүүд! Алиниинь шухалаб: үргэлынь гү, али үргэл арюудхагша шэрээнь гү? ²⁰ Тиимэһээ үргэлэй шэрээгээр тангариглагша болбол тэрэ шэрээгээр, мүн тэрээн дээрэ байһан бүхы юумээр тангариглана гээшэ. ²¹ Баһа Бурхан Һүмөөр тангариглагша болбол тэрээгээр, мүн доторнь оршогшо Бурханаар тангариглана гээшэ. ²² Баһа огторгойгоор тангариглагша болбол Бурханай шэрээгээр, тэрэ шэрээдэ һуушаар тангариглана гээшэ.

²³ Хуули заадаг багшанар, фарисейнүүд, таанад гашуудал үзэхэт! Хоёр нюуртан! Таанар Бурханда ургасынгаа – халуун үбһэ, укроп, тмин гэхэ мэтын ургамалнуудай – арбанай нэгэн хуби үгэнэт, харин Хуулиин эгээл шухала зүйлнүүд болохо зарга шүүбэри, үршөөл хайра, этигэл найдабари тоонгүй орхибот. Эдэ зүйлнүүдые таанад баримталха ёһотой байгаат, мүн арбанайнгаа нэгэ хубиие Бурхандаа үгэжэл байха ёһотойт. ²⁴ Һохор балай хүтэлэгшэд, таанар унданһаа боргооһо шүүжэ гаргаад, харин тэмээ залгидагта! ²⁵ Хуули заадаг багшанар, фарисейнүүд, таанад гашуудал үзэхэт! Хоёр нюуртан! Таанар аяга табагай газаахиинь аршажа арилгадагта, харин тэдэнэй досоонь хулгай, шуналаар олоһон юумэнүүд байдаг. ²⁶ Һохор балай фарисей! Түрүүшээр аяга табагай досоохиинь сэбэрлэ, тиигээ һаашни газаахиньше сэбэрлэгдэхэ.

²⁷ Хуули заадаг багшанар, фарисейнүүд, таанад гашуудал үзэхэт! Хоёр нюуртан! Таанар сагаан будагаар шэрдэһэн агы нүхэн хуурсагуудта адлит: газаа талаһаа гоё һайханаар харагдаашье һаа, досоогоо үхэхэн хүнэй яһануудаар, элдэб бузарнуудаар дүүрэшэһэн байдаг.

²⁸ Тэрээндэл адли таанаршые газаа талаһаа үнэн сэхэ хүнүүд мэтэ

харагдаашье наа, досоотнай гансал билдагуушалга, харатай юумэнүүд дүүрэн бии.

²⁹ Хуули заадаг багшанар, фарисейнүүд, таанад гашуудал үзэхэт! Хоёр нюурта таанад! Лүндэншэдтэ үзэсхэлэнтэ гоё субаргануудые баринат, үнэн зүбгэнэй шулуун хүшөөнүүдые шэмэглэнэт. ³⁰ Тиихэдээ: „Хэрбээ бидэ үбгэ эсэгэнэрэйнгээ ажамидарха үе сагта ажалуубал, лүндэншэдэй шуна адхалсахагүй хэмди“, – гэжэ айладханаг. ³¹ Тиихэдээ таанар лүндэншэдые алагшадай үри хүүгэдын байханаа баталан гэршэлнэт. ³² Зай, тиигэбэл үбгэ эсэгэнэрэйнгээ эхилхэн юумэ түгэсхэгты. ³³ Могойнууд, хорото могойн таһардахад! Таанар тамада хаягдаха хэһээлтэһээ яажа хулжархые бодонобта? ³⁴ Мүнөө би таанарта лүндэншэдые, сэсэн мэргэшүүлые, Хуули заадаг багшанарые эльгээхэмни. Харин таанар тэдэнэймни заримыень алахат, хэрээһэндэ хадажа саазалхат, нүгөөдүүлыень мүргэлэй гэрнүүдтэ сохихот, нэгэ хотоһоо нүгөөдэ хото руу мүрдэн намнахат. ³⁵ Тиимэхээ газар дээрэ адхархан зэмэгүй хүнүүдэй шуһан – зэмэгүй Авелиин шуһанһаа эхилээд, Бурхан Һүмэ тахилай шэрээ хоёрой хоорондо таанарта алуулхан Варахиинай Захария хүбүүнэй шуһан хүрэтэрөө – таанарһаа нэхэгдэхэ. ³⁶ Эдэ бүхы алагдхан хүнүүдэй түлөө хэһээлтэ энэ үе сагай хүнүүд дээрэ бууха гэжэ таанарта үнэниие хэлэнэб».

Иисус Иерусалимые хайрлана

³⁷ «Ай Иерусалим, Иерусалим, шинии хүнүүд лүндэншэдые аладаг, шамда эльгээһэн Бурханай мэдээсэгшэдые шулуудадаг! Даража дэгжээһэн дальбараануудаа дали дороо суглуулдаг шубуундал адляар шинии үри хүүгэдые суглуулха гэжэ би хэды тэгүүлээ зүдхөө гээшэбиб. Теэд ши намайе зүбшөөгөөгүйш! ³⁸ Тиимэхээ хоһон Һүмэшни мүнөө шамдаа үлөө. ³⁹ „Дээдын Эзэнэй нэрээр заларан Ерэгшэ үршөөл буянтай!“ – гэжэ хэлэтэрээ намайе дахин харахагүйш гэжэ шамда хэлэнэб».

Иисус Бурхан Һүмын хандарха тухай хэлэнэ

24 ¹ Иисус Бурхан Һүмэхөө гараад ябаба. Тиихэ үедэ шабинарын тэрэнэй анхарал Бурхан Һүмын барилгануудта хандуулха зорилготойгоор хажуудань ерэбэ. ² Иисус шабинартаа: «Эдэ бүгэдые харана гүт? Энэ һууринда ганса шулууншые үлэхэгүй; баран хандаргагдаха гэжэ танда хэлэнэб», – гэжэ хэлэбэ.

Тудаха бэрхэшээл зоболонгууд тухай нэргылэмжэ

³ Хожомын Иисусай Элеон хада дээрэ гараад нуухадань, шабинанынь тэрээндэ ерээд: «Эдэ бүхы юумэн хэзээ болохоб, хэлэжэ үгыш. Шинии заларжа ерэхэдэ, газар дэлхэйн хосорходо ямар дүлгэ тэмдэгүүд харуулагдахаб?» – гэжэ асууба.

⁴ Иисус тэдэндэ харюусаба: «Хэн нэгэнэй мэхэдэ орохоһоо болгоомжолжо байгты. ⁵ Юуб гэхэдэ, олон хүнүүд минии нэрые зүүжэ ерэхэ: „Би Бурханай табисууртаб“, – гэжэ өөһэд тухайгаа гэршэлхэ, тиигэжэ олониетнай мэхэдээ оруулха. ⁶ Мүн байлдаанууд тухай, дайн сэрэг тухай нураг дуулахат, теэд бү айгаарайгты. Тиимэрхүү юумэнүүд болохо ёһотой. Зүгөөр энэнь үшөөл эсэс бэшэ байха. ⁷ Нэгэ арад нүгөө арадтаа добтолон орохо, хаан оронууд хоорондоо хёморолдон тэмсэхэ, эндэ тэндэ үлэсхэлэн зоболон, үхэл тахал дэлгэрхэ, газар ехээр хүдэлхэ. ⁸ Зүгөөр эдэ бүхэн бэрхэшээл зоболонгуудай эхиеня лэ табиха. ⁹ Тэрэ үедэ таанарые барижа хааха, тамалха, алаха байха. Минии түлөө таанадые бүхы арадууд үзэн ядаха. ¹⁰ Тиихэдэ олониинь этигэл хүзэгһөө арсаха, бэе бээдээ урбаха, бэе бээ үзэн ядаха. ¹¹ Баһа олон хуурмаг лүндэншэд бии болохо, олон уладай толгой эрыюулэн мэхэдээ оруулха. ¹² Тиигэжэ нүгэл шэбэлэй элбэгжэн дэлгэрхэдэ, олон зоной хайра дуран хүйтэрхэ. ¹³ Зүгөөр эсэстэнь хүрэтэр тэсэжэ гараһаниинь абарагдаха. ¹⁴ Бурханай хаан түрэ тухай һайн мэдээсэлэй бүхы газар дэлхэйгээр, бүхы арадуудта гэршэлэгдэн номногдоһон хойно эсэс болохо.

Нангин газарта аймшагтай юумэнүүдэй болохо тухай

¹⁵ Даниил лүндэншын хэлэһэнэй ёһоор, нэгэтэ нангин газарта хоһоролго һүйдхэлдэ хүргэдэг „жэрхэштэй юумэнэй“ байхые үзэхэт. Эдэ мүрнүүдые уншажа байһан хүн бүхэн ушар удхыень ойлгохыень хэшээг лэ. ¹⁶ Тиихэдэ Иудейдэ байһан хүнүүд хада гүбээ рүү тэрьедээрэйгты. ¹⁷ Гэрэй орой дээрэ байһан зон гэрһээн юумэ абаяа доошоо бү буугаарайт. ¹⁸ Хээрэ талада ябаһан зон хубсаһа хунараа абаяа гэртээ бү бусаарайт. ¹⁹ Тэдэ үдэрнүүдтэ хээлитэй, хүхөөр үхибүүдтэй эхэнэрнүүдтэ ехэл гай зоболон тудаха. ²⁰ Таанарай зугадаха саг үбэлэй хүйтэндэ гү, али субботын үдэртэ бү тудай гэжэ Бурхандаа зальбарайт. ²¹ Юундэб гэхэдэ, тэрэ үдэрнүүдтэ газар дэлхэйн бүтээгдэхэнэ нааша мүнөөнэй үе саг болотор үзэгдөөгүй, дахинаашые үзэгдэхгүй аймшагтай гай зоболон болохо. ²² Хэрбээ

тэдэ зоболонто үдэрнүүдэй тоо Бурханай үсөөрүүлээгүй хаа, хэн-шье абарагдахагүй һэн. Зүгөөр шэлэжэ абahan хүнүүдэйнгээ аша туһада Бурхан тэдэ үдэрнүүдэй тоо үсөөрүүлхэ юм.

²³ Хэрбээ тэрэ сагта: „Бурханай табисуурта Христос эндэ байна“, али „тэндэ байна“ гэжэ таанарта хэн нэгэнэй хэлээ хаа, бү этигээрэйгты. ²⁴ Өөһэдыгөө Бурханай табисуурта гү, али лүндэншэн гэжэ нэрлэһэн олон мэхэшэд бии болохо. Тэдэ аргатайл хаа, Бурханай шэлэжэ абahan хүнүүдыеһе өөрынгөө мэхэдэ оруулхын тула элдэб янзын гайхамшагта тэмдэгүүдые, эди шэди харуулха. ²⁵ Болохо бүхы юумые би таанадта эртэнһээ һэргылжэ хэлэбэб.

²⁶ Хэрбээ танда: „Харыт, тэрэ сүл губида байна“ гэжэ хүнүүдэй хэлэбэл, тиишэ бү ошооройт; үгы хаа, „Харыт, тэрэ эндэ хоргодоно“ гээ хаань, бү этигээрэйт. ²⁷ Хүн түрэлхитэнэй Хүбүүн ерэхэдээ, зүүн зүгһөө баруун хизаар хүрэтэр ялагас гэхэн сахилгаан шэнгээр гэрэлтэн үзэгдэхэ бшуу. ²⁸ Үхэхэн бэеын хэбтэхэн газарта бүргэд шубууд сугларха.

Хүн түрэлхитэнэй Хүбүүнэй заларан ерэхэ тухай

²⁹ Тиигээд зоболонто тэдэ үдэрнүүдэй үнгэрһэн хойно гэнтэ наран балартаха, һарашье гэрэлтэхээ болихо, одо мүшэдшье тэнгэриһээ унаха, тэнгэрийн хүсэнүүдшье тэнсүүриее алдаха. ³⁰ Тиихэдэ тэнгэридэ Хүн түрэлхитэнэй Хүбүүнэй бэлгэ тэмдэг үзэгдэхэ. Тэрэ сагта газар дэлхэйн бүхы угсаатан Хүн түрэлхитэнэй Хүбүүнэй тэнгэрийн үүлэн дээрэ тамаран, агуу хүсэтэйгөөр, алдар солотойгоор буужа ерэхые харахадаа бархиралдаха. ³¹ Шанга дуутай бүреэгэй дуугархада, тэрэ өөрынгөө Эльгээмэлнүүдые замби түбиин дүрбэн хизаарта эльгээхэ, тэдэн тэрэнэй шэлэжэ абahan хүнүүдые огторгойн нэгэ захаһаа нүгөө заха хүрэтэр суглуулха.

Боди модонһоо юумэ һуража абаха тухай

³² Боди модонһоо жэшээ абагты: тэрэнэй халаа мүшэрнүүдэй зөөлэрөөд, набша намаагайнь һалбархада, зун ойртобо гэжэ мэдэдэгта. ³³ Тон тиигэжэл минии түрүүн хэлэхэн юумэнүүдэй болохые үзэхэдөө, саг дүхэжэ байна, бүри ойртоо гэжэ мэдэхэт. ³⁴ Мүнөө ажами-даржа байһан хүнүүдэй бултанайнь үхэжэ үрдээгүй байхада минии таанадта хэлэхэн бүхэн тохёолдохо гэжэ таанадта баталан хэлэнэб. ³⁵ Огторгой тэнгэри, газар дэлхэйшье хүнэн халаха, харин минии хэлэхэн үгэнүүд мүнхэ оршохо.

Ямар үдэр, хэды сагта ерэхье хэншые мэдэхгүй

³⁶Тэрэ Үдэрэй, тэрэ сагай болзор хэншые мэдэхгүй, тэнгэридэ оршодог Бурханай Эльгээмэлнүүдшые мэдэхгүй, Хүбүүн өөрөөшые мэдэхгүй. Гансал Эсэгэ Бурхан тэрэниие мэдэхэ юм. ³⁷Хүн түрэлхитэнэй Хүбүүнэй заларжа ерэхэдэ Ной гэгшын үедэ болоһонтой адли гай гасалан ушарха. ³⁸Уһан галабай эрьехын урда тээхи үдэрнүүдтэ Нойн томо корабльда орожо һууха үдэр хүрэтэр хүнүүд эдеэлжэ, уужа, һамга абажа, хадамда гаража байгаа. ³⁹Уһан галабай эрьежэ, бултыень шэнгээжэ хосороотор хүнүүд юунэй боложо байһые огто мэдээгүй. Эгээл тиимэ юумэн Хүн түрэлхитэнэй Хүбүүнэй ерэхэдэ болохо. ⁴⁰Тэрэ сагта таряалан дээрэ ажаллажа байһан хоёр хүнэй нэгыень абарха, нүгөөдыень орхихо. ⁴¹Сугтаа таряа тээрмэдэжэ байһан хоёр эхэнэрэй нэгыень абарха, нүгөөдыень орхихо. ⁴²Тиимэхээ һэргэлэн байгты, Дээдын Эзэнэйгээ али сагта заларжа ерэхье таанар мэдэнгүй ха юмта. ⁴³Хэрбээ гэрэй эзэн хулгайшанай хэдыдэ орожо ерэхье мэдэжэ байбал, һэргэлэн байжа, хулгайшаниие гэртээ шургуулан оруулхагүй һэн бээ гэжэ таанар һайн мэдэнэт. ⁴⁴Тиимэхээ таанаршые ходо бэлэн байгты, юундэб гэбэл, Хүн түрэлхитэнэй Хүбүүн хүлээгээгүй сагтатнай хүрэжэ ерэхэ юм.

Найдабаритай ба найдабаригүй зарасанар тухай

⁴⁵Тиигэхэдээ этигэл найдабаритай, ухаантай зарасань хэн бэ? Бусад зарасанараа даалгажа, эдэ хоолыень сагтань үгэжэ байхаар гэрэй эзэн хэниие томилхо гээшэб? ⁴⁶Эзэнэйнгээ бусажа ерэхэдэ, үүргээ һайнаар дүүргэжэ байһан зараса аза жаргалтай даа! ⁴⁷Тиимэ зарасаа эзэн гэр буусынгаа эрхилэгшээр табиха гэжэ танда баталан хэлэхэ байнаб. ⁴⁸Хэрбээ муу зараса дайралдабал: „Эзэмни һаяар ерэхгүй“, – гэжэ бодоод, ⁴⁹өөрынгөө зараса нүхэдые сохижо наншажа, архиншадаар хамта эдижэ, уужа байгаа һаа, ⁵⁰тэрэ зарасын хүлээгээгүй үдэртэ, һанаагүй сагта эзэниинь орожо ерэхэ. ⁵¹Тиигээд эзэн тэрэ зарасаяа зада сохёод, билдагуушадые хэһээдэг хэһээлтэдэ оруулха: тэндэнь хүнүүд бархиралдаха, шүдөө хабиралдаха».

Арбан басагад тухай һургаалта үгэ

25 ¹«Тэрэ үедэ Огторгойн хаан түрэ иимэ ушартай адлишуу байха: Нэгэтэ арбан басагад өөһэд өөһэдынгөө зула баряад, хүрыгэн хүбүүе угтахаяа газашаа гараба гэхэ. ²Тэдэнэй табаниинь сэсэн,

табаниинь бодомжогүй гэнэг байгаа нэн гэлэй. ³ Бодомжогүй басагадын зулаяа абаад, тоно абаагүй. ⁴ Сэсэн басагадын зулатаяа хамта амһарта соо тоно абажа гаралсаа. ⁵ Тиигээд хүргэн хүбүүнэй удаархада, тэдэ басагад нажажа байһанаа унташаба. ⁶ Һүнийн тэн болоходо: „Зай, хүргэн хүбүүн эндэ ерэжэ ябана, тэрэнээ угтахаяа гарагты“, – гэжэ хэншьеб шангаар дуугарба. ⁷ Тиихэдэнь арбан басагад булта бодожо, өөһэд өөһэдынгөө зула заһажа оробо. ⁸ Тэнэг басагадын сэсэн басагадтаа хандажа: „Өөһэдынгөө тоһонһоо манда үгэлсыт, зуламнай унтархаяа байна“, – гэбэ. ⁹ Тиихэдэнь сэсэн басагадын: „Манда байһан тоно бултандамнай хүрэхэгүй, тиимэһээ таанар наймаашадта ошоод, өөһэдтөө тоно худалдажа абагты“, – гэжэ харюусаба. ¹⁰ Бодомжогүй басагадай тоно худалдажа абахаяа ошоходонь, хүргэн хүбүүн ерэбэ. Зүгөөр бэлэн байһан сэсэн басагадын хүргэн хүбүүнтэй хамта түрэ найрта ошобо, тиин үүдэнүүдыншье хаагдаба. ¹¹ Удаань нүгөөдэ басагад ерээд: „Эзэн! Эзэн! Манда үүдээ нээгыш“, – гэжэ хашхаралдаба. ¹² Теэд хүргэн хүбүүн: „Үгы даа, би таанарые танихагүйб“, – гэжэ харюусаба.

¹³ Тиигээд Иисус түгэхэлдэнь: «Тиимэһээ таанар ходо һэргэ байгты, юундэб гэбэл, Хүн түрэлхитэнэй Хүбүүнэй ерэхэ үдэрьешье, сагыешье мэдэнэгүй ха юмта», – гэжэ шабинартаа хэлэбэ.

Гурбан зараса тухай һургаалта үгэ

¹⁴ «Тэрэ үедэ Огторгойн хаан түрэ иимэ ушартай адлишуу байха: Нэгэ гэрэй эзэн холын аянда гарахынгаа урда тээ зарасанараа дуудажа, тэдэндээ зөөри хогшолоо даалгаба. ¹⁵ Эзэн зарасанарайнгаа абьяас шадабари мэдэжэ байгаад, хүн бүридэнь шадал абьяасайнь зэргээр мүнгэ үгэбэ: нэгэндэнь табан мянган алтан мүнгэ, нүгөөдэдэнь хоёр мянган алтан мүнгэ, гурбадахидань нэгэ мянган алтан мүнгэ барюулба. Тиигээд аяндаа мордобо. ¹⁶ Табан мянган алтан мүнгэ абаһан түрүүшын зарасань мүнгээ ашагтайгаар эрьесэдэ оруулжа, үшөө табан мянган алтан мүнгэнэй ашаг олзотой болобо. ¹⁷ Тэрээндэл тон адляар хоёр мянган алтан мүнгэ абаһан зарасань мүнгээ эрьесэдэ оруулаад, үшөө хоёр мянган алтан мүнгэнэй ашаг олзо олобо. ¹⁸ Харин нэгэ мянган алтан мүнгэ абаһан зарасань эзэнэйгээ мүнгэ газарта булажа нюуба.

¹⁹ Нилээд удаан сагай үнгэрһэн хойно эзэн гэртээ бусажа ерээд, зарасанартайгаа тоосоо хэбэ. ²⁰ Табан мянган алтан мүнгэ абаһан зарасань абаһан мүнгэтээ хамта үшөө ондоо табан мянган алтан

мүнгэ абажа ерээд: „Эзэн аа! Ши намда табан мянган алтан мүн­гэ үгөө бэлэйш. Би тэрээгээршни үшөө табан мянган алтан мүн­гэ олооб“, – гэжэ хэлэбэ. ²¹ Эзэнийнь тэрээндэ: „Ехэ хайн! Ши бэрхэ, найдабаритай зараса байнаш! Бага юумэ эрхилхэдээ ши найдабари­тай байбаш, тиимэхээ би шамда бүришье ехэ юумэ даалгахамни! Орожо, эзэнтэйгээ хамта баярла“, – гэбэ. ²² Мүн хоёр мянган ал­тан мүн­гэ абаһан хүнийнь ерэжэ: „Эзэн аа! Ши намда хоёр мян­ган алтан мүн­гэ үгөө бэлэйш, би тэрээгээршни үшөө хоёр мян­гы олооб“, – гэжэ хэлэбэ. ²³ Эзэнийнь тэрээндэ: „Ехэ хайн! Ши бэрхэ, найдабаритай зараса байнаш! Бага юумэ эрхилхэдээ ши найдабари­тай байбаш, тиимэхээ би шамда бүришье ехэ юумэ даалгахамни! Орожо, эзэнтэйгээ хамта баярла“, – гэбэ. ²⁴ Мүн нэгэ мянган алтан мүн­гэ абаһан зараса ерэжэ: „Эзэн аа! Би шамайе шэрүүн хатуу хүн гэжэ мэдэнэб. Ши таряагүй байһан газарһаа хуряадагши, үрэхэ сасаагүй байһан газарһаа ургаса суглуулдагши. ²⁵ Айһандаа би ши­нии үгэхэн мянган алтан мүн­гэ газарта булажа нюугааб. Энэ мүн­гэншни байна“, – гэбэ. ²⁶ Эзэнийнь тэрээндэ: „Хара ханаатай, зал­хуу зараса! Ши намайе таряагүй байһан газарһаа хуряадаг, үрэхэ сасаагүй байһан газарһаа ургаса суглуулдаг гэжэ мэдэжэ байгааш, тиимэ гү? ²⁷ Тиимэхээ ши минии мүн­гэ ядахадаа наймаашадта үгэ­жэ эрьесэдэ оруулха байгааш, тиигээ хаашни би бусажа ерэхэдээ мүн­гээ нэмэритэйгээр абаха бэлэйб“, – гэбэ. ²⁸ Тиигээд эзэн: „Энээнһээ мүн­гыень абаад, арбан мянган алтан мүн­гэтэй хүндэ үгэгты. ²⁹ Ушарынь хэлэбэл, юумэтэй хүндэ үшөө ехэ юумэн үгтэхэ, тиимэ хүн бүри элбэг дэлбэг юумэтэй байха; харин юумэгүй байһан хүн­һөө һүүлшынхинь абтаха. ³⁰ Харин энэ хэндээш хэрэггүй зара­сые газашань, шэб харанхыда абаашаад хаягты: тэндэ хүнүүд бар­хиралдаха, шүдөө хабиралдаха“, – гэбэ».

Һүүлшын зарга шүүбэри тухай

³¹ «Хүн түрэлхитэнэй Хүбүүн алдар солотойгоор бүхы Эльгээмэл­нүүдтэйгээ хамта ерэхэдээ, өөрынгөө алдарта шэрээдэ һууха. ³² Бүхы арадуудые тэрэнэй урда суглуулха. Тиихэдэнь хонишоной хонидые ямаануудһаа илгадагтал адляар тэрэ хүнүүдые бэе бэеһээн илгажа, хоёр бүлэг болгожо хубааха. ³³ Тиигээд хонидые баруун таладаа, харин ямаануудые зүүн таладаа байлгаха. ³⁴ Тиигээд хаан тэрэнэй баруун талада байгаашадта хандажа: „Минии Эсэ­гын үршөөл хайра­да хүртэгшэ таанад ерэжэ, юртэмсэ дэлхэйн бии болохоһоо нааша

таанарга бэлдэгдэн хаан түрэ халан абагты. ³⁵ Минии үлэн хоонон ябахата, таанар намда эдихэ юумэ үгөөт; ундаа хүрөөд ябахатамни, ууха юумэ үгөөт; аяншалжа ябахатамни, намайе гэртээ угтажа абаат; ³⁶ нюсэгэн байхатамни, үмдэхэ хубсаһа хунар үгөөт; үбшэн байхатамни, хойноһоомни харууһалаат; түрмэдэ һуухатамни, намтай уулзахаяа ерээт“, – гэжэ үнэн зүбтэндэ хэлэхэ. ³⁷ Тиихэдэнь үнэн зүбтэн тэрээндэ: „Дээдын Эзэн! Хэзээ бидэ шамайе үлэн хоонон ябахыешни хараад, эдихэ юумэ үгөөбибди? Али хэзээ ундаа хүрөөд ябахаташни, ууха юумэ үгөөбибди? ³⁸ Хэзээ шинии аяншалжа ябахата, бидэ шамайе гэртээ угтажа абаабибди? Али нюсэгэн байхаташни, үмдэхэ хубсаһа хунар үгөөбибди? ³⁹ Хэзээ шинии үбдөөд байхата гү, али түрмэдэ һуухаташни гү, бидэ шамтай уулзахаяа ошообибди?“ – гэжэ һураха. ⁴⁰ Тиихэдэнь хаан: „Эгээлэй юрын минии дахагшатай нэгэндэнь тиимэ һайн юумэ хэхэдээ, таанар намдашые һайниие хээ гэшэ“, – гэжэ харюусаха.

⁴¹ Тиигээд хаан тэрэнэй зүүн талада байгаашадта хандан: „Бурханай хараалда хүртэгшэ таанар, намһаа холо бологты! Шолмосто, мүн тэрэнэй эльгээгдэмэлнүүдтэ бэлдээтэй хэтэ заяанай гал тамада ошогты! ⁴² Минии үлэн хоонон ябахата, намда эдихэ юумэ һарбайгаагүй һэнта; ундаа хүрөөд ябахатамни, ууха юумэ үгөөгүй һэнта; ⁴³ аяншалжа ябахатамни, гэртээ угтажа абаагүй һэнта; нюсэгэн байхатамни, үмдэхэ хубсаһа хунар үгөөгүй һэнта; үбдөөд байхатамни, түрмэдэ һуухатамни, намтай уулзахаяа ерээгүй һэнта“, – гэжэ буруутан зондо хэлэхэ. ⁴⁴ Тиихэдэнь тэдэнь: „Дээдын Эзэн! Хэзээ бидэ шинии үлэн хоонон, ундаа хүрөөд ябахые, аяншалжа ябахые, нюсэгэн байхые, үбдэхые, түрмэдэ һуухые хараад, шамда туһалаагүй гэшэбибди?“ – гэжэ хаанһаа һураха. ⁴⁵ Тиихэдэнь хаан тэдэндэ: „Тон эгээлэй юрын хүнүүдэймни нэгэндэньшые тиимэ туһа хүргэхэе арсахада, таанар намдашые туһалхаяа арсаба гэшэ“, – гэжэ харюусаха. ⁴⁶ Тиигээд тэдэ буруутан зон хэтэ заяандаа хэхээгдэхэ, харин Бурханай һайшаалда хүртэнэн зон мүнхын амидалда хүртэхэ».

Иисусые алаха гэнэн нюуса хэлсэн тухай

26 ¹ Иисус эдэ бүхы һургаалнуудаа номножо дүүргээд, өөрынгөө шабинарта хандан: ² «Хоёр хоноод, Паасхын һайндэр болохо гэжэ мэдэнэт, тиихэдэ Хүн түрэлтэнэй Хүбүүниие хэрээһэндэ хадажа саазалха», – гэжэ хэлэбэ.

³ Тэрэ сагта түрүү санаартан, Хуули заадаг багшанар, улад зоной ахамадууд Кайафа гэдэг ахамад санаартын ордондо сугларба. ⁴ Тэдэ Иисусые мэхэдээ оруулжа бариха, тиигээд алаха тухай зүбшөө бэлэй. ⁵ Теэд улад зоной дунда буһалгаанай үүсхэгдэхэгүйн тула хайндэртэ тиймэ юумэ хэхэгүй гэжэ хэлсээ һэн.

Бетанида Иисусые хангалтай ургамалай шүүһээр түрхинэ

⁶ Иисусай Бетанида һэлхэ үбшэндэ дайруулһан Симонэй гэртэ хоол барижа байхадань, ⁷ нэгэ эхэнэр домбо соо ехэ үнэтэй хайхан хангалтай тоһо абажа ерээд, Иисусай толгой дээрэнх адхаба. ⁸ Иисусай шабинар энээниие хараад, сухалаа хүрэжэ: «Юундэ иимэ гарза гаргана гээшэб?» – гэжэ дураа гутаба. ⁹ «Энэ тоһыень ехэ үнэтэйгөөр худалдаад, мүнгыень үгытэйшүүлдэ хубаажа үгэхэ байгаабди», – гэлсэбэ тэдэ.

¹⁰ Теэд Иисус шабинарайгаа хэлэжэ байһые мэдэжэ байгаад, тэндэндэ хандан: «Энэ эхэнэрые юундэ түбэгшөөлгэбэт? Тэрэ намда ехэл хайн юумэ хэбэл. ¹¹ Үгытэй ядуушуул хододоо таанартай байхал, харин би таанартай ходо байхагүйб. ¹² Энэ эхэнэр нам дээрэ тоһо адхахадаа бэеымни хүдөөлүүлгэдэ бэлдэбэ гээшэ. ¹³ Хайн Мэдээсэлэй бүхы газар дэлхэйгээр хаа хаанагүй номногдоходо, энэ эхэнэрэй хэһэн хэрэг тухай хүнүүд дурсан һанажа байха, хэлэжэ байха гэжэ би таанадта баталнаб», – гэбэ.

Иудын урбалга

¹⁴ Тэрэ хирэдэ, арбан хоёр шабинарайнь нэгэн болохо Искариодой Иуда түрүү санаартанда ошоод: ¹⁵ «Иисусые таанадта барижа үгэбэлни, таанар намда юу үгэхэбта?» – гэжэ һураба. Тиихэдэнх түрүү санаартан Иудада гушан сагаан мүнгэ тоолоод үгэбэ. ¹⁶ Иуда тэрэ саһаа хойшо Иисусые барижа үгэхэ таарамжатай нүхэсэл харгалзадаг болоо.

Иисус шабинартаяа хамта Паасхын хоол барина

¹⁷ Эһээгдээгүй хилээмэнэй хайндэрэй түрүүшын үдэртэ шабинарынх Иисуста ерээд: «Паасхын хоол шамда хаана бэлдэхыемнай ши хүсэхэ байнабши?» – гэжэ һураба.

¹⁸ «Тиймэ нэгэ хүндэ хото ошоод: „Минии саг ойртобо, би шабинартаяа хамта Паасхын хоол гэртэшни барихамни гэжэ багшамнай хэлэнэ“, – гээд хэлээрэйгты», – гэжэ Иисус шабинартаа захиба.

¹⁹ Шабинанын Иисусай хэлэһэн ёһоор боложо, Паасхын хоол бэлдэбэ.

²⁰ Үдэшэ болоходо, Иисус арбан хоёр шабинартаяа хамта хоол барихаяа һууба. ²¹ Эдээлжэ байха үедөө Иисус: «Таанарай нэгэнтнай намайе барижа үгэхэнь, би баталан хэлэнэб», – гэбэ.

²² Тиихэдэнь шабинанын ехэл уйдажа, хойно хойноһоон багшаһаа: «Дээдын Эзэн, би бэшэ аабзаб?» – гэжэ һураба.

²³ «Намтай хамта энэ табак соо хилээмээ дүрэхэн хүн намайе барижа үгэхэ», – гэжэ Иисус тэдэндэ харюусаба. ²⁴ «Хүн түрэлхитэнэй Хүбүүн Нангин Бэшэг соо хэлэгдэхэнэй ёһоор үхэхэ. Харин тэрээниие барижа үгэхэн хүн аймшагтай гай зоболон амсаха: тэрэ хүнэй юрэдөө түрөөгүй һаань, өөртэнь һураггүй дээрэ байха һэн».

²⁵ Мүн Иисусые барижа үгэхээ байһан Иудашье: «Рабби, би бэшэ аабзаб?» – гэжэ һураба. Иисус тэрэндэ: «Ши өөрөө тиигэжэ хэлэбэш», – гэжэ харюусаба.

Дээдын Эзэнэй үдэшин хоол

²⁶ Хоол барижа байхадаа Иисус гартаа хилээмэ абаад, Бурханда баяр баясхалан хүргөөд, тэрэнэ хухалаад, шабинартаа хубаажа үгэхэ зуураа: «Энээниие абаад эдигты – энэ минии махабад бэе гээшэ», – гэбэ.

²⁷ Тиигээд аяга абаад, Бурханда баяр баясхалан хүргөөд, шабинартаа үгэбэ. «Эндэхэ таанад булта уугты. ²⁸ Энэ болбол олон хүнүүдэй нүгэл шэбэлнүүдые хүлисүүлхын тулада адхарха минии шуһан гээшэ, тиин энэ шуһаар Бурхан хүнүүдтэй Шэнэ Хэлсээ батална. ²⁹ Энээнһээ хойшо минии Эсэгын хаан орондо таанартай хамта шэнэ* дарһа амсаха үдэрэй болотор би архи дарһа уухагүйб гэжэ таанарта хэлэхэб», – гэбэ. ³⁰ Тиигээд тэдэнэр магтаал дуу дуулаһаар Элеон хада дээрэ гараба.

Иисус Пётрой арасаха тухай хэлэнэ

³¹ Тэрэ үедэ Иисус шабинартаа: «Энэл хүниндөө таанар бултадаа намһаа арасажа холодохот, ушарын гэбэл:

*„Хонишоничень дайража һалгаахадамни,
һүрэг хонидын тарашаха“, – гэжэ Нангин Бэшэг соо хэлэгдэнэ.*

* Энэ үгые «дахин» гэхэн удхатайгаар тайлбарилжа болохо юм.

³² Харин амидырхан хойноо би таанадай түрүүндэ Галилейдэ ошоод байхаб», – гэбэ.

³³ «Бултанай шамайе орхёошье хаань, би шамһаа хэзээшье арсахагүйб», – гэжэ Пётр тэрээндэ хэлэбэ.

³⁴ «Энэ хүни эрэ тахяагай дуугархаһаань урда ши намһаа гурба дахин арсахалши даа гэжэ баталан хэлэнэб», – гээд Иисус Пётрто хэлэбэ.

³⁵ Пётр урдаһаань: «Шамтай хамта үхэхэшье болобол, би шамһаа арсахагүйб», – гэбэ. Бусадшье шабинарынь бултадаа тиимэ юумэ хэлэбэ.

Иисус Гефсимани сэсэрлиг соо зальбарна

³⁶ Удаань Иисус шабинартайгаа хамта Гефсимани гэдэг газарта ерээд, тэдэндэ: «Минии тэндэ ошожо зальбараад ерэтэр эндээ һуужа байгты», – гэжэ хэлэбэ.

³⁷ Иисус Пётрые, Зэбэдэйн хоёр хүбүүдые абажа ошобо. Тэрэ ехэл гашуудажа, ехэл ханаагаа зобожо, ³⁸ абажа гараһан шабинартаа: «Минии ами хүнэһэн туйлай ехээр уйдажа, үхэхэндэл адли байнаб. Таанар эндэ намтай хамта хэргэг байгты», – гэбэ.

³⁹ Тиигээд тээ хажуу тээшээ ошожо, уруугаа харан газар дээрэ хэбтээд:

«Эсэгэмни! Хэрбээ арга бии хаа, энэ аягаһаа амсуулангүй, иимэ ехэ зоболон намһаа зайлуулыш даа. Гэбэшье минии дура хүсэлөөр бэшэ, харин шинии эрхэ хүсэлөөр болог лэ», – гэжэ зальбарба.

⁴⁰ Удаань шабинартаа бусажа ерэхэдэнь, тэдэнь унтажа байба. Тиимэһээ тэрэ Пётрто хандан: «Таанар гансаханшье саг соо унтангүй, намтай хэргэлэн байлсаха аргагүй гээшэ гүт? ⁴¹ Хорхойтуулгада абтахагүйн тула таанад хэргэг байгты, зальбарагты: сэдхэл дорюуншье хаа, бэе махабад ахир һула бшуу», – гэжэ хэлэбэ.

⁴² Иисус дахин хажуу тээшээ ошожо: «Эсэгэмни! Хэрбээ энэ аягаһаа амсуулангүй, энэ зоболон намһаа зайлуулха аргагүй хаа, шинии дура хүсэлөөр болог лэ», – гэжэ зальбарба. ⁴³ Тэрэнэй шабинартаа ерэхэдэнь, тэдэнь баһал унтажа байба. Тэдэнэй нюдэниинь анилдаад нээгдэжэ үгэнгүй байгаа бшуу.

⁴⁴ Иисус дахин тэдэнээ орхижо, хажуу тээшээ ошоод, түрүүн зальбарһандаал адляар гурбадахияа зальбарба. ⁴⁵ Тиигээд тэрэ шабинартаа ерээд: «Таанад үшөөл унтажа, амаржа байна гүт? Зай,

иигээд Хүн түрэлхитэнэй Хүбүүнэй нүгэл үйлэдэгшэдэй гарта тушаагдаха саг ерэбэ даа. ⁴⁶ Бодогты, ябаябди: намда урбагша тээ тэрэ ойртожо ябана», – гэжэ хэлэбэ.

Иисусые барижа абаба

⁴⁷ Иисусай иигэжэ хэлэжэ байтарнь, арбан хоёр шабинарайнь нэгэн болохо Иуда ерэбэ. Тэрээнтэй хамта түрүү санаартанай, улад зонной ахаматуудай, Хуули заадаг багшанарай эльгээхэн хэлмэ, шиидам хаднаг бариһан олон зон байба. ⁴⁸ Урбагша хамта ябаһан зондоо ямар дохёо тэмдэг үгэхэ тухайгаа хэлсэжэ: «Минии таалан мэндэшэлхэ хүн танда хэрэгтэй хүн гээшэ, тэрэниие баряарайгты», – гэбэ.

⁴⁹ Иуда сэхэ Иисуста дүтэлэн ерэжэ: «Рабби, амар мэндэ!» – гэмсээрээ тэрээниие таалаба.

⁵⁰ Иисус тэрээндэ: «Нүхэр, ши ханаашалһан юумээ гүйсэдхэ*», – гэбэ.

Тиихэдэнь ерэхэн хүнүүд ойртожо, Иисусые бариба.

⁵¹ Иисустай байлсаһан нэгэ хүн хэлмээ гаргажа далайгаад, ахамад санаартын зарасын шэхые таһа сабшаба. ⁵² Тиихэдэнь Иисус шабидаа: «Хэлмээ байрандань бусаажа хэ. Хэлмэ баригшад булта хэлмэхэ хосорхо юм. ⁵³ Мүнөө Эсэгэхэ туһаламжа гуйхатаймни сасуу намда Эльгээмэлнүүдэй арбан хоёр сэрэгхэ үлүү ехэ сэрэг тэрэ дороо ябуулха аргатай гэжэ мэдэнэгүй аалши? ⁵⁴ Теэд тиимэ юумэ гуйбални, Нангин Бэшэг соо хэлээтэй байһан юумэнүүд яжа бүтэхэб?» – гэжэ хэлэбэ.

⁵⁵ Тиигээд Иисус зэбсэгтэй ерэхэн улад зондо хандажа: «Таанар дээрмэшэниие барихаяа гараһандал хэлмэ, шиидам хаднагтайгаар намайе барихаяа ерэбэ гүт? Теэд үдэр бүхэн таанадые Бурхан Хүмэ соо хургахадамни намайе барижа хаадаггүй бэлэйлта», – гэбэ. ⁵⁶ Эдэ бүхы ушарнууд Нангин Бэшэг соо лүндэншэдэй бэшэхэн мүнүүдэй бээлхын тула болоо.

Тиихэдэнь Иисусай шабинарын булта тэрэнээ орхёод, зугадаба.

Иисус Зүблэлэй гэшүүдэй урда зогсоно

⁵⁷ Иисусые барижа абаһан хүнүүд тэрээниие Кайафа гэдэг ахамад санаартын гэртэ хүтэлжэ абаашаба. Тэндэнь Хуули заадаг багшанар, ахаматууд суглараад байгаа. ⁵⁸ Пётр зай баряад ахамад санаартын

* Энэ зүйлые «Ши юундэ ерээбши?» гэжэ тайлбарилжа болохо юм.

хорёо хүрэгэр Иисусай хойноһоо гэтэн ябаа. Тиигээд хорёо соо оро-жо, юунэй болохые харахаяа харуулшадаар хамта һуулсаба. ⁵⁹ Түүрү санаартан, ахамадууд, Зүблэлэй гэшүүд булта Иисусые үхэлэй саа-зада хүртөөхэ ханаатай байгаа. Тиимэһээ тэдэнэр Иисусые гэмнэхэ хуурмаг гэршэ баримта бэдэрбэ, ⁶⁰ теэд олон худал гэршэнэрэй ерээд, тэрээн тухай худал юумэ хэлэбэшье, хэрэгтэйнүүдые олобо-гүй. Һүүлэй һүүлдэ хардаха хоёр гэршэнэр ерээд:

⁶¹ «„Би Бурхан Һүмые бута буулгаад, гурбан үдэр соо дахин бод-хоожо шадахаб“ гэжэ тэрэнэй хэлэхые дуулаа һәмди», – гэбэд.

⁶² Тиихэдэнь ахамад санаарта бодожо, Иисуста хандан: «Ши юундэ харюусанагүйбши? Шамайе зэмэлһэн гэршэлгэнүүдые дуу-ланагүй гүш?» – гэжэ һураба.

⁶³ Теэд Иисус юумэ дуугарбагүй. Тиихэдэнь ахамад санаарта тэ-рээндэ: «Амиды Бурханай урда тангариглан ши манда хэлэжэ үгэ, ши Бурханай табисуурта, Бурханай Хүбүүниинь гүш?» – гэжэ хэлэбэ.

⁶⁴ Иисус тэрээндэ: «Ши тиигэжэ хэлээш. Харин би та бүхэндэ иигэжэ хэлэхэб:

*Мэнэ гэхээр таанад
Хүн түрэлхитэнэй Хүбүүе
Һүр хүсэтэй Бурханай
баруун талада һуухыень,
тэнгэриин үүлэнүүд дээрэ
тамаран ерэхыень үзэхэт», – гэбэ.*

⁶⁵ Тиихэдэнь ахамад санаарта хубсаһаяа шуу татаад: «Энэшни Бур-ханиие доромжолжо байна! Бидэндэ үшөө ямар гэршэ хэрэгтэйб? Мүнөө һая энээнэй Бурханиие доромжолхыень дуулабат! ⁶⁶ Таанад юун гэжэ һананабта?» – гэхэдэнь,

«Энэшни зэмэтэй, үхэлэй саазада хүртэхэ ёһотой», – гэжэ булта харюусаба.

⁶⁷ Тиигээд тэдэнэр Иисусай нюур руунь нёлбобо, нюдаргаараа сохибо, зариман тэрэнэй хасарые альгадажа байгаад: ⁶⁸ «Бурханай табисуурта Христос, манда абарал буулгыш! Шамайе хэн сохёоб гэ-жэ манда хэлэжэ үгыш!» – гэбэ.

Пётр Иисусаа арсаба

⁶⁹ Пётрой газар хорёодо һуухадань, нэгэ зараса һамган тэрээндэ ерэжэ: «Ши баһал Галилейн Иисустай хамта байлсаа һэнши», – гэбэ.

⁷⁰Тээд Пётр: «Шинии юун тухай хэлэжэ байһыешни би огто мэдэнэгүйб», – гээд бүгэдын урда мэлзэбэ. ⁷¹Баһа хорёогой үүдээр Пётрой гаража ябахадань, ондоо зараса хамган тэрээниие хараад: «Энэ хүн баһа Назаредэй Иисустай ябалсаа хэн», – гэжэ тэндэ байһан хүнүүдтэ хэлэбэ.

⁷²«Би тэрэ хүниие огто танихагүйб», – гэжэ Пётр тангариглан мэлзэбэ.

⁷³Нэгэ хэды болоод, тэндэ байһан хэдэн хүн Пётрто дүтэлжэ: «Ёһоороо ши тэдэнэй нэгэн ха юмши, тиигээд аялга дууншни шамайе Галилейһээш гэжэ элирхэйлнэ», – гэбэ.

⁷⁴«Энэ хүниие би огто мэдэхэгүйб», – гэжэ Пётр Бурханиие дурдажа байгаад тангариглаба.

Эгээл тэрэ үедэ гэнтэ эрэ тахья дуугарба. ⁷⁵Тиихэдэнь Пётр: «Эрэ тахягай дуугархаһаань урда ши намһаа гурба дахин арсахалши даа», – гэжэ Иисусай хэлэһые ханажархиба. Тиигээд тэндэһээ гараад, гунигтайгаар уйлаба.

Иисусые Пиладта асарба

27 ¹Үглөөгүүр болоходо, хамаг түрүү санаартан, улад зоной ахамдууд эртэхэн сугларжа, Иисусые үхэлэй саазада хүртөөхэ гэжэ зүбшэн шиидэбэ. ²Иисусые тэдэ гэнжээр хүлээд, Пиладта* абаашажа тушааба.

Иудын хосорһон тухай

³Иисуста урбаһан Иуда Иисусые үхэлэй саазада хүртөөхэнь гэжэ дуулахадаа, буруу хэрэг үйлэдэһэнөө мэдэрэн гэмшэжэ, түрүү санаартанда, улад зоной ахамдуудта гушан сагаан мүнгыень бусаажа асараад: ⁴«Гэм зэмэгүй хүниие барижа үхэлэй саазада хүртүүлхэдээ би нүгэл үйлэдэбэб», – гэбэ.

Нүгөөдүүлһынь: «Тэрэшни манда ямар хамаатай юм? Шинии хэрэг ха юм», – гэжэ харюусаа хэн.

⁵Иуда асарһан мүнгэээ Һүмэ соо хаяад, газаашаа гаража, боожо үхэбэ. ⁶Түрүү санаартан хаяһан мүнгыень суглуулаад: «Энэ мүнгые хүнэй ами хороохо зорилготойгоор түлөө, тиимэһээ энээниие Һүмын һанда табиха хэрэггүй», – гэжэ хэлсэбэ. ⁷Тиигэжэ зүбшэлдэһэн хойноо тэдэнэр мүнгөөрнь шабар амһарта хэдэг нэгэ хүнһөө

* Иудейн можодо дүүрэн эрхэтэй Римэй захирагша.

газар худалдажа абахаар болобо. Тэрэ газар дээрэнь нүгшэһэн хариин зониие хүдөөлүүлжэ байха гэжэ шиидээ бэлэй. ⁸ Тиимэхээ тэрэ газарые хүнүүд мүнөө хүрэтэр «Шуһан талмай» гэжэ нэрлэдэг.

⁹ Тиигэжэ Иеремия лүндэншын иигэжэ хэлэһэниинь бүтөө: «Израилиин зоной тэрэнэй түлөө түлэһэн гушан сагаан мүнгэ абаад, ¹⁰ тэрээгээрнь шабар амһарта хэдэг нэгэ хүнһөө газар худалдажа абаа. Тиигэжэ Дээдын Эзэн намда захираа».

Пиладай Иисусые мушхэһэн тухай

¹¹ Иисусые Римэй засаглагша Пиладай урда асаржа байлгаба. Тэрэ захирагша Иисусаа: «Ши еврейнүүдэй хаан гүш?» – гэжэ һураба. «Ши тиигэжэ хэлэнэш», – гэжэ Иисус харюусаба. ¹² Теэд түрүү санаартанай, ахаматуудай Иисусые зэмэлхэдэнь, тэрэ харюу үгэбэгүй.

¹³ Тиихэдэнь Пилат: «Шамаие иимэ олон хэрэгүүдгэ гэмнэжэ байһые ши дууланагүй гүш?» – гэбэ. ¹⁴ Теэд Иисус харюудань юушые хэлэбэгүй, тиихэдэнь Пилат аргагүй ехээр гайхаа һэн.

Иисусые үхэлэй саазада хүртөөбэ

¹⁵ Паасхын һайндэрэй болоходо, захирагша улад зоной таби гэһэн хаалгада һуугшадай нэгыень сүлөөдэ табидаг заншалтай байгаа. ¹⁶ Тэрэ сагта улад зондо һайн мэдээжэ Иисус Барабба гэдэг хүн түрмэдэ һуугаа. ¹⁷ Тиин улад зоной суглархадань, Пилат тэдэнһээ: «Таанар ямар хүниие сүлөөдэ табюулха дуратай байнабта: Иисус Бараббые гү, али Бурханай табисуурта Христос гэжэ алдаршаһан Иисусые гү?» – гэжэ һураба. ¹⁸ Иисуста атаархажэ байһан дээрэһээ еврейнүүдэй захирагшад тэрээниие барижа асараа гэжэ Пилат һайн мэдэжэ байгаа.

¹⁹ Пиладай зарга шүүбэри хэдэг газарта һуухадань, тэрэнэй һамганиинь: «Тэрэ ямаршые гэм зэмэгүй хүндэ муу юумэ бү хэ, юундэб гэбэл, мүнөө һүни зүүдэндэ би тэрэнэй түлөө ехэл зобооб», – гэһэн мэдээсэлтэйгээр хүниие ябуулба.

²⁰ Гэбэшые түрүү санаартан, ахаматууд Бараббые сүлөөдэ табиһыень, харин Иисусые үхэлэй саазада хүртөөхыень гуйгты гэжэ улад зониие идхаба. ²¹ Пилат улад зонһоо: «Эдэ хоёрой хэниинь танда табихабиб?» – гэжэ дахин асууба.

«Бараббые», – гэжэ зон харюусаба.

²² Пилат тэдэнһээ: «Бурханай табисуурта Христос гэжэ алдаршаһан Иисусые би яаха болонобиб?» – гэжэ һураба.

«Тэрээниие хэрээхэндэ хада!» – гэжэ улад зон бүгэдэ харюусажа байгаа.

²³ «Ямар гэмтэй юумэ тэрэ хээб?» – гэжэ засаглагша нураба.

Тээд улад зон: «Тэрээниие хэрээхэндэ хада!» – гэжэ бүри шангаар гааралдан хашхарба. ²⁴ Юушые хэхэ аргагүй байһанаа хараад, тээдшые буһалгаан үймөөнэй үсхэгдэхэ гэжэ байһые ойлгоходоо, Пилат уһа абаад, улад зоной урда гараа угаагаад: «Энэ хүнэй үхэлдэ би ямаршые зэмэгүйб; энэ таанадай үйлэдэһэн хэрэг», – гэжэ хэлэбэ.

²⁵ «Тэрээнэй үхэлдэ бидэ, манай үри хүүгэд зэмэтэй байха», – гэжэ улад зон баран харюусаба.

²⁶ Тиихэдэнь Пилат тэдэндэ Бараббые табиба, харин Иисусые сохёод, хэрээхэндэ хадахыень захирба.

Сэрэгшэд Иисусые шоолоно

²⁷ Тиихэдэнь Пиладай сэрэгшэд Иисусые ордоной хэрэмэй хорёодо абаашаба. Тэндэнь олон сэрэгшэд суглараад байгаа. ²⁸ Тэдэ Иисусай хубсаһа тайлажа хаяад, тэрээндэ улаан суба үмдэхүүлбэ, ²⁹ тиигээд үүргэнээр гүрлөө гүрэжэ, толгойдонь үмдэхүүлбэ, баруун гартань модон таяга барюулба. Тиин тэдэнэр Иисусай урда үбдэглөөд: «Еврейнүүдэй хаан мандаха болтогой!» – гэхэ мэтээр тэрээниие шооложо байгаа. ³⁰ Тиигээд тэрээниие нёлбобо, таягынь абаад, тархи түрүүнь сохибо. ³¹ Тиигэжэ Иисусые ханатараа баһаад, удаань үнөөхи улаан субыень тайлажа хаяа. Тиигээд өөрын хубсаһа үмдэхүүлээд, хэрээхэндэ хадахаяа абаашаа һэн.

Иисусые хэрээхэндэ хадаба

³² Замдаа тэдэ Кириной нютагай Симон гэдэг хүнтэй тааралдаад, Иисусай хэрээһэ үргэлөөд ябахыень баалаба. ³³ Тэдэнэр «Хохимой» (еврей хэлээр «Голгофо») гэдэг газарта хүрэжэ ерээ. ³⁴ Тэндэ Иисуста гашуун юумэ холиһон архи уухыень үгөө. Иисус тэрээниинь амсаад, уубагүй. ³⁵ Сэрэгшэд Иисусые хэрээхэндэ хадаад, жээрэб татажа, хубсаһыень дундаа хубаагаа һэн. ³⁶ Тиигээд тэндээ һуугаад, Иисусые харууһалжа байгаа. ³⁷ Иисусай толгойн дээрэхэнэ тэдэ «Энэ еврейнүүдэй хаан Иисус» гэжэ хэрээхэндэ хадууһан шалтагааниинь харууһан модон хабтагай үлгэбэ. ³⁸ Тиихэдэ Иисустай хамта хоёр дээрмэшэдые: нэгыень баруун таладань, нүгөөдыень зүүн тээн хэрээхэндэ хадаба.

³⁹ Хажуугаарнь үнгэрхэн зон толгойгоо нэжэржэ, Иисусые шоглон: ⁴⁰ «Һүмые хандаргаад, гурбан үдэр соо бодхоохоб гээ бэлэйш! Хэрбээ ши Бурханай Хүбүүн юм наа, өөрыгөө абарыш! Хэрээһэнһээ буугыш», – гэжэ байба. ⁴¹ Тон тиигэжэл түрүү санаартан, Хуули заадаг багшанар, ахаматууд, фарисейнүүд Иисусые шооложо: ⁴² «Бусадые абардаг аад, харин өөрыгөө абаржа шаданагүйл! Хэрбээ энэ Израилиин хаан юм наа, мүнөө хэрээһэнһээ бууг лэ! Тиигэбэлнь бидэ тэрээндэ этигэхэбди. ⁴³ Тэрэ Бурханда найдадаг байгаа, өөрыгөө Бурханай Хүбүүнби гэжэ нэрлээ. Зай, тиигэбэл, Бурханда хэрэгтэй юм наань, Бурхан тэрээниие абараг лэ!» – гэлдэбэ.

⁴⁴ Мүн Иисустай хамта хэрээһэндэ хадуулхан дээрмэшэдшые тэрээниие шоглон баһажа байгаа.

Иисус амяа табиба

⁴⁵ Хахад үдэрһөө гурбан саг хүрэтэр бүхы газар дэлхэй шэб харанхыда хушагдаба. ⁴⁶ Гурбан сагай багта Иисус: «Эли, Эли! Лема сабахтани?» (Бурхамни, Бурхамни! Юундэ намайе орхибош?) – гэжэ шангаар хашхарба.

⁴⁷ Тэндэ зогсожо байһан зарим зон хэлэһыень дуулаад: «Тэрэ Илияе дуудана», – гэлсэбэ. ⁴⁸ Тэдэнэй нэгэниинь дары гүйжэ ошомсоороо, бамбагар юумэ абажа, дээрэнь гашуун архи нэбтэртэрынь адхаад, тэрэнээ тулуурай үзүүртэ табяад, Иисуста уухыень үгэбэ.

⁴⁹ Харин бусад зон: «Байза, Илия тэрээниие абархаяа ерэгшэ аа гү, харая», – гэлдэбэ.

⁵⁰ Иисус дахин шангаар хашхараад, амяа табиба.

⁵¹ Тиихэдэнь Һүмэдэ Хамагай Нангин газарта ороходо үлгөөтэй байһан хүшэгэ дээрэһээ доошоо шууража, хоёр боложо хахарба, газар хүдэлбэ, шулуунууд хамхарба, ⁵² мүн агы нүхэн хуурсагууд нээгдэжэ, наһа бараһан хутагтанууд олоороо амидырба. ⁵³ Иисусай амидырһан хойно тэдэнэр агы нүхэн хуурсагуудһаа гаража, нангин Иерусалим хото ороо, тэндэ тэдэниие олон хүн хараһан байгаа.

⁵⁴ Тиихэдэ зуунай дарга, мүн тэрээнтэй хамта Иисусые һахилсагша сэрэгшэд газарай хүдэлхые, мүн бусадшые болоһон үзэгдэлнүүдые хараад, ехэ айн хүрдэжэ: «Тэрэ үнэхөөрөө Бурханай Хүбүүн байгаа», – гэлсэбэ.

⁵⁵ Галилейхээ Иисусыг дахажа ерэнэн, тэрэндэ туһалжа байһан олон эхэнэр баһа тээ холохоно зогсоод хаража байгаа. ⁵⁶ Тэдэнэй дунда Магдалай Мария, мүн Яков Иосия хоёрой эхэ Мария, баһа Зэбэдэйн хүбүүдэй эжынь байлсаа.

Иисусыг хүдөөлүүлэн тухай

⁵⁷ Үдэшэ болоходо Иисусай шабинь байһан Иосиф гэдэг баян хүн Аримафейхээ хүрэжэ ерээ. ⁵⁸ Тэрэ хүн Пилатта ерээд, Иисусай шарилыг үгэхыень гуйба. Тиихэдэнь Пилат Иисусай шарилыг Иосифто үгэхыень захираа һэн. ⁵⁹ Иосиф шарилыень абаад, сэбэр бүдөөр орёогоод, ⁶⁰ хабсагайда түнхижэ бэлдэһэн шэнэ агы нүхэн соо тэрэниие хадагалба, агы нүхэнэй амһар томо шулуугаар хаагаад ябаба. ⁶¹ Тэрэ сагта Магдалай Мария нүгөө Мариятай хамта агы нүхэн хуурсагайн тушаа һуугаа бэлэй.

⁶² Хойто үдэрын, субботодо түрүү санаартан, фарисейнүүд Пилаттай уулзажа: ⁶³ «Эзэн! Тэрэ мэхэшэнэй үшөө амиды байхадаа: „Гурбан үдэрһөө амидырхаб“, – гэжэ хэлэһыг ханабабди. ⁶⁴ Тиимэһээ гурбан хоног үнгэртэр агы нүхыень хахиха захиралта үгыш. Тиигээгүй хаашни, тэрэнэй шабинар хүндөө ошожо, бэеын хулуужа магадгүй, харин улад зондо „Тэрэ амидыраа“ гэжэ хэлэхэдэ болохо. Тиигэбэлнь, энэ һүүлшын мэхэ түрүүшынхиһээ аймшагтай байха», – гэбэд.

⁶⁵ «Харуулшадые абагты. Ошожо, өөһэдынгөө мэдэхээр хахижа харуулжа байгты», – гэжэ Пилат тэдэндэ хэлэбэ.

⁶⁶ Тиимэһээ тэдэ агы нүхэ таглаһан шулууге тамгалаад, хажуудань харуул табиба.

Иисусай амидырһан тухай

28 ¹ Субботын үнгэрһэн хойно, гарагай нэгэнэй үглөөгүүрнь үүр сайхын үеэр Магдалай Мария нүгөө Мариятай хамта Иисусай хэбтэһэн агы нүхэн хуурсагыг харахаяа ерээ һэн. ² Гэнтэ тэндэнь газар аймшагтайгаар хүдэлбэ, тиин Дээдын Эзэнэй Эльгээмэл огторгойһоо бууба. Тэрэ агы нүхэ хаһан шулууге хажуу тээшэнь үмхирүүлээд, дээрэнь һууба. ³ Тэрэнэй шэг шарайнь сахилгаандал мэтэ, хубсаһаниинь саһан шэнги сагаан байгаа. ⁴ Харуулшад тэрээнһээ аргагүй ехээр айжа шэшэрэлдэн, үхэһэн хүнүүд шэнги болошобо.

⁵ Бурханай Эльгээмэл эхэнэрнүүдтэ хандан: «Бү айгты. Таанар хэрээһэндэ хадууһан Иисусыг бэдэрнэт гэжэ би мэдэнэб. ⁶ Тэрэтнай

эндэ үгы! Өөрынгөө хэлээшээр тэрэтнай амидыраа. Ороод, шарилайнь хэбтгэн газарые харагты. ⁷ Мүнөө түргэхэн ошожо, шабинартань тэрэнэй амидырхан тухай хэлэгты. Тэрэ таанаднаа түрүүн Галилей ошохо, тэндэ тэрэниие харахат гэжэ дуулгагты. Зай, би таанарта энээниие дуулгааб», – гэбэ.

⁸ Тиимэхээ эхэнэрнүүд айһаншье, нүгөө талаһаа баярлаһаншье юумэд яаралтайгаар агы нүхэнһөө гаража, тэрэнэй шабинартань энэ мэдээсэл дуулгахаяа гүйлдэбэ. ⁹ Замдань гэнтэ тэдэнтэй Иисус тааралдажа: «Амар мэндэ», – гэжэ тэдэниие мэндэшэлбэ. Тиихэдэнь эхэнэрнүүд Иисуста ойртоод, хүлһөөнь барижа, тэрээндэ мүргэбэ. ¹⁰ Тиихэдэнь Иисус: «Бү айгты. Аха дүүнэрни болохо шабинартам ошожо, Галилейдэ ерэхыень хэлэгты, тэдэ намтай тэндэ уулзаха», – гэбэ.

Харуулшад болоһон ушар тухай хөөрөбэ

¹¹ Эхэнэрнүүдэй үшөө замдаа ябахадань, харуулшадай зариманиинь хото орожо, болоһон бүхы юумэнүүд тухай түрүү санаартанда дуулгаба. ¹² Түрүү санаартан ахаматуудтай уулзажа, зүблөө хээд, сэрегшэдтэ ехэ мүнгэ үгэжэ: ¹³ «Үһиндөө унтажа байхадамнай Иисусай шабинар ерээд, шарилыень хулуугаа гэжэ хүнүүдтэ хэлэхэ ёһотойт. ¹⁴ Хэрбээ засаглагшын энээн тухай юумэ дуулабал, бидэ тэрээнтэй уулзажа энэ хэрэг аргалхабди, тиимэхээ таанадта зобохо хэрэггүй», – гэбэ.

¹⁵ Харуулшад мүнгэ абаад, түрүү санаартанай зааһан ёһоор бүхы юумэ хэбэ. Тиигэжэ тэдэнэй худал хөөрөөн мүнөө хүрэтэр еврейнүүдэй дунда дэлгэрэнхэй.

Агуухэ захяа үгэһэн тухай

¹⁶ Арбан нэгэн шабинарын Иисусай хэлэһэн ёһоор Галилей ошожо, тэндэ хада дээрэ гараа бэлэй. ¹⁷ Тиигээд Иисусые харахадаа, тэрээндэ дохин мүргэбэ, зүгөөр тэдэнэй зариманиинь бүрин этигэнгүй байгаа. ¹⁸ Тиигээд Иисус тэдэндэ ойртоод: «Тэнгэридэшье, газар дээрэшье бүрин эрхэ засаг намда үгтэбэ! ¹⁹ Зай, ошожо, бүхы арадудта минии хургаал айладхагты, Эсэгын, Хүбүүнэй, Нангин Һүлдын нэрээр тэдэниие уһаар арюудхагты. ²⁰ Таанарта минии захиһан бүхы юумэнүүдые сахижа байхыень тэдэниие хургагты. Би таанадтай хамаг юумэнэй эсэс хүрэтэр хододоо хамта байхаб».